

Siunnersuummut nassuiaatit

Nassuiaatit nalinginnaasut

1. Aallaqqaasiut

Sermip erngullu niuernermi atorneqarneri pillugit Inatsisartut inatsisissaatut siunnersuut sermimik, imermillu niuernermit siunertanut misissueqqaarnissamut, atuinissamut, avammullu tunisinissamut malittarisassanik aalajangersaavoq. Pisuussutit taakkua piujuatussamik, akisussaassuseqartumillu atorneqarnissaat Inatsisartut inatsisaata qulakkiissallugu siunertaraa, matumani sermip, erngullu niuernermit tunngavilimmik atorneqarnissaannut malittarisassat, piumasaqaatillu malittarisassiuunneqarnissaat ilanngullugu.

1.1. Siunnersuutip tunuliaqtaa

Sermip erngullu niuernermi atorneqarnerisa eqaannerusumik, ersarinnerusumik, siumullu nalunangereernerusumik malittarisassiuunneqarnissaannik, Sermip erngullu niuernermi atorneqarneri pillugit Inatsisartut inatsisissaatut siunnersuut siunertaqarpoq. Sermip erngullu atorneqarnerisa ineriartorneranut naleqqussaajumalluni inatsit ukiut ingerlanerini allangortinneqarnikuuvoq, taamaakkaluatorli pisuussutit niuernermi atorneqarnissaannut malittarisassat ersarissassallugit, suliallu suliarineqartarneri pisariillisassallugit suli pisariaqarluni.

Kalaallit Nunaanni sermip, erngullu niuernermi atorneqarnerinut malittarisassiuussineq, Sermip erngullu avammut nioqqutissatut atorneqarnissaat pillugu Inatsisartut inatsisaatigut nr. 7, 31. maj 2001-imeersutigut (sermip erngullu avammut nioqqutiginnissaannut inatsit), 2001-imi juulip aallaqqaataani atuutilersutigut atuutsilersinneqarpoq. Inatsisartut inatsisaatigut nr. 3, 15. maj 2014-imeersutigut aamma Inatsisartut inatsisaatigut nr. 35, 28. november 2016-imeersutigut inatsit allangortinneqarpoq, kingusinnerusukkut Sermip erngullu niuernikkut iluaqutigineqarnissaat pillugu Inatsisartut inatsisaatigut nr. 11, 27. november 2018-imeersutigut, massakkut atuuttutigut atorunnaarsinneqarluni.

Suliat suliarineqartarnerinut atatillugu misilittakkat takutippaat, suliassaqarfiup naleqqunnerusumik malittarisassiuunneqarnissaa, aqunneqarnissaalu tunngavissikkumallugu suliat suliarineqartarnerat eqqarsaatigineqaaqittariaqartoq. Taamaattumik massakkut inatsimmut atuuttumut allangoutissatut siunnersuusiorani, Sermip erngullu niuernermi atorneqarneri pillugit Inatsisartut inatsisissaattut nutaaq Naalakkersuisunut siunnersuutigineqarpoq.

Suliassaqarfiup ersarissumik, siumullu nalunangereernerusumik malittarisassiuunneqarnissaa, sulinermilu atorneqarnera tunngavissikkumallugu inatsisartut inatsisaata peqqissaarunneqarnissaa, ersarissarneqarnissaalu siunnersuuteqarnermi siunertaavoq. Matumani aamma sermimik, imermillu misissueqqaarnissamut, atuinissamut,

avammullu tunisinissamut akuersissutit pillugit aalajangiinissanut ersarissunik sinaakkutinik, piumasagaatinillu aalajangersaanikkut. Ilutigisaanik Kalaallit Nunaanni sermeq, imerlu aamma issittumi pinngortitaq mianernartoq illersorumallugit piujuartitsinissaq, avatangiisillu siornatigut malittarisassiuussinermi ilaatinneqarsimanngitsut ilanngunneqarput.

Pisuussutinik piujuartitsisussamik atuinissamut tunngavissiisinnaasumik, ilutigisaanillu inuiaqatigiinni, avatangiisitigut, inuussutissarsiutitigullu eqqarsaatigisassanik eqqarsaatiginnittunik suliaasaqarfiup ersarissumik, assigiaartumillu malittarisassiuunneqarnissaanik qulakkeerinissamik pisariaqartitsineq, siunnersuutip tunuliaqutigaa. Kalaallit Nunaata sermiata, erngatalu niuerneramik tunngavilimmik atorneqarnissaannut inuussutissarsiutillit soqutiginninnerat annertusisimavoq. Sulialli suliarineqartarnerisigut ersarissivoq, suliaasaqarfimmik ersarissumik, eqaatsumik, siumullu nalunangereersumik ingerlatsinissamik qulakkeerisumik nutaamik inatsisiliornissaq pisariaqartoq.

1.2. Inatsisissamik piareersaanermi pingaarnertit

Inuussutissarsiornermut, Niuernermit, Aatsitassanut, Inatsisit Atuutsinneqarnerannut Naligiissitaanermullu Naalackersuisoqarfiup malittarisassanik atuuttunik allaffissornerminut atatillugu misilittagai, unammillernartitailu tunuliaqutaralugit siunnersuut suliarineqarpoq. Tassunga atatillugu massakkut malittarisassat eqaatsumik, siumullu nalunangereersumik ingerlatsinissamut tunngavissiinersoq nalilerumallugu, suliat suliarineqartariaasiat misissorneqarpoq.

Taassumap saniatigut qinnuteqartartut, pisinnaatitsissummillu pigisaqartut massakkut inatsimmut atuuttumut misilittakkaminnut atatillugu isummersuutaat namminneq kajumissutsiminnik ataavartumik nassiuttarsimasaat, inatsisissamik piareersaanermi ilaatinneqarput. Uani pingaartumik qaqugukkut akuersissummik tunniussisoqarsinnaaneranut piumasagaatit ersarissuunissaannik, suliat sivikinnerusumik suliarineqartarnissaanik kiisalu piumasagaatinik aalajangersaanermut atatillugu eqaannerusumik ingerlatsisoqarnissaa kissaatigineqartarpoq. Tamanna tunuliaqutaralugu suliaasaqarfiup ataqatigiinnerunissaata, aqunneqarsinnaanerumillu malittarisassiuunneqarnissaata, ilutigisaanillu ingerlatsivimmi nukinnik atuffiunnginnerunissaata, qinnuteqartumullu paasiuminartuunissaata qulakkeerneqarnissaa siunertaralugu siunnersuutip suliat suliarineqartarnerat allanngortippaa..

1.3. Ataatsimut isigalugu siunnersuutip imarisaa

Sermip erngullu niuernermit atorneqarnerisa massakkut malittarisassiuunneqarnerinik siunnersuut naleqqussaaneruvoq. Piumasagaatit atuuttut arlaqartut siunnersuummi ingerlateqqinneqarput, ilaneqarlutillu. Akuersissutinut aqqissuussaaneq allanngortinneqarpoq, akuersissutillu pillugit aalajangiinissanut piumasagaatit aalajangersimasat atuutsilersinneqarlutik. Taassuma saniatigut akuersissutinik qinnuteqarnermut malittarisassat ersarissut siunnersuummi ilanngunneqarput, qinnuteqartariaatsimullu massakkut malittarisassaanut nutarterneqarlutik.

Taassumap saniatigut suliat suliarineqartarnerini pinngortitamut kingunissaanik naliliinerit aamma avatangiisitigut kiisalu inuiaqatigiinni eqqarsaatigisassat ilaatinneqartarnissaat pillugu piunasaqaateqarnissaq siunnersuutitigut saqqummiunneqarpoq. Taamaalilluni suliaassat ilaannut siunnersuut ersarissaanerullunilu naleqqussaaneruvoq, ilutigisaanillu suliaassat sinnerisa malittarisassiunneqarnerinik tunngaviumik allannguinerulluni.

2. Siunnersuummi immikkoortut pingaernerit

Inatsisip ersarissarneqarnissaanik, akuersissutinillu suliaqarnermi siumut nalunangereernerusunik pilersitsinissamik siunnersuut siunertaqarpoq. Akuersissutit ilusissaat aamma annertussusissaat, siunnersuut malillugu aalajangiinissanut piunasaqaatissat aalajangersimasut kiisalu akuersissutit suliarineqartarnerinut, qinnuteqaatigineqartarnerinullu suleriaatsit siunnersuutitigut malittarisassiunneqarput.

2.1. Atuuffia, akuersissutinillu aqqissuussaanerit

Inatsit massakut atuuttoq malillugu akuersissutit assigiinngitsut pingasut tunniunneqarsinnaapput: § 3 malillugu misissueqqaarnissanut, § 4 malillugu sermimik, imermillu atuinissamut akuersissut aamma § 8 malillugu imermik sinneruttumik atuinissamut akuersissut. Inatsit massakut atuuttoq malillugu atuinissamut akuersissutit kisermaassisussaataaffilerlugit imaluunniit kisermaassisussaataaffilernagit tunniunneqarsinnaapput, misissueqqaarnissamulli akuersissut kisermaassisussaataaffilernagu tunniunneqartarluni. Akuersissutit avammut tunisinissamut akuersissutitaqartarput. Taamaakkaluartoq akitsuuserinermi oqartussanut takutinneqarsinnaasumik avammut tunisinissamut immikkut akuersissuteqartoqassanngilaq, avammullu tunisineq inatsimmi uani annerusumik malittarisassiunneqarani.

Sermimut, imermullu atuinissamut akuersissutinut aamma imermut sinneruttumut akuersissutinut piunasaqaatit, malittarisassallu inatsimmi uani aamma atuupput. Suliat suliarineqartarnerini misilittakkat takutippaat, akuersissutit taakkua marluk malittarisassiunneqarnerat immikkoortissallugit pisariaqartoq

Ilutigisaanik avammut tunisinissamut inatsimmi atuuttumi immikkut malittarisassaqaanngilaq, taassumallu kingunerisaanik assersuutigalugu tunisassiat pitsaassusaat imaluunniit avatangiisinut tunngasut nakkutigineqaratik.

Taassumap saniatigut qaqugukkut kisermaassisussaataaffilerlugu akuersissuteqartoqarsinnaanera missilioruminaatsillugu malittarisassat siammasissunik oqaasertaliussanik aallaaveqarput, tamannalu naleqqutinngitsunik oqartussanut, qinnuteqartunullu nalornilersitsisarluni.

Isumaliutiginninnerit taakkua tunuliaqutaralugit siunnersuutigineqarpoq, atuuffia aamma akuersissutit sannaat allanngortinneqassasut. Qulequttat ataasiakkaat tulliuuttumi ersarinnerusumik nassuiarneqassapput. Ataatsimut isigalugu siunnersuutip kingunerisaanik, imermik pilersuivinnit imermik sinneruttumik atuinissamut akuersissutit malittarisassani ilaatikkunnaarneqassapput, taamaalillunilu siunnersuut malillugu tassunga atuinissamut akuersissutinik tunniussisoqarsinnaassanani. Taassumap saniatigut siunissami misissueqqarnissamut akuersissut aamma atuinissamut akuersissut akuersissutissami ataatsimi ilaatinneqarlutik ataatsimoortinneqartalernerisigut akuersissutit aaqjissuusaanerat allanngortinneqassaaq. Taamaakkaluartoq misissueqqarnissamut akuersissummik immikkut qinnuteqarnissaq sulii periarfissaassaaq.

Kisermaassisussaatitaaffilerlugu atuinissamut akuersissummik tunniussinissamut periarfissaq siunnersuummi attatiinneqassaaq. Siumut nalunanngereertitsinerujumalluni kisermaassisussaatitaaffilerlugu akuersissummik qaqugukkut tunniussisoqarsinnaassanersoq siunnersuut aalajangersimasunik piunasaqaateqarpoq.

Sermimik, imermillu misissueqqarnissamut imaluunniit atuinissamut akuersissut immini avammut tunisinissamut akuersissutitaqarunnaarsillugu, avammut tunisinissamut akuersissut akuersissutinik immikkoortinneqassaaq. Taarsiullugu taanna qinnuteqartup qinnutigisassavaa, tamannalu misissueqqarnissamut akuersissummik imaluunniit atuinissamut akuersissummik qinnuteqarnermut ilanngullugu, kingusinnerusukkulluunniit qinnutigineqarsinnaalluni. Nunani allani oqartussanut uppernarsaatitut atorineqarsinnaasumik avammut tunisinissamut immikkut akuersissummik Naalakkersuisut tunniussisinnalissapput, tassungalu immikkut piunasaqaateqassalluni.

2.2.1. Imeq sinneruttoq

Inatsit atuuttoq malillugu, imermik sinneruttumik atuinissamut Sermip erngullu niuernikkut iluaqutigineqarnissaat pillugu Inatsisartut inatsisaatigut nr. 11, 27. november 2018-imeersup § 8-aa malillugu Naalakkersuisut atuinissamut akuersissummik tunniussisinnalissapput. Taamaakkaluartoq akuersissummik tunngavissiissalluni pisinnaatitsissummik pigisaqartup aamma pisortat pilersuinerimi ingerlatsiviata akornanni imermik pisinissamut pisinnaatitsissummik pigisaqartup, pisortallu pilersuivia isumaqatigiissusiortoqarnissaat piunasaqaataassaaq. Tamanna suliat suliarineqartarnerini pisortat pilersuinerimi ingerlatsivii annertuumik peqataatinneqartarnissaannik kinguneqassaaq.

Imeq sinneruttoq pillugu akisussaaffiit agguataarneqarnissaat pillugu massakkut aaqiineq ersarluppoq, soorluttaaq Sermip erngullu niuernikkut iluaqutigineqarnissaat pillugu Inatsisartut inatsisaatigut nr. 11, 27. november 2018-imeersumi § 4 malillugu atuinissamut akuersissut pinnagu § 8 malillugu akuersissuteqarfigisariaqarluni qaqugukkut imeq sinneruttoq pineqarnerisooq nassuiaat, killiliinerlu ersarluttut.

Imip sinneruttup, imermillu pilersuivinnit imeq sinneruttoq siunnersuummi immikkoortinneqarput. Imermut sinneruttumut atuinissamut akuersissummi imeq imermik pilersuiviit atorsinnaasaat, kisianni imermik pilersuinermut atunngisaat pineqartoq ersarisassallugu siunertaavoq.

Imermik sinneruttumik atuinissamik pilersaarutit sermimik, imermillu atuinissamik pilersaarutinit allaanerujussuupput. Imeq sinneruttoq imermik pilersuiviit pingaarnertut ingerlatsinerinit saniatigut pilersarpoq. Taamaattumik pilersaarutit taakkua pilersaarutinit allanut sanilliullugit annertunerusumik sanaartornissamik, misissueqqaarnissamillu qaqutigoortumik pisariaqartitsisarput. Imermik tunisassiornissamut imermik pilersuiviit sanaartukkanik, attaveqaasersuutinillu pisariaqartunik annertuutigut pigisaqareemata, pilersaarutit taakkua erngup aqqutaanut, assigisaanulluunniit atassusiinikkut piviusunngortinneqarsinnaasarput. Tamannarpiaq aamma patsisaalluni pilersaarutinit taakkununnunga misissueqqaarnissamik qaqutigoortumik qinnuteqartoqartarpoq, tamanna pisariaqanngimmat. Imermik pilersuivinnit imermik sinneruttumik suliaqarneq pilersuivinnut tunniunneqartariaqarneranik tamanna tunngavissiivoq, taakuummata imermut isumalluutitut atuinissamik akuersissutinik kiisalu pilersuinermit attaveqaasersuutinut aqutsisooreersut, pisisartunullu imermik pisinissamik isumaqatigiissusiorsinnaareersut. Tamanna tunuliaqutaralugu nalilerneqarpoq, imermik pilersuivinnit imermik sinneruttumik atuinerup malittarisassiuunneqarnera immikkoortinneqaruni, pilersaarutinullu taakkununnunga naleqquttumik immikkut inatsimmi malittarisassiuunneqaruni naleqqunnerussasoq

Siulianiittut tunuliaqutaralugit siunnersuutigineqarpoq, imermik pilersuivinnit imermik sinneruttumik atuneq siunnersuummut ilanngunneqassanngitsoq. Taassumap kingunerisaanik siunnersuut malillugu imermik pilersuivinnit imermik sinneruttumik atuinissamut akuersissummik tunniussisoqarsinnaassanngilaq. Taarsiullugu isumalluutit taakkua imermik pilersuivinnut tunniunneqartariaqarpoq, taakkua inatsisip atuuttup sinaakkutaasa iluini, matumani aamma avatangiisinut aamma pilersuinermut malittarisassat naapertorlugit, imermik sinneruttumik aqutsisinnaammata, niuerutigisinnaallugulu.

Imermik sinneruttumik atuinermut nangitsilluni malittarisassiuussineq Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup aamma imermik pilersuiviit kiisalu soqutigisallit allat akornanni oqaloqatigiinnikkut pissaq. Siunnersuutip atortuulersinneqarnissaa sioqqullugu qinnuteqartoqassappat, taakkua allatigut malittarisassiuussinerup aalajangerneqarnissaata tungaanut Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 malillugu suliarineqassapput. Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 malillugu imermik sinneruttumik atuinissamut akuersissutit tunniunneqarsimasut, siunnersuut malillugu akuersissummik piunasaqaatigineqartut malillugit atatiinnarneqassapput.

Piffissami siunnersuutip suliarineqarfiani Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 naapertorlugu imermik sinneruttumik atuinissamut akuersissut ataaseq tunniunneqarsimavoq. Allaniq qinnuteqaateqanngilaq. Taamaalilluni siunnersuut suliatigut killilimmik kinguneqassangatinneqarpoq.

Siunnersuutip kingunerisaanik, imermik pilersuineri ingerlatsiviit pilersuinissami pisussaaffimminnut pisuussut atareersoq akisussaaffigilissavaat. Ilutigisaanik allaffissornikkut piunasaqaatit annikillissapput.

2.2.2. Akuersissut ataatsimoortoq

Inatsit atuuttoq malillugu, Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 3 malillugu misissueqqaarnissamut akuersissutinik, § 4 malillugu atuinissamut akuersissummik imaluunniit § 8 malillugu imermik sinneruttumik atuinissamut akuersissummik Naalakkersuisut tunniussisinnaapput. Taamaakkaluartoq misissueqqaarnissamut akuersissut qinnuteqartumut annertuumik iluaqutaasinnaagaluartoq, taanna qaqutikkut qinnutigineqartarpoq.

Massakkut taamatut aaqqissuussaanerimi piffissaliussap iluani ingerlatassat aallartinneqanngitsoortarnerisigut, akuersissutinik utertitsinermik kinguneqartartumik akuersissutinik atorneqanngitsumik tunniussisoqartarnera annertuumik unamminarpoq. Tamanna suliat suliarineqartarnerini eqartumik suleriaaseqartitsivoq. Ilutigisaanik ingerlatsisoqanngikkaluartoq, sumiiffiit atorneqarsinnaatinngilai.

Pisuussutit sermeq aamma imeq, assersuutigalugu aatsitassanit immikkut akuersissuteqarfigissallugit naleqqunnerusunit allaanerupput. Aatsitassanut sanilliullugu sermeq imaluunniit imeq sumiiffiimmi pineqartumi tikinneqarsinnaassusaa nalornissutigineqanngisaannangajappoq, taamaattumillu misissueqqaarnissamut immikkut akuersissuteqarnissaq pisariaqarpallaartarani. Erngup pitsaassusaaq misiliinissaq eqqarsaatigalugu misissueqqaarnissaq pisariaqarnerusinnaavoq.

Suliat marloriaammik suliarineqarnissaat pinngitsoortikkumallugu, suleriaaserlu oqilisarumallugu siunnersuutigineqarpoq, misissueqqaarnissamut akuersissut aamma atuinissamut akuersissut akuersissummi ataatsimi ataatsimoortinneqassasut. Taassumap kingunerisaanik atuinissamut akuersissutiminnut ilaatillugu, qinnuteqartut pisariaqartumik misissueqqaarnissaminnut immiini akuersissuteqassapput.

Atuinissami ingerlatat piffissaliussatut aalajangersakkap iluani aallartinneqassasut suli piunasaqaataassaaq, tassani atuinertaqanngitsumik naleqqutinngitsumik nunaminertamik inniminniisoqannginnissaa qulakkeerneqassammat.

Siunnersuut malillugu qinnuteqartoq misissueqqaarnissamut immikkut akuersissummik suli tunineqarsinnaassaaq. Assersuutigalugu erngup pitsaassusaa nalornissutigineqartillugu imaluunniit pisuussut naleqqunnersoq annertunerusumik paasineqarnissaaninaleqqussinnaalluni.

2.2.3. Kisermaassisussaatitaaneq

Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi §§ 4 imaluunniit 8 malillugu inatsimmi atuuttumi, atuinissamut akuersissut kisermaassisussaatitaaffilerlugu imaluunniit kisermaassisussaatitaaffilernagu tunniunneqarsinnaavoq. Kisermaassisussaatitaaneq sumiiffimmut aalajangersimasumut, sermeqarfimmut imaluunniit imeqarfimmut imaluunnit alajangersimasumik annertussutsimik atuinissamut tunniunneqarsinnaavoq. Taamaakkaluartoq kisermaassisussaatitaaneq qaqugukkut tunniunneqarsinnaassanersoq killeqarpoq, matumani atuinissamut periarfissap atornissaanik naatsorsuuteqarnermut piunasaqaat, pisinnaatitsissummillu akuersissummik pigisaqartup pisariaqartitaanik annertunerungaatsiartumik kisermaassilluni atuinissamut akuersissummi ilaatinneqarsinnaannginnera ilanngullugit.

Inatsimmi atuuttumi malittarisassat oqartussanut, qinnuteqartunullu paasiuminaatsitsillutik ingerlakkuminaatsut paasineqarpoq. Taamaattumik qaqugukkut, qanorlu annertutigisumik kisermaa kisermaassisussaatitaaffilerlugu tunniussisoqarsinnanera pillugu pisariillisaasoqartariaqarlunilu ersarissaasoqartariaqarpoq.

Siunnersuutigineqarpoq, kisermaassisussaatitaaneq pillugu malittarisassat ersarissarneqassasut, inatsimilu immikkut kapitalimi ataatsimoortinneqarlutik. Siunnersuutip kingunerisaanik, atuinissamut akuersissut kisermaassisussaatitaaffilerlugu imaluunniit kisermaassisussaatitaaffilernagu suli tunniunneqarsinnaassaaq. Taassuma saniatigut qaqugukkut kisermaassisussaatitaaffilerlugu akuersissummik tunniussisoqarsinnaaneranut piunasaqaatit siunnersuummi aalajangersarneqarput. Siunnersuut malillugu piujuartitsisumik atuinissaq, teknikkimut tunngasut, inuiaqatigiillu soqutigisaat eqqarsaatigalugit pisariaqartillugu imaluunniit suliniut naleqquttumik ingerlanneqarsinnaassanngikkaluartoq ingerlanneqarsinnaasunngortinniarlugu kisermaassisussaatitaaneq kisimi tunniunneqarsinnaassaaq.

Kisermaassisussaatitaaneq sumiiffimmut akuersissuteqarfimmut attuumassuteqassaaq. Taamaalilluni nunami piunasaqaatit tunuliaqutaralugit killilersuisoqassaaq. Akuersissuteqarfimmut tamarmut, ilaannaanulluunniit kisermaassisussaatitaaffilerlugu akuersissuteqartoqarsinnaavoq. Taamaalilluni sumiiffimmut aalajangersimasumut, sermeqarfimmut imaluunniit imeqarfimmut imaluunnit alajangersimasumik annertussutsimik atuinissamut siunnersuummi immikkoortinneqanngilaq, tamanna sulinermi ajornakusoortoq paasineqarmat.

Kisermaassinissamnut immikkut piumasaqaatinik Naalakkersuisut suli aalajangersaasinnaassapput.

Misissueqqaarnissamut akuersissut kisermaassisussaatitaaffilernagu tunniunneqartuaannartoq atatiinnarneqarpoq, atuinissamullu akuersissummik tunniussisoqassappat taanna tunniunneqartinnagu ingerlatsisut arlaqartut pisuusummik misissuisinnaanissaat taassumap qulakkiissammagu.

2.2.4. Avammut tunisineq

Inatsimmi atuuttumi sermimik, imermillu Kalaallit Nunaannit avammut tunisineq, aatsaat Naalakkersuisut akuersissuteqarnerisigut pisinnaaneranik piumasaqaateqarnikkut taamaallaat malittarisassiuunneqarpoq. Taassumap saniatigut ingerlatat aamma avammut tunisineq pillugit Naalakkersuisut piumasaqaatinik aalajangersaasinnaatinneqarput, pisinnaatitsissummik pigisartut pilersuisuinit paasissutissanik piniarsinnatitaallutik. Taamaakkaluartoq avammut tunisinissamut akuersissutit ersarinnerusumik malittarisassiuunneqanngillat, matumani uppersaasiineq, pitsaassutsumik nakkutilliineq imaluunniit allatigut nakkutilliinissat nunat tamalaat akornanni niueqateqarnermi pingaaruteqarsinnaasut ilanngullugit. Avammut tunisinissamut akuersissut, atuinissamut akuersissummik piumasaqaatitut, akuusutullu ilaavoq. Pisinnaatitsissummik pigisaqartut nunani allani pisisuni oqartussanut takutissinnaasaminnik immikkut avammut tunisinissamut akuersissummik ujartuisarmata, tamanna sulinermi unammillernartitsisimavoq. Ilutigisaanik avammut tunisineq Kalaallit Nunaata aningaasaqarnikkut, inuiaqatigiinnilu soqutigisai, pilersuinerup isumannaassusaa imaluunniit piujuartitsinissaq akigalugit ingerlanneqannginnissaa qulakkiissallugu aamma pisariaqarpoq.

Unamminartut taakkua iliuuseqarfigiumallugit, avammut tunisisinnaanermut akuersissummik tunisissagaanni piumasaqaatinik ersarissaasumik avammut tunisineq ersarinnerusumik malittarisassiorfigineqassasoq siunnersuummi siunnersuutigineqarpoq. Siunnersuutip kingunerisaanik, avammut tunisineq Kalaallit Nunaata soqutigisaanut, matumani pilersuinerup isumannaassusaa ilanngullugu, naleqquttoq nalilerneqarpat aatsaat, avammut tunisisinnaanermut akuersissummik tunniussisoqarsinnaassaaq. Ilutigisaanik Naalakkersuisut immikkut piumasaqaatinik killilersuutinillu aalajangersaanissaminnut periarfissaqassapput, matumani immikkut pisoqartillugu avammut tunisinissamut inerteqquteqarneq ilanngullugu, matumani aamma nunat imaluunniit inuit pillaatitut iliuuseqarfigineqarsimasunut atatillugu.

Inatsit atuuttoq naapertorlugu avammut tunisinissamut piumasaqaatip, atuinissamut akuersissutip piffissaq atuuffigisaa malippaa. Imaappoq, ukiut 20-t tikillugit. Siunnersuutigineqarpoq, avammut tunisinissamut akuersissut ukiut tamaasa nutarterneqartassasoq. Ukiumut nutarterneqartarnissaani avammut tunisinissamut akuersissutit qaqugukkulluunniit pissutsinut atuuttunut naapertuunnissaat, ilutigisaanillu avammut tunisinissamut akuersissutip nunami tunisiffimmi uppersaatitut atuuttut akuerineqarsinnaanissaa qulakkiissallugu pingaarnertut siunertaavoq. Ilutigisaanik

paasissutissat nutaanngilisimasut tunngavigalugit avammut tunisisoqannginnissaa qulakkeerreqassaaq..

2.3. Suliamik suliaqarneq – Qinnuteqaammik ataatsimut suliaqariaaseq

Inatsit atuuttoq avitamik suleriaaseqartitsivoq, tassani pisinnaatitsissummik pigisaqartoq siullermik atuinissamut akuersissummik pissarsiteriarlugu, tullertut immikkut akuersissummik pissarsinissaanut atuinissamut, uninnissamullu pilersaarutitik nassitsitillugu. Pilersaarutit taakkua Naalakkersuisunit akuerineqarpata aatsaat, atuinissamut ingerlatat aallartinneqarsinnaapput.

Massakkut suleriaaseq sulianik annertuumik suliarinnittarnermik kinguneqarpoq, inatsisitigullu piumasaqaatit, piffissaliussallu tunuliaqutaralugit suliniutit piviusunngortinneqarnissaat suliatigut kinguarsaallunilu piviusunngortitsinngitsoorsinnaalluni.

Suliat suliarineqartarnerat pisariillisarumallugu atuinissamut, uninnissamullu pilersaarutitut piumasaqaatit atuinissamut akuersissummik qinnuteqaammut ilaatinneqalerlugit, ataatsimut qinnuteqartariaaseq siunnersuutigineqarpoq. Taassumap kingunerisaanik suliap ingerlanneqarnissaa, aningaasalersorneqarnissaa, avatangiisinut tunngasut kiisalu torersaanissami aamma uninnissami iliuusissat pisinnaatitsissummik pigisaqartup qinnuteqarnermini nassuiaatigissavai. Taassumap saniatigut qinnuteqaatip imassaanut, matumani qinnuteqarnissami nalinginnaasumik malitassanut Naalakkersuisut ersarinnerusunik piumasaqaasiornissaminnut piginnaatinneqarput.

Qinnuteqarnissamut tunngavissamut, suliallu suliarinissaannut piumasaqaatit siunnersuutitigut qaffanneqarput. Paasissutissanut piumasaqaataasut annerusumik taakkuuginnartussaagaluartut, atuinissamut aamma uninnissamut pilersaarutit kingusinnerusukkut akuerineqartussaannimmata, nassiussinissamut piffissarititaq siuartinneqarpoq. Taamaattorli malitsigisaanik akuersinnermut atatillugu suliap marloriarluni suliarineqarani, qinnuteqartoq qinnuteqaammik ataasiinnarmik nassitsissaaq.

Akuersissut tunniunneqarniariartoq pisinnaatitsissummik pigisaqartup ingerlatassaminik aallartitsisinnaatillugu, eqaannerusumik suleriaaseqarnissaaq siunertaavoq. Tamanna akuersissutitik suliaqartarnermi piffissamik sivisunerusumik atuisarnissamik kinguneqarsinnaavoq, kisianni atuinissamut aamma uninnissamut pilersaarutitik akuersissutitik kingusinnerusukkut suliaqartussaanninneq tassunga naligiissitsivoq. Ataatsimut isigalugu suliniutit iluatsittarnerinik siunnersuut annertusaassaaq, allaffikkornikkullu akimmiffinnik annikillisisilluni.

2.4. Akuersissutitik tunniussisarnermut piumasaqaatit

Inatsit malillugu akuersissummik tunniussisoqassanersoq pillugu naliliinissami inatsit atuuttoq malillugu Naalakkersuisut pingaarutilimmik naliliisussanngortinneqarput.

Pisinnaatitsissummik pigisaqartumut ataasiakkaanik piumasqaateqarpoq, matumani ingerlatseqatigiiffiup ilusaanut, angerlarsimaffeqarneralu ilanngullugit. Taassumap saniatigut ingerlatat ingerlannissaannut pisinnaatitsissummik pigisaqartup pisariaqartumik paasisimasaqassasoq, akissaqartissagaalu piumasqaataavoq. Taassumap saniatigut naliliinissaq eqqarsaatigalugu annerusumik malittarisassaqaranilu ilitersuutitaqanngilaq.

Ersarissuutitsinerunissaq qulakkeerumallugu, akuersissutinillu tunniussarnermi assigiinngitsuliornissaq pinngitsoortikkumallugu pisinnaatitsissummik pigisaqartumut, suliniummullu piumasqaatinik ersarissaasinnaasunik piumasqaatinik atuutsilersitsisoqartariaqarpoq. Aalajangeeriaatsimik assigiissaarnerusumik, siumullu nalunangereernerumik pilersitsiumalluni pisinnaatitsissummik pigisaqartumut aamma suliniummut aningaasatigut, inatsisitigut, teknikkikkullu piumasqaatit ersarissarneqarnissaat aalajangiisuvoq. Tamanna suliniutit aningaasatigut, teknikkikkullu ingerlanneqarsinnaasut kisimik akuerineqartarnissaasa qulakkeerneqarnissaanut aamma tapertaassaaq.

Pisinnaatitsissummik pigisaqartup piginnaasai, suliniutillu ataannarsinnaassusaa piumasqaatit ersarissut malillugit nalilerneqarlutik siumut nalunangereernerusumik, ersarinnerusumillu suleriaaseqarnissaq siunnersuutip qulakkiissavaa.

2.4.1. Pisinnaatitsissummik pigisaqartumut piumasqaatit

Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 9 naapertorlugu atuinissamut akuersissut aktianik piginneqatigiiffimmut imaluunniit piginneqataassuteqarluni ingerlatseqatigiiffimmut, Kalaallit Nunaanni angerlarsimaffeqartumut taamaallaat tunniunneqarsinnaavoq. Inatsisartut inatsisaat malillugu akuersissummi ingerlatassat ilaatinneqartut taamaallat ingerlanneqassasut imaluunniit akuersissut malillugu ingerlatassat, ingerlatassallu allat ingerlatseqatigiiffiup ingerlassinnaagai aamma piumasqaataavoq. Pisariaqartumik ingerlatassat ingerlannissaannut pisinnaatitsissummik pigisaqartup pisariaqartumik paasisimasaqarnissaa, akissaqarnissaalu eqqaassanngikkaanni pisinnaatitsissummik pigisaqartup aningaasatigut, aqutsinermilu tunngaviinut annerusumik piumasqaateqanngilaq.

Pisinnaatitsissummik pigisaqartup atuinissamut akuersissummik tunineqarnissaminut piukkunnaateqarnersoq pillugu naliliinissamut, massakkut malittarisassaasut Naalakkersuisut pingaarutilimmik naliliisussanngortippaat. Taamak siammasitsigisumik naliliinissami piginnaatitsissuteqarneq assigiinngitsumik suleriaaseqarnissamik, ingerlatsisunullu akuersissutinik qinnuteqartunut nalornilersitsinermik kinguneqarsinnaavoq. Pisinnaatitsissummik pigisaqartut aningaasatigut, inatsisitigut, aqutsinermilu naammattunik piginnaasallit kisimik akuersissutinik tunineqartarnissaannik qulakkeerisinnaasunik ersarinnerusunik, kinaassusersiunngitsunillu atuutsilersitsisoqarnissaa pisariaqarpoq. Tamanna akuersissutinik tunniussiniarnermi siumut nalunangereersutsimik, ersarissuutitsinermillu pilersitseqataassaaq, ilutigisaanillu Kalaallit Nunaanni sermeqarfiit, imeqarfiillu illersorneqarlutik piumasqaatinik.

Siunnersuut malillugu akuersissutinik tunniussinissami kinaassusersiunnginnerusumik, ersarinnerusumillu tunngavissamik pilersitsiumalluni, pisinnaatitsissummik pigisaqartumut piunasaqaatit siunnersuummi ersarissarneqarlutillu itisilerneqarput. Siullermik pisinnaatitsissummik pigisaqartoq Kalaallit Nunaanni angerlarsimaffeqartutut nalunaarsoqqalluni aktianik piginneqatigiiffiunngikkuni piginneqataassuteqarluni ingerlatseqatigiiffiussasoq ersarissarneqassasoq siunnersuutigineqarpoq. Taamaakkaluartoq pisinnaatitsissummik pigisaqartoq akiliisarnerminik unitsitsisimassanani, akiliisinnaajunnaarsimassanani, pinngitsaaliissummik atorunnaarsitaasimassanani, allatigulluunniit taakkununga nallersuunneqarsinnaasunik inissisimassasani aningaasatigut akiliisinnaassuseqassasoq aamma piunasaqaateqassaaq. Pisinnaatitsissummik pigisaqartoq aamma Kalaallit Nunaanni pisortanut 100.000 koruuninik amerlanerusunilluunniit akiitsoqassanngilaq. Taassumap saniatigut pisinnaatitsissummik pigisaqartup aqutsisuinut aamma piunasaqaateqassaaq: Aqutsisut, matumani qullersaqarfimmiut, siulersuisuni ilaasortat aamma teknikkikkut aqutsisut kiisalu piginnittuviit ilanngullugit, inaarutaasumik eqqartuunneqarnermikkut aningaasatigut pinerluttuliorsimasutut eqqartuunneqarsimassanngillat, suliffeqarfimmik ingerlatsisinnajunnaarsinneqarsimassanngillat imaluunniit ingerlatseqatigiiffiup ingerlatsineranut sunnuteqarsinnaasunik allatigut killilersorneqarsimassanngillat.

Taassumap saniatigut akuersissut naapertorlugu ingerlatassat pisinnaatitsissummik pigisaqartup ingerlassinnaagai qulakkeerumallugu siunnersuutigineqarpoq, akuersissut malillugu ingerlatassanut pisinnaatitsissummik pigisaqartoq pisariaqartumik paasisimasaqassasoq.

Kiisalu siunnersuutigineqarpoq, pisinnaatitsissummik pigisaqartumut piunasaqaataasut qinnuteqarnermuinnaq atatillugu pisinnaatitsissummik pigisaqartup naammassinagit, piffissaq akuersissuteqarfiusoq tamakkerlugu naammassissagai.

2.4.2. Suliniummut piunasaqaatit, piunasaqaatitalerlugu atuinissamut akuersissut

Inatsit atuuttoq malillugu akuersissummik tunniussisoqarnissaanisuliniummut tunngavilersukkanik piunasaqaasiortoqanngilaq. Suliniut teknikkikkut, aningaasatigullu ingerlanneqarsinnaaneramik qinnuteqartoq takutitsisariaqartinnagu akuersissut tunniunneqarsinnaavoq, tamannalu suliap paasissutissinneqarnissaanut Naalakkersuisut pingaarutilimmik naliliisussanngortinneqarlutillu piunasaqarfigineqarlutik.

Taamaakkaluartoq atuinissamut, uninnissamullu pilersaarutit akuerineqarnerinut atatillugu aatsaat, uppersaanissamik piunasaqaateqarpoq.

Suliniutit nalilerneqarnissaanni kinaassusersiunngitsunik piunasaqaateqarnissaa pisariaqarpoq, taamaalilluni aalajangeeriaaseq assigiingitsuliernerunnginnerullunilu ersarinneruniassammat. Erseqqissunik piunasaqaasiortoqanngippat, suliniutinut piviusunngortinneqarsinnaanngitsunut akuersissutinik tunniussisoqaratarsinnavoq, tamannalu

anigaasatigut aamma avatangiisitigut ajornartorsiuteqalerneramik, siunertaanngitsumillu nunaminertamik inniminniinermik kinguneqarsinnaavoq.

Atuinissamut akuersissummik tunniussisoqartinnagu suliniut teknikkikkut, aningaasatigullu ingerlanneqarsinnaaneranik qinnuteqartup uppersaanissaanik siunnersuut piumasaqaatitaqarpoq. Tamanna pisinnaatitsissummik pigisaqartup uppersaanissaanik piumasaqaasiivoq. Eqaassuseqarnissamik pisariaqartitsineq iliuseqarfigiumallugu siunnersuutigineqarpoq, suliniutip ingerlanneqarsinnaaneranut piumasaqaataasup naammassineqarnerata uppersarneqarnissaanut qinnuteqartup annerpaamik ukiut pingasut iluini uppersaasiinissaanik piumasaqaatigalugu, atuinissamut akuersissut tunniunneqarsinnaasassasoq. Piffissaliussap iluani piumasaqaataasoq naammassineqanngippat, piumasaqaatitalerlugu akuersissut erngertumik atorunnaassaaq.

Akuersissummi piumasaqaataasoq naammassineqartoq Naalakkersuisut akuersitinnagit, pisinnaatitsissummik pigisaqartup atuinarluni ingerlatsinerit aallateqqusaanngilai. Taamaattoq piumasaqaatitalerlugu atuisinnaanermut akuersissut misissueqqaarnissamut akuersissummut naleqqiunneqarmat, pisinnaatitsissummik pigisaqartoq misissueqqaarsinnaavoq. Taamaalilluni suliniutip teknikkikkut, aningaasatigullu ingerlanneqarsinnaanissaanik uppersaanissamut pisariaqartumik piumasaqaataasup qulakkeerneqarnissaanut, pisinnaatitsissummik pigisaqartoq piffissalernerqassaaq.

Suliniutip ineriartortinneqarnerani siusissumi Naalakkersuisut akuersissummik tunniussisinaanissaat siunnersuutitigut qulakkeerneqassaaq, ilutigisaanillu naleqquttumik piffissaliussap iluani pisariaqartumik uppersaanissamik qinnuteqartup tunniussinissaa piumasaqaatigineqarsinnaassalluni.

Akuersissummik tunniussinissami tunngavissatut suliniutit teknikkikkut, aningaasatigullu ingerlanneqarsinnaanersut Naalakkersuisut naliliissasut siunnersuutigineqarpoq. Ilutigisaanik siunnersuutigineqarpoq, uppersaasiinissamut piffissaliussat eqqarsaatigalugit eqaassuteqartitsinissaaq qulakkeerumallugu, Naalakkersuisut piumasaqaatitalerlugu atuisinnaanermut akuersissummik tunniussisinnaassasut.

2.5. Akuersissuteqarnissamut piumasaqaatit

Sermimik, imermillu akisussaassuseqartumik, sunniuteqarluartussamillu atuinissamut akuersissuteqarnissamut piumasaqaatit aalajangiisuupput. Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersoq piffissaliussanut, ingerlatassanut, piffissanullu akuersissuteqarfiusut kiisalu piumasaqaatinik allanik aalajangersaanissamut ataasiakkaatigut piginnaatitsissutinut piumasaqaatitaqarpoq. Taamaakkaluartoq suliniutip angissusaa aamma ineriartornera, aammali pissutsit siumut ilisimaneqarsinnaanngitsut eqqarsaatigineqartussanngorlugit ersarinnerusumik, eqaannerusumillu malittarisassiuussinissaaq pisiaqarpoq.

Aallartinissamat piffissaliussat, ingerlatsisussaataaneq, piffissallu akuersissuteqarfiusut siunnersuummi ersarissarneqarlutillu naleqqussarneqarput. Suliniutit siuariartornissaannik tunngavissiillutillu, naleqqussaannissamat pisariaqartumik periarfissiisunik, ilutigisaanillu siunertaanngitsumik nunaminertamik inniminniisoqarnissaa illersorneqarluni ersarinnerusunik, eqaannerusunillu malittarisassiuussinissaq siunertaavoq.

2.5.1. Aallartinnissamat piffissaliussaq, ingerlatsisussaataanerlu

Inatsit atuuttoq malillugu, akuersissutip tunniunneranit atuneq qaqugu aallartinneqarsimassanersoq piffissaliussaq, atuinissamat akuersissuummi aalajangersarneqassaaq. Piffissaliussaq naammassineqanngippat, atuinissamat akuersissut engertumik atorunnaassaaq. Piffissaliussaq sivitsorneqaqqissinnaanani ukiunit tallimanit sivirusunerusinnaanngilaq, immikkullu akuersissuteqarnissamat periarfissaqarani. Tamanna pisinnaatitsissummik pigisaqartumut, naatsorsuutiginnisamik kinguaattoornernik nalaataqartumut naleqqutinngitsumik inissiisarpoq. Suliniutip ineriartornera, niuernermit pissutsit, pisinnaatitsissummillu pigisaqartup aqussinnaanngisaamik naatsorsuutiginnisamik pisinnaasut eqqarsaatigineqarsinnaatillugit, eqaannerusunik malittarisassiuussinissaq pisariaqarpoq.

Taassumap saniatigut ingerlatsinernik unitsitsigallarnissat Naalakkersuisunit akuerineqartariaqarmata, inatsisip atuuttup toqqaannanngitsumik ingerlatsinissamik piunasaqaat aalajangerpaa. Unitsitsigallarnissaq qaqugukkut akuerineqarsinnaanera pillugu naliliinissaq missiliugassaavoq, malittarisassallu itisilerneqarnissaat aamma ersarissarneqarnissaat pisariaqartinneqarluni.

Ingerlatsisussaataaneqsiunnersuummi nassuiaatigineqarpoq, aallartinnissamullu piffissaliussamat malittarisassat nutarterneqarlutik.

Atuinissami ingerlatsinissaq ukiut tallimat iluini aallartinnissaannik piunasaqaat siunnersuummi attatiinneqarpoq. Misissueqqaarnissat eqqarsaatigalugit, misissueqqaarnissamat immikkut akuersissummik tunniussisoqarsimappat, misissueqqaarnerit ukiup siulliup iluani aallartinneqarsimassasut piunasaqaataalissaaq. Taassumap saniatigut pisinnaatitsissummik pigisaqartup suliniutip piviusunngortinneqarnissaa sulissutigippagu imaluunniit paasinartumik siumut ingerlanissamat akimmiffiusimasoqarpat, Naalakkersuisut aallartinnissamat piffissaliussamik siunnersuutitigut sivitsuisinnaapput. Taamaalilluni suliniutit aallartinneqanngisaannartussanut akuersissutit attatiinneqannginnerussammata, siumut ingerlasoqarnissaa eqqarsaatigineqarpoq. Uani nunaminertamik inniminniisoqarnissaa pinngitsoortinniarneqarpoq.

Ingerlatsisussaataaneq eqqarsaatigalugu, pisinnaatitsissummik pigisaqartup piffissaq akuersissuteqarfiusoq tamakkerlugu akuersissut malillugu ingerlatsissasoq siunnersuutip ersarissarpaa. Taamaakkaluortoq ukiut siulliit pinnagit, taakkua pisinnaatitsissummik pigisaqartoq aallartisaanissamat piffissalerneqarluni aallartinnissamat piffissaliussami

ilaatinneqarmata. Ingerlatanik sunilluunniit unitsitsigallarnissat akuerineqarnissat attatiinnerneqarpoq, tassungali ersarinnerusunik piumasaqaasiortoqarluni. Ingerlatat unitsikkallarneqarnissaannik pisariaqalersitsisunik immikkut pissuteqassaaq, ingerlatallu aallarteqqinnissaannut pisinnaatitsissummik pigisaqartoq pilersaarummik saqqummiussissalluni.

2.5.2. Piffissaq akuersissuteqarfiusoq

Inatsit atuuttoq naapertorlugu atuinissamik akuersissut ukiut 20-t tikillugit atuuttussatut tunniunneqarsinnaavoq, sivitsorneqarnissaanullu periarfissaqarluni. Misissueqqaarnissamut akuersissut ukiut pingasut tikillugit pinerit tamaasa tunniunneqarsinnaavoq. Taamaakkaluartoq suliniut iluatsikkaluarpalluunniit imaluunniit inuiaqatigiinnut iluaqutaagaluarpalluunniit, atuinissamut akuersissummi piffissaq akuersissuteqarfiusoq annerpaamik ukiunut 30-nut aalajangersarneqarsinnaavoq.

Akuersissut qanoq sivisutigisumik atuussinnaanissaanut qaffasinnerpaamik killiliissalluni naleqqutinngissinnaavoq. Suliniummi akisussaaffilimmik, piujuartussamik, ineriartornissamullu periarfissaqarluni ingerlanneqartoq pisortatigoortumik piffissaliineq patsisaaginnarluni matusariaqaratarsinnaalissammat. Tamanna suliffeqarfinnut pilersikkumasunut, aningaasaleerusuttunullu nalorninartumik tunngavissaqalersitsivoq, siunissamummi ungasinnerusumut akuersissuteqarsinnaannginneq suliniutini taamak ittuni aningaasatigut annertuumik kinguneqarsinnaasuni akisussaaffeqarnissaq soqutiginarunnaarsinnaammat. Siunissamut ungasinnerusumut aningaasaliissutit tunngavissikkumallugit, eqaannerusumik malittarisassaqaarnissaa pisariaqarpoq.

Akuersissutit ukiut 20-t tikillugit piffissalerlugit tunniunneqarsinnaanerat siunnersummi atatiinnerneqarpoq. Piffissaq akuersissuteqarfiusoq ukiut qulikkaarlugit Naalakkersuisut sivitsorsinnaassagaat, piffissarlu annerpaamik akuersissuteqarfiusinnaasoq peerneqassasoq siunnersuutigineqarpoq. Tunngavilersukkamik naliliineq aallaavigalugu, akuersissummik qaqugukkut sivitsuisoqarsinnaanersoq piumasaqaatinik aalajangersaasoqassaaq. Piumasaqaatit ersarinnerusut piumasaqaatigalugit sivitsuineq aalajangersarneqassaaq. Pissutsit allanngorsinnaanerat, ilisimasallu nutaat eqqarsaatigineqarsinnaanerat malittarisassanik siunertaavoq.

Taamaalilluni sivitsuinissamik aalajangiinerit suliniutip inuiaqatigiinnut pingaaruteqassusianik, aningaasatigut nammassinnaassusianik kiisalu avatangiisinut aamma piujuartitsisussanut tunngasunik tamat isiginnittumik naliliisoqartassalluni, malittarisassat eqaannerusut qulakkeerneqassapput. Tamanna pisinnaatitsissummik pigisaqartumut siumut nalunangereernerusumik pilersitsissaaq, pisuussutillu akisussaaffeqartumik atornissaat qulakkeerneqarluni.

2.6. Pinngortitamut kingunissaanik naliliineq aamma avatangiisit

Pinngortitamik illersuineq pillugu Inatsisartut inatsisaanni § 4 malillugu, pisuussutunik uumaatsunik misissueqqaarnernut, misissueqqissaarnernut, atuinernullu atatillugu pinngortitamik illersuinissamut malittarisassanik aalajangersaaneq inatsisartut inatsisaanni ilaatinneqanngilaqq. Taakkua pillugit malittarisassat, ingerlatassanut taamak ittunut pisinnaatitsissummik imaluunniit akuersissummik tunniussinissamut inatsit tunngaviusoq tunngavigalugu kiisalu taakkuninnga oqartussat ataatsimut suliaqarnerinut atatillugu aalajangersarneqassapput. Sermeq, imerlu pisuussuutitut uumaatsutut isigineqarput. Taamaalilluni sermimik, imermillu misissueqqaarnernut aamma atuinermut atatillugu siunnersuut manna, sermimik aamma imermik niuerneramik tunngavilimmik atuinissamnut, matumani misissueqqaarnissaq aamma atuinissaq ilanngullugit, akuersissutunik tunniussinissamut tunngaviuussasoq malillugu pinngortitamik illersuinissamut malittarisassanik aalajangersaasoqassaaq.

Sermimik, imermillu atuinermut atatillugu avatangiisinut tunngatillugu inatsit atuuttoq ataasiakkaanik aalajangersagaqarpoq. Atunissamut pilersaarutit, atuinissamut akuersissummik tunniussereernerup kingorna akuerineqartussat, ingerlatat avatangiisinut kingusinerisinnaasaannik tunngasunik ilaatigut naliliinertaqassapput. Taassumap saniatigut avatangiisinut, pisuussutinullu tunngasunut akuersissummi piumasaqaatinik aalajangersaasoqarsinnaavoq, pisinnaatitsissummik pigisaqartoq ingerlatat pillugit ukiumoortumik nalunaarusiortassaaq. Akuersissutunik tunniussinermut atatillugu pinngortitamut sunniutigisinnaasaanik naliliinermik suliaqartoqarnissaanik Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi piumasaqaateqanngilaq.

Annertuumik ajoqusiinissamut pinngortitaq illersorneqartariaqarpoq, suliffeqarfiillu aamma pisinnaatitsissummik pigisaqartut ingerlatsinermi kingunerisinnaasaannut akisussaaffimmik tigusinissaat pingaaruteqarpoq. Taamaattumik sermimik, imermillu atuinissamut akuersissummik tunniussisoqartinnagu, pinngortitamut kingunissaanik naliliinerit suliat suliarineqartarnerinut ilaatinneqartariaqarput. Suliniutinut nunamut, pinngortitamullu annertuumik sunniuteqarsinnaasunut akuersissummik tunniussisoqartinnagu peqqissaartumik naliliiffigineqartarnissaat pinngortitamut kingunissaanik naliliinerup qulakkiissavaa, akuersissummilu nalequttunik, pisariaqartunillu piumasaqaasiortoqarsinnaanissaanut kiisalu paasissutissanik tunngavilimmik aalajangiisoqarnissaanut tunngavissiisinnaassalluni. Tamanna pillugu siunnersuutigineqarpoq, akuersissummik tunniussisoqartinnagu qinnuteqartoq pinngortitamut kingunissaanik naliliinermik tunniussinissaanik piumasaqaammik atuutsilersitsisoqassasoq. Naliliinermi tassani nunamut, kangerlummut, immamut kiisalu pinngortitamut kingunerisinnaasai ilanngunneqassapput. Qinnuteqartoq isumaqaruni pinngortitamut kingunissaanik naliliisoqartariaqanngitsoq, tamanna qinnuteqaammi aamma tunngavilersorneqassaaq. Taassumap saniatigut suliniut avatangiisinut annertuumik ajoqusiissasoq nalilernerqarpat, Naalakkersuisut qinnuteqaammik itigartitsisinnaanissaannut imaluunniit pinngortitap illersorneqarnissaa pillugu piumasaqaasiornissaannut periarfissinneqarput.

Taassumap saniatigut avatangiisinik, sumiiffimmillu eqqugaasumik iluarseeqqinnissamut pisinnaatitsissummik pigisaqartup aningaasatigut qularnaveeqqusiinissaanik piunasaqaasiortoqarsinnaassasoq siunnersuutigineqarpoq. Taamaalilluni pissutsit annertuumik allanngussappata, iluarseeqqinnissami naatsorsuutigisamik aningaasartuutissat matussuserneqarnissaat taassumap qulakkiissavaa.

Suliniut inuiaqatigiinnut, avatangiisitigut imaluunniit inuussutissarsiutinut tunngasunut annertuumik sunniuteqassasoq nalilerneqarpat, akuersissummik tunniussisoqartinnagu tamanut tusarniaanissamut siunnersuut aamma periarfissiivoq.

Ataatsimut isigalugu pinngortitamut, avatangiisinullu tunngasut aalajangiinissami tunngavissami ilaatinneqarnissaat allannguutit taakkua qulakkiissavaat.

3. Pisortanut aningaasaqarnikkut allaffissornikkullu kingunerisassat

3.1. Pisortanut aningaasaqarnikkut kingunerisassat

Immikkoortortaq ineriartortissallugu, sermillu erngullu niuerneramik tunngavilimmik atornissaanik siunertalimmik suliffeqarfiit pilersitsinissaat soqutiginarsarnerussallugu siunnersuutip siunertaraa. Taamaattumik akiliuteqartitsisarnikkut aningaasatigut isertitat amerlinissaanik siunnersuut kinguneqassangatinneqarpoq.

Taassuma saniatigut akileraarutitigut isertitatigut, matumani sulisitat akileraarutissaat aamma ingerlatseqatigiiffiit akileraarutissaat ilanngullugit, malitsigisaanik isertitaqartoqassasoq naatsorsuutigineqarpoq.

Qinnuteqaatit qassiussanersut, akuersissutillu qassit tunniunneqassanersut isertitassanut apequtaasussaammata, isertitassat qanoq amerlatigissanersut missiliorneqarsinnaangilaq.

Siunnersuut pisortanut aningaasartuuteqarnerunermik kinguneqassangatinneqangilaq.

Siunnersuutip § 24-atigut aalajangersarneqarpoq, pisinnaatitsissummik pigisaqartup sermimik, imermillu avammut tunisinerminut Namminersorlutik Oqartussanut akiliuteqarnissaa pillugu Naalakkersuisut akuersissummi piunasaqaatinik aalajangersaasinnaassasut. Sermip, erngullu avammut tunineqartup annertussusaat kiisalu nakkutilliinermi aningaasartuutit matussuserneqarnissaanut tunngaviumik akiliutissaasoq malilillugit akiliutissaq aalajangersarneqartassaaq. Taamaalilluni nunatsinni sermimik, imermillu nioqquteqarnissamut akiliuteqartitsisoqartassangilaq.

Taassumap saniatigut akiliutissap naatsorsorneqarnissaanut, annertussusilerneqarnissaanullu ersarinnerusunik malittarisassiuussisunik malittarisassanik aalajangersaasoqassasoq siunnersuutigineqarpoq. Matumani suliarinninnerup annertussusaa tunuliaqutaralugu akiliutit annertussusissaa assigiinngisitaarsinnaassasoq ilanngullugu.

Imerk avammut tunisinermi tunisassiornermut akitsuut ullumikkut literimut 0,04 koruuniusumut aalajangersarneqartuaannartoq aallaavigineqassasoq naatsorsuutigineqarpoq, kisiannili assigiinngisitaartillugu. Inaarutaasumik akiliutissaq akuersissummi aalajangersarneqassaaq, pilersaarullu tunuliaqutaralugu aalajangersarneqassalluni. Avammut tunisiniarnermi imeq, sermerlu piareersaqaarnagit avammut tunineqarnerinit sermimut, imermullu Kalaallit Nunaanni suliarineqaqaarsimasunut akikinnerusumik akiliuteqartitsisarluni, akiliutissat aalajangersarneqassasut naatsorsuutigineqarpoq. Najukkami suliarinnittarnerup siuarsarneqarnissaa, Kalaallit Nunaannilu suliffinnik aamma suliffeqarfinnik pilersitsinissaq tunngavissinneqarnissaa siunertaavoq. Taamaattumik pisinnaatitsissummik atuineq isertitaqarnerulernikkut kiisalu malitsigisaanik inuussutissarsiutinik ingerlatsinikkut aningaasatigut pitsaasumik kinguneqassasoq naatsorsuutigineqarpoq..

3.2. Pisortanut allaffissornikkut kingunerisassat

Siunnersuut allaffissornikkut annertuumik kinguneqassanganneqanngilaq. Suliassat marlunnut avinnagit, ataatsimut suliarineqartalissapput. Suliat suliarineqartarnerisa ataatsimoortinneqarnerat, taamaalillunilu qinnuteqaammik suliaqarneq piffissamik sivilisuumik atuiffiujunnaartussaassamat tamanna naatsorsuutigisamik oqilisaataassaaq.

Assersuutigalugu siunnersuutip kingunerisaanik, atuinissamut aamma uninnissamut pilersaarutit malitsigisaanik akuerineqassanngimmata, inatsit atuuttut malillugu marloriarluni tusarniaasoqarani ataasiaannarluni tusarniaasoqarsinnaassaaq. Tamanna naalakkersuisoqarfimmut, tusarniaaffigineqartartunullu allaffissornikkut oqilisaataassasoq naatsorsuutigineqarpoq.

Avammut tunisinissamut akuersissutit ukiut tamaasa nutarterneqartarnissaat piunasaqaatigineqassasoq siunnersuummi siunnersuutigineqarpoq. Tamanna assersuutigalugu aalisarnermut suliaasaqarfimmi nalinginnaasumik suleriaasioreerpoq. Tassunga tunngatillugu sulianik suliaqartarneq annertusissanganneqarpoq, annertuumiunngitsorli.

Suliffeqarfiit soqutiginninnerulernerisa kingunerisaanik suliat suliarineqartartut annertusineqassasut naatsorsuutigineqarpoq, tamannalu qinnuteqartut amerlinerinik kinguneqarsinnaalluni.

4. Inuussutissarsiortunut aningaasaqarnikkut allaffissornikkullu kingunerisassat

4.1. Aningaasaqarnikkut kingunerisassat

Siunnersuutip § 24-a malillugu pisinnaatitsissummik pigisaqartup akiliuteqarnissaanik piunasaqaasiortoqarsinnaassamat, siunnersuut suliffeqarfimmut sermimik, imermillu avammut tunisinissaminnik kissaateqartunut aningaasatigut kinguneqassanganneqarpoq.

Avammut tunisat annertussusaat kiisalu ukiumut tunngaviusumik akiliutissaq tunngavigalugit akiliutissaq aalajangersarneqartassaaq.

Qinnuteqartariaatsip allanngornissaanik siunnersuut allaffissornermut pisariillisaassangatinneqarpoq. Qinnuteqaasiariarluni, malitsigisaanik atuinissamut aamma uninnissamut pilersarusiorani siunnersuut malillugu, qinnuteqartup qinnuteqarnermini taakkua suliarisalissavai. Siunnersuut malillugu akuersissummik tunineqarniariarluni ingerlatassat aallartinneqarsinnaassammata, massakkutut pisinnaatitsissummik pigisaqartup atuinissamut akuersissummik tunineqareeruni atuinissamut aamma uninnissamut pilersaarutit akuersiteqqaartussaangimmagit, piaarnerusumik isertitaqartoqalersinnaavoq

4.2. Inuussutissarsiutit aaqqissuussaannerinut kingunerisassat

Sermip, ergullu atorneqarnerisa iluini suliffeqarfinnik pilersitsinissami pilerinartunik sinaakkuteqalersitsinikkut, unammilleqatigiinnermi atugassarititanut siunnersuut pitsaanerulersitsissasoq nalilerneqarpoq. Tamanna immikkoortortami unammilleqatigiinnerunermik, ineriartortitsinermillu kinguneqarsinnaavoq, soorluttaaq Kalaallit Nunaata sermimik, imermillu pilersuisutut nunat assigiinngitsut akornanni niuerfinni inissisimaneranut nukittorsaataasinnaasoq. Taamaalilluni siunnersuut nioqqutissiornermut, suliffissaqartitsiniarnermullu pitsaasumik kinguneqarsinnaavoq.

4.3. Allaffissornikkut kingunerisassat

Sermip, ergullu niuerneramik siunertanut atorneqarnerinut akuersissuteqarnissamik piunasaqaatip attatiinnarneqarnissaanik siunnersuut kinguneqarpoq, tamannalu qinnuteqartariaatsikkut, uppernarsaanissamillu piunasaqaateqarnikkut suliffeqarfiit allaffissornikkut suliassaqarnissaannik kinguneqassalluni. Ilutigisaanik sulianik suliaqartariaaseq akimmisaarfeerunnerussasoq naatsorsuutigineqarpoq, tamannalu piffissamik sivisuumik atuffiulluni marloqiusamik suleriaaseqarneq eqqarsaatigalugu suliffeqarfiit piffissamik atuinerinut sivikillisaataasinnaassalluni.

Qinnuteqaammut, oqartussallu akuersinissaannut inatsit atuuttoq malillugu piunasaqaataasut annertuutigut assigiinnartussaassammagit, ataatsimut allaffissornikkut suliassat annertuumik annertusissangatinneqanngillat. Kisianni taamaakkaluortoq paasissutissat manna tikillugornit siusinnerusukkut tunniunneqartassapput, qinnuteqaatillu imarisaanut ersarinnerusunik piunasaqaateqassalluni.

Avammut tunisinissamik akuersissutit ukiut tamaasa nutarterneqartassasut piunasaqaammik ilanngussisoqarpoq, tamannalu pisinnaatitsissummik pigisaqartup allaffissornerulernissaanik kinguneqassasoq naatsorsuutigineqarluni. Taamaakkaluortoq ukiut tamaasa nutarterinikkut, paasissutissat ataavartumik nutarterneqartarnissaat, avammullu tunisinermi aamma niuernerimi pissutsit allanngornerini eqaatsumik naleqqussaasarnissaq qulakkeerneqassaaq.

5. Avatangiisinut, pinngortitamut inuillu peqqissusaannut kingunerisassat

Siunnersuut avatangiisinut, pinngortitamut, inuillu peqqissusaannut toqqaannartumik, toqqaannanngikkaluartumillu kinguneqassangatinneqarpoq.

5.1. Naasut, uumasullu

Sermip, erngullu atorneqarnerat uumasut, naasullu pinngortitami najortagaannut akornusiisinnaavoq. Tamanna assersuutigalugu sumiiffinni pineqartuni erngup aqutigisaanik, kissassutsinillu allannguinerusinnaavoq, tamannalu pingaartumik pinngortitami ataqatigiinnermi eqqugaasinnaasuni uumasut amerlassusaannut, artillu siammasissusaannut sunniuteqarsinnaalluni. Taamaakkaluartoq atuineq sumiffimmut aalajangersimasunut killilersugaasussaammat, piffissamilu akuersissuteqarfiusumi pinngortitaq aamma avatangiisit eqqarsaatigineqartussaammata, siunnersuut uumasooqatigiinnut anginerusunut annertuumik sunniuteqassangatinneqanngilaq, matumani aamma akuersissutini ataasiakkaani piumasqaatinik aalajangersaanermi.

5.2. Nuna, immallu naqqa

Sermimik, imermillu pisuussutinik atuinissaq ukkatarineqarmat, toqqaannartumik ingerlatassanik nunamut annertuumik sunniuteqartussanik siunnersuut kinguneqassanngilaq. Taamaakkaluartoq suliniutit ilaat sanaartukkanik pilersitsiviusariaqarput, tamannalu pilersaarutitut inatsimmi malittarisassiuunneqarluni. Taamaalillunilu akuersissutit ilaat toqqaannanngitsumik nunamut, immallu naqqanut sunniuteqarsinnaassallutik. Sunniutit taakkua akuersissuteqariaatsimi, matumani aamma piumasqaatinik aalajangersaanermi eqqarsaatigineqartussaammata, killilimmik sunniuteqassasut nalilerneqarpoq.

5.3. Aniatitsinerit, qinngornerillu

Sermimik, imermillu atuinermut atatillugu ingerlatanit naatsorsuutigisamik aniatitsinissat killeqartorujussuussasut nalilerneqarpoq. Qinngornernik aniatitsisoqarniaviannngilaq, kisianni CO₂-mik aniatitsinikkut imaluunniit teknologiinit, maskiinaniillu pissarsinermi atorneqartunit gassinik silaannarmik kissakkiartortitsisartunik aniasoqarsinnaassalluni. Aniatitsinerit taakkua innuttaasut peqqissusaannut annertuumik kinguneqassangatinneqanngillat.

Akuersissummi piumasqaatinik aalajangersaanermi silap pissusaa, avatangiisillu eqqarsaatigineqarsinnaapput, matumani aamma nioqqutissiornermi CO₂-mik minnerpaamik aniatitsisoqarnissaanik piumasqaasiornikkut.

5.4. Nunap ilusaa

Sumiiffinni sermimik, imermillu atuiffiusuni attaveqaasersuutitigut naleqqussaanerit, ingerlatsinerillu malitsigisaannik nunap ilusaa allanngorsinnaavoq. Taamaakkaluartoq ingerlatat killiliussat iluini ingerlanneqartussaammata, allannguutit taakkua killeqassangatinneqarput.

5.5. Eqqagassalerineq

Nioqqutissiat sinnerinik imaluunniit nioqqutissiat perlukuinik eqqagassaalerumaartussat annikissangatinneqarput, taamaakkaluartorli eqqagassalerinermi malittarisast atuutissallutik.

5.6. Peqqissuseq, sulinermilu avatangiisit

Siunnersuutip kingunerisaanik innuttaasut peqqissusaannut kingunissanik

uppersarneqarsinnaasoqanngilaq.

Sermimik, imermillu atuinermi inunnut akuusunut sulinermi atugassarititaasuni tamanna pillugu malittarisassat nalinginnaasut atuuttussaammata, sulinermi avatangiisinut siunnersuut immikkut kingunissaqarsorineqanngilaq. Taamaakkaluartuq oqaatigineqassaaq, soorlu assersuutigalugu nakorsamik ikiorserneqarnissamut killilimmik periarfissaqarluni kiisalu atortut aamma maskinat ulorianarsinnaasut atorlugit avinngarusimasuni sulineq ingerlanneqarsinnammat.

Teknikkimut, isumannaallisaanermut, avatangiisinullu tunngasut kiisalu sermeq aamma imeq iluaqutissatut, illup iluani imaluunniit assigisaanik atorineqassatillugit imaluunniit atorineqartussaattillugit pitsaassutsimut aamma peqqissutsimut tunngasut akuersissummi piunasaqaasiorfigineqarsinnaapput.

5.7. Uumassusillit tappiorannartut, timitalimillu sunniuteqarnerat

Ingerlatat kingunerisaannik uumassusillit tappiorannartut, timitalimillu soorlu assersuutigalugu pujoralaat, nipiliornerit imaluunniit tipit sunniuteqarsinnaapput. Sunniutit taamak ittut killeqassasut nalilerneqarpoq, avatangiisinullu aalajangersakkat naapertorlugit iliuuseqarfigineqassallutik.

Teknikkimut, isumannaallisaanermut, avatangiisinullu tunngasunut aamma torersaanissamut, iluarseeqqinnissamullu piunasaqaatinik aalajangersaasoqarsinnaassaaq.

Ataatsimut isigalugu nalilerneqarpoq, siunnersuut avatangiisinut, pinngortitamut imaluunniit inuit peqqissusaannut annertuumik sunniuteqarnerlussanngitsoq, kisianni sunniuteqassappat taakkua minnerpaaffimmiinnissaat qulakkeerumallugu, pisariaqartumik piareersimasoqarlunilu nakkutilliisoqassaaq.

6. Inuit pisinnaatitaaffii, innuttaasunullu kingunerisassat

Sermimik, imermillu niuernermit siunertanut atuinissamut akuersissut aktianik piginneqatigiiffimmut imaluunniit piginneqataassuteqarluni ingerlatseqatigiiffimmut taamaallaat tunniunneqarsinnaassammat, siunnersuut innuttaasunut ataasiakkaanut aningaasaqarnikkut, allaffissornikkullu pingaarutilimmik toqqaannartumik sunniuteqassanngatinneqanngilaq.

Tunngaviusumik inatsisitigut, Inuttut piginnaatitaaffiit pillugit Europami naalagaaffiit isumaqatigiissutaanni imaluunniit nunat assigiinngitsut akornanni isumaqatigiissutitigut il.il. qulakkeerneqartutut innuttaasut pisinnaatitaaffiitut siunnersuut kingunissaqarsorineqanngilaq.

Illuaraqarfiup eqqaani akuersissuteqaraanni, assersuutigalugu sumiiffimmi ingerlatsinerulernikkut innuttaasunut eqqugaasunut tamanna sunniuteqarsinnaavoq. Taamaakkaluartoq inuussutissarsiutitigut taamatut ingerlatsinerit inatsit atuuttoq malillugu akuerisaareermata, tamanna innuttaasut inatsisitigut inissisimanerinit allannguissangatinneqanngilaq.

Innuttaasut inatsisitigut inissisimanerinit, matumani nammineq pigisaannut iserneq imaluunniit maalaaruteqarnissamut periarfissaasa allanngorneri ilanngullugit, akuliunnissamik siunnersuut kinguneqassanngilaq. Ilutigalugu inooqatigiinnermut, matumani nunasittarnerup pissusia, imaluunniit innuttaasut inuunermi atugaat ilanngullugit, siunnersuut aamma annertuumik kinguneqassangatinneqanngilaq.

Suliffissatigut periarfissaqarnerulernikkut siunnersuut innuttaasunut malitsigisaanik pitsaasumik kinguneqassangatinneqarpoq. Kalaallit, nunaniillu allanit sulisut qanoq agguataarsimassanersut, suliniutitit pilersaarummi ilaatigut paasissutissiissutigineqassaaq.

7. Nunanut allanut attaveqaatinut aamma nunap immikkoortortaani politikkinut kiisalu allatigut kkingunerisassat t

Kalaallit Nunaata nunanut allanut attaveqarneranut imaluunniit nunat assigiinngitsut akornanni pisussaaffinnut siunnersuut kinguneqassangatinneqanngilaq.

8. Oqartussat kattuffiillu il.il. tusarniaaffiginerat

Siunnersuut piffissami 20. juni 2025-mit, 15. august 2025-mut www.naalackersuisut.gl-imi tusarniaavimmi tamanut tusarniutigineqarpoq, piffissamilu tassani tusarniaaffigisassanut tusarniutigineqarluni. Tusarniaaneq pillugu, tusarniaanermullu akissutinit tiguneqartunut ilanngussaq 1 innersuussutigineqarpoq.

Siunnersuummi aalajangersakkanut ataasiakkaanut nassuiaatit*Til § 1-imut*

Imm. 1-imut.

Aalajangersagassatut siunnersuutigineqartup, sermip erngullu niuerneramik siunertaqartumik atorineqarnissaannut malittarisassiuussilluni Inatsisartut inatsisaata pingaarnertut atuuffissaa aalajangersarpaa. Siunnersuummi pingaarnertut niuernissamik siunertaqartumik sermimik aamma imermik misissueqqaarnerit, atuinerillu kiisalu niuerneramik tunngavilimmik Kalaallit Nunaata avataanut tunisassiornissat pineqarput.

Imm. 2-mut.

Erngup nukinganik imaluunniit nukimmik pilersitsinissamut sermimik, imermillu misissueqqaarnertut, atuinerinullu Inatsisartut inatsissat atuutinngitsoq aalajangersakkap ersarissarpaa. Misissueqqaarnerit, nukimmillu pilersitsinissanut erngup nukinganik atuinerit kiisalu tassunga atatillugu ingerlatat allat Erngup nukingata nukissiornermut atorineqartarnera pillugu Inatsisartut inatsisaanni malittarisassiuunneqarput.

Imm. 2-mi atuutsitsinnginneq taamaallaat sermimut, imermullu erngup nukingata innaallagissiornermut atorineqartunut tunngavoq. Taamaakkaluartoq siunnersuutigineqarpoq, erngup nukinganik nukissiorfinnit, allatigullu nukimmik pilersitsivimmit niuerneramik siunertaqartumik imermik sinneruttumik atuinerit inatsimmut ilaatinneqassasut. Taamaallilluni sermeq, imerlu erngup nukinganut allatigullu nukimmik pilersitsivimmi atorineqarsimallutik atorineqartut inatsimmut ilaatinneqarput, matumani niuerneramik siunertanut atorineqarnissaannut akuerissuteqarnissamik piumasaqaat ilanngullugu.

Imm. 3-mut

Kalaallit Nunaanni pisortat imermik pilersuinissaat siunertaalluni sermimik, imermillu atuinerit aalajangersagaq manna atuutinngilaq. Taassumap saniatigut imeq sinneruttoq, pisortat pilersuineramik ingerlatsiviisa atorsinnaasaat aalajangersakkami ilaatinneqanngilaq.

Sermeq, imerlu pilersuinerimi ingerlatsiviisa pilersuinissaq siunertaralugu atorsinnaasaat, Inatsisartut inatsisaannut imaalluunniit Inatsisartut inatsisaanni matumani akuersissuteqarnissamik piumasaqaataasumut ilaatinneqanngitsoq aalajangersakkap ersarissarpaa.

Taamaakkaluartoq siornatigut inatsit malillugu imermik sinneruttumik niuerneramik tunngavilimmik atuinnissamut akuersissutinut tunniuteriikkanut, Inatsisartut inatsisaat suli atuutissaaq.

§ 2-mut

Nr. 1

Oqaaseq ” Avammut tunisineq” ima paasineqassaaq, Kalaallit Nunaannit nunanut allanut sermimik imaluunniit imermik tunisineq, annissinerlu. Avammut tunisinermi Kalaallit Nunaanni pisuussummik tunisineq, annissinerlu pineqartut nassuiaatip ersarissarpaa.

Nr. 2

”Avammut tunisinissamut akuersissut” tassaavoq, misissueqqaarnissamut akuersissummut imaluunniit atuinissamut akuersissummut ilaalluni sermimik, imermillu avammut tunisisinnaanermut akuersissut, akuersissullu pineqartoq malillugu sermimik, imermillu avammut tunisisinnaatitsisoq. .

Nr. 3

” Misissueqqaarnerit” tassaavoq, pisuussut niuerneramik siunertaqartumik qanoq, qanorlu annertutigisumik atorsinnaanersoq nalilerneqarnissaa siunertaralugu misissuinermik ingerlatat. Sumiiffimmi killilikkami atuisinnaanertaqanngitsumik, pisuussummik atuisinnaanermut periarfissanik qulaajaanissanut tamanna ersarissaavoq.

Assersuutigalugu imip pitsaassusaa, annertussusaalu nalilerumallugit imermik misissueqqaarnerusinnaavoq, sermip sanna qanorlu innera paasiumallugit nunamik, nunallu sannaanik misissuinerusinnaavoq, eqqaani avatangiisit sunnerneqarsinnaanerat nalilerumallugu avatangiisinik misissuinerusinnaavoq, aqutaasinnaasullu aamma attaveqaasersuutigut pisariaqartitat pilersaarusiorniarlugit misissuinerusinnaalluni.

Nr. 4

” Misissueqqaarnissamut akuersissut” tassaavoq, § 4, imm. 1 malillugu akuersissut tunniuneqartoq malillugu sermimik, imermillu misissueqqaarnissamut akuersissut.

Nr. 5

Sermeq aamma imeq suminngaanneersut Inatsisartut inatsisaannut ilaatinneqarnersut, matumani pisuussutit suut niuerneramik siunertalimmik atornissaannut akuersissuteqarfigineqarsinnaanersut nassuiaammi nassuiarneqarpoq.

” Sermeq, imerlu”-mi Kalaallit Nunaanni nunamit aamma imaanit sermeq imaluunniit imeq, matumani ilanngullugit sermersuarmit imeq, sermersuaq, tatsinit kuunniillu imeq tarajuunngitsoq pineqarput. Allattukkat tamakkiisuunngillat.

Nukimmik pilersuivimmit imeq sinneruttoq killiliinermut aamma ilaavoq.

Taamaattoq pisortat pilersuinerinit imeq, soorlu assersuutigalugu kalaanimit imeq killiliinermi ilaatinneqanngilaq.

Nr. 6

” Niuerneramik siunertat” tassaavoq, ingerlatat sunaluunniit aningaasatigut

iluanaaruteqarnissamik, matumani aamma tunisinissamik siunertaqartut suulluunniit.

Taamaalilluni assersuutigalugu ilisimatusarnermik ingerlatanut imaluunniit ingerlatanut

allanut niuernissamik siunertaqanngitsunut, soorlu assersuutigalugu tunisinertaqanngitsumik sermimik, imermillu nammineq atuinerit nassuiaammi ilaatinneqanngillat.

Nr. 7

”Suliniut” tassaavoq, kissaatigisatut siunertarisamut sermimik aamma imermik misissuinissamut, aallernissamut, pissarsinissamut, piareersarnissaanut imaluunniit atornissaanut qinnuteqartup ingerlatassatut kissaatigisai tamarmiusut. Tassani qinnuteqartup piviusumik, atasumillu ingerlatassai kiisalu suliniummut qinnuteqartup angunigai, pingaarnertullu siunertai pineqarput. Assersuutigalugu pisuusummik atuisinnaanermut periarfissanik misissuinerit, sermimik aamma imermik pissarsineq, pisuussutinik teknikkikkut suliaqarneq imaluunniit niuernermik siunertamut atuineq pineqarsinnaapput.

Nr. 8

”Pisuussut” tassaavoq, sermeq imaluunniit imeq, matumani sumiiffik imaluunniit puilasooq pineqartoq akuersissut naapertorlugu atornerqarsinnaasoq imaluunniit atugassatut qinnutigineqartoq ilanngullugu. ”Pisuussut” pinngortitami pisuussummut atornerqarusuttumut tunngasoq, nassuiaatip erseqqissarpaa.

Nr. 9

”Pisinnaatitsissummik pigisaqartoq” tassaavoq, inuk inatsisitigut pisinnaatitaasoq, Inatsisartut inatsisaat manna malillugu akuersissummik tunineqartoq, taassumallu kingunerisaanik tassunga atatillugu pisinnaatitaaffeqartoq aamma pisussaaffeqartoq, matumani akuersissummi piumasaqaataasut malinneqarnissaannut akisussaaffeqartoq.

Inatsisartut inatsisaanni § 11-mut, pisinnaatitsissummik pigisaqartup ingerlatseqatigiiffiata ilusaanut aamma nalunaarsukkamik angerlarsimaffianut piumasaqaasiortumut aalajangersagaq innersuussivoq.

Nr. 10

”Atuineq” tassaavoq, pisuussutip pinngorfianit peerlugu, matumani aamma katersorlugu, iluaqutigalugu, suliaralugu imaluunniit allatigut atorlugu ingerlataq sunaluunniit. Nassuiaat siammasissumik paasineqassaaq, sermillu aamma erngup peernerinik kinguneqartumik iliuitsinut tamanut atuulluni. Pisinnaatitsissummik pigisaqartup kingorna pisuusummik tunisinersooq nassuiaammut ”atuinermi” apeqqutaanngilaq. Taamaattoq atuineq imak paasineqassaaq, piffissaq pisuussutip tiguneqarfia, soorlu assersuutigalugu sermeq katersorneqarpat imaluunniit imeq ruujorikkoortillugu katersorneqarpat.

Nr. 11

” Atuinnermi ingerlatat” tassaavoq, § 4 malillugu atuinnissamut akuersissutitigut imaluunniit ingerlatassatut qinnutigineqarlutik ingerlatat, ingerlatassatut akuersissuteqarfiusut. Taamaallilluni atuinnissamut ingerlatat, killiliussami pineqarput.

Nr. 12

”Aallartinnissamut piffissaliussaq” tassaavoq, Inatsisartut inatsisaat malillugu akuersissut naapertorlugu ingerlatassatut akuerisat aallartinneqarsimanissaannut ulloq kingusinnerpaaq, tak. § 21.

Nr. 13

” Atuinissamut akuersissut” tassaavoq, § 4, imm. 1 malillugu tunniunneqarluni niuerneramik siunertaqartumik sermimik, imermillu atuinnissamut akuersissut. Pisuussummik niuerneramik siunertalimmik atuinnissamut periarfissiilluni atuinnissamut akuersissut, misissueqqaarnissamut akuersissummit immikkoortoq killiliussap ersarissarpaa.

§ 3-mut

Imm. 1-imut.

Aalajangersakkap aalajangersarpaa, Inatsisartut inatsisaat malillugu akuersissummik tunniussisoqarsimatillugu sermeq, imerlu niuerneramik siunertanut taamaallaat atorneqarsinnaasut, avammullu tunineqarlutik. Ilutigisaanik aalajangersakkatigut piunasaqaataavoq, Inatsisartut inatsisaata aalajangersagai aamma Inatsisartut inatsisaat naapertorlugu piunasaqaataatit akuersissummik aalajangersarneqartut naapertorlugit atuineq pissasoq.

Imm. 2-mut.

Aalajangersakkap Naalakkersuisut pisinnaatippai, Inatsisartut inatsisaat malillugu akuersissuteqarnissamik piunasaqaatitaqanngitsumik imermut, sermersuaqarfinnullu tunngasunik misissueqqaarnissamut aammalu nalunaarsuiffiusunik ilisimatuussutsikkut suliassatigullu misissuisinnaassasut.

Inatsisartut inatsisaanni § 31 malillugu akuersissutinik tunniussinissami neqeroortitsinissaq sioqqullugu tamanna naleqqussinnavoq.

§ 4-mut

Imm. 1-imut.

Inatsisartut inatsisaat malillugu akuersissutit suut tunniunneqarsinnaanerinit sinaakkutit aalajangersakkap aalajangersarpai. Tassunga tunngatillugu aalajangersakkap aalajangersarpaa, sumiiffimmut erseqqinnerusumik killilersorneqartumut, pisinnaatitsissummillu pigisaqartup

piumasaqaatit malitassai akuersissummi allassimallutik erseqqinnerusumik aalajangersarneqartut malillugit akuersissut tunniunneqassasoq.

Aalajangersagaq malillugu misissueqqaarnissamut akuersissutinik aamma atuinissamut akuersissutinik Naalakkersuisut tunniussisinnaapput.

Atuinivinnissaq aallartinnagu pisuussutip ilimanassusaannik misissuinissamut misissueqqaarnissamut akuersissutit periarfissiisarput. Misissueqqaarnissamut akuersissutit annertussusaat, § 5-imi ersarinnerusumik malittarisassiuunneqarput.

Atuinissamik akuersissutit, pisuussutip niuernermik siunertaqartumik atornissaanut akuersissuteqartitsivoq. Atuinissamut akuersissutit annertussusaat, § 6-imi ersarinnerusumik malittarisassiuunneqarput.

Inatsisartut inatsisaata kapitali 6-ia akuersissutinut piumasaqaataasunik ersarinnerusumik malittarisassiuussivoq, matumani sumiiffiup akuersissuteqarfiup § 19-imi killilersorneqarnera ilanngullugu. Piumasaqaatit taakkua akuersissummi aamma aalajangersarneqarsinnaapput. Taassumap saniatigut Naalakkersuisut akuersissummi piumasaqaatinik annerusunik aalajangersaanissaminnut § 28-mi piginnaatinneqarput. Tassani akuersissutinut piumasaqaatit ersarinnerusumik misissorusussagaanni, tassunga tunngatillugu nassuiaatit innersuussutigineqarput.

Misissueqqaarnissamut akuersissutit aamma atuinissamut akuersissutit aallaavittut avammut tunisinissamut akuersissutitaqanngillat. Taakkua kapitali 4-mi aalajangersakkat malillugit tunniunneqartarput. Tamanna ersarinnerusumik misissorusussagaanni, tassunga tunngatillugu nassuiaatit innersuussutigineqarput.

Imm. 2-mut.

Inatsisartut inatsisaat malillugu akuersissutit sermimut, imermullu immikkut tunniunneqarsinnaasut aalajangersakka ersarissarpai. Sumiiffimmit aalajangersimasumit sermimik, imermillu atuinissaminut qinnuteqartoq akuersissummik tunineqarsinnaavoq. Sermimik imaluunniit imermik atuinissamut qinnuteqartoq akuersissummik aamma tunineqarsinnaavoq.

Pisuussut suna atussallugu kissaatigineqarnersoq apeqqutaatillugu avatangiisitigut, niuernermillu assigiinngitsunik eqqarsaatiginnittoqarsinnaammat, qinnuteqartup pisuussummik atuinissaminik toqqaanera atuinissami piumasaqaasiornissamut aalajangiisuvoq.

Imm. 3-mut.

Imm. 1 malillugu akuersissutit, misissueqqaarnissamut aamma atuinissamut akuersissutit akuersissutit ataatitut tunnunneqartarnissaat aallaaviuvoq. Taamaalilluni atuinissamut akuersissut misissueqqaarnissamut akuersissuteqartuaannarpoq. Tamanna

pisinnaatitsissummik pigisaqartup atuinissaminik ingerlatsinissaminut pilersaarusiornissaminut kiisalu misissueqqaarnissamut akuersissummik, atuinissamullu akuersissummik immikkut qinnuteqaqqaarani akuersissutinik allanik pissarsinissaminut, uppersaatinik katersinissaminut atugassaminik misissueqqaarnissaanut periarfissiilluni.

Taamaakkaluartuq atuinissamut ammaassinngitsumik immikkut misissueqqaarnissamut akuersissummik tunniussisoqarsinnaavoq. Tamanna pisuussut niuernermit atorpeqarsinnaanersoq sulii paasineqarsimatinnagu imaluunniit nalornisoqartillugu naleqquppoq. Assersuutigalugu erngup pitsaassusaa imigassatut naleqqunnersoq iluamik paasineqarsimatinnagu, pilersaarummullu kissaatigisamut tunngaviuppat. Misissueqqaarnermit akuersissuteqarnikkut, sumiiffimmut aalajangersimasumut atuinissamut akuersissummik qinnuteqartoqassanersoq isummerfigineqartinnagu, qinnuteqartup pisariaqartumik misissuisinnaanissaanut tamanna qulakkeerivoq.

Ataatsimut akuersissummum atattillugu misissueqqaartoqarnissaanik, Inatsisartut inatsisaanni erseqqissumik piumasqaasiortoqanngilaq. Misissueqqaarnissaq pisariaqartinneqassanngippat, akuersissutillu allat pisariaqartut pigigaanni, tassungalu piumasqaataasut allat naammassisimagaanni atuneq aallartinneqarsinnaavoq. Tassani assersuutigalugu misissueqqaarnissamut immikkut akuersissuteqarluni siornatigut misissueqqaartoqarsimatilluguusinnaavoq. Atuinissamilli akuersissut piumasqaatilik pineqartillugu tamanna atuutinngilaq. Tamanna pillugu § 16 nassuiaatit innersuussutigineqarput.

Imm. 4-mut.

Misissueqqaarnissamut akuersissutinut aamma atuinissamut akuersissutinut Naalakkersuisut malittarisassanik ersarinnerusunik aalajangersaasinnaanissaannut aalajangersakkap inatsisitigut tunngavissaqartippai.

Qinnuteqartariaatsinut, qinnuteqaatinik suliaqartarnermit kiisalu akuersissutit malinneqarnerisut nakkutilliinnissamut inatsisitigut tunngavissaqarnermi ilaatigut periarfissiissutigineqarpoq. Uani assersuutigalugu soorlu ingerlataq qaqugukkut akuersissuteqassanersoq, qaqugukkut akuersissuteqartoqassanersoq, nakkutilliinerlu qanoq ingerlanneqassanersoq.

Qinnuteqaatip misissornissaani pingaaruteqarlutik inuiaqatigiinni piujuartitsinissap (VSB) naliliiffigineqarnissaa imaluunniit assingusumik naliliinerit pillugit piumasqaatinik aalajangersaanissamut periarfissaqarneq inatsisitigut tunngavissaqarnermi aamma ilaavoq.

§ 5-imut

Imm. 1-imut.

Atuinissamik ingerlatsinissaq aallartinneqartinnagu imaluunniit atuinissamut akuersissummik qinnuteqartoqartinnagu sermimik, imermillu niuernermit siunertaqartumik atuinissami

pisinnaatitsissummik pigisaqartoq teknikkikkut, aningaasatigut, avatangiisitigullu periarfissanik misissueqqaarnissamut periarfissillugu, misissueqqaarnissamut akuersissutinut sinaakkutissat aalajangersakkap aalajangersarpai.

Ingerlatsinerit pingaarnerit misissueqqaarnissamut akuersissummi ilaatinneqartut nr. 1-imit 3-mut nassuaatigineqarput:

Nr. 1

Misissuinissaq siunertaralugu sermimik, imermillu annertussutsimik taasamik pissarsinissaq imaluunniit katersinissaq, soorlu assersuutigalugu piareersaanissaq, misiligummik nioqqutissiorinissaq, najoqqutassiamillu misiliinissaq aalajangersakkap pisinnaatippaa. Assersuutigalugu sermeq aatsitassatut katersorneqarsinnaavoq, imigassatullu puujaasanut misiligummik maqitsisoqarsinnaalluni.

Ingerlatsinerit misissueqqaarnermut atatillugu pisarmata, nalinnaasumik annikitsuinnaassaput.

Immikku ittumik misissueqqaarnissamik akuersissummik tunniussisooqassappat, misissueqqaarnissamik akuersissut atuinissamik akuersissutaanngimmat misissueqqaarnissami annertuussusissaq, siunertarlu Naalackersuisut eqqumaffigissavaat. Qinnuteqartoq annertuumik atuinissaminik qinnuteqarpat, tamanna ingerlatsineq atuinertaqartoq takussutaasinnaavoq. Taamatut pisoqartillugu malittarisassat unioqqutinneqannginnissaat pillugu atuinissamut akuersissuteqartoqartariaqannginnersoq nalilerneqartariaqarpoq.

Nr. 2

Pisuussutip ilisimanassusaanik naliliinissaq siunertaralugu teknikkikkut, imermik, serminillu misissuinissaq aamma misissueqqissaarnissaq aalajangersakkami pineqarput. Uani soorlu sermip aamma erngup pitsaassusaata, katitigaanerisa, tikikkuminassusaasa, annertussusaasalu naliliiffigineqarnissaat ilanngullugu.

Assersuutigalugu imip pitsaassusaa misissoqqissaarumallugu, matumani mingutsitsissutaasinnaasut soorlu uumasuaqqat isaannarmik takuneqarsinnaanngitsut imaluunniit partikkilit ilanngullugit, qillerinikkut sermimik imaluunniit imermik misissugassamik tiguserusinnaapput.

Pilersaarutip suunera apeqqutaatillugu, soorlu assersuutigalugu sumiiffiup iluaqutigineqarsinnaasup tikikkuminassusaa imaluunniit allanngujuissusaa nalilerumallugu, nunap qanoq inneranik misissuissalluni aamma naleqqussinnaavoq.

Nr. 3

Nr. 1-imi aamma 2-mi allattorsimasut tamakkiisuunngitsut nr. 3-mik ersarissarneqarpoq. Ingerlatat imaluunniit misissuinerit nr. 1-imi aamma nr. 2-mi pineqanngitsut, pisuussutilli niuernermi atornissaata pilersaarusiornissaanut, nalilernerqarnissaanullu pisariaqartut ingerlanneqarnissaannut aalajangersagaq periarfissiivoq.

Assersuutigalugu aalaakkaassuseq, pisuussummillu ataavartumik atuisinnaanissaq nalilerimallugit sermip nikittarnerata imaluunniit silap pissusaata sunniutaasa nakkutigineqarnissaat pineqarsinnaavoq.

Oqartussat allat akuersinissaannut atugassanik atortussanik suliaqarnissamut misissuinerusariaqarsinnaasut aalajangersakkami pineqarsinnaapput. Pisut ilaanni assersuutigalugu pilersaarutit ilaat avatangiisinut sunniutigisinnaasaanik nalilersuinissamik piunasaqaammut ilaasinnaasarput.

Imm. 2-mut.

Misissueqqaarnissamut ingerlatassat akuerisaasut misissueqqaarnissamut akuersissummi aalajangersarneqassasut aalajangersakkap aalajangersarpaa. Suliniutip qanoq ittuuneranut, pisariaqartitanullu akuersissutip naleqqussarneqarsinnaanissaanut tamanna periarfissiivoq. Assersuutigalugu misiligutissat imeq qanoq annertutigisoq tiguneqarsinnaassasoq misissueqqaarnissamut akuersissutip ersarissarsinnaavaa.

Imm. 3-mut.

Misissueqqaarnissamut akuersissut malillugu ingerlatat suut ingerlanneqarsinnaanerinit Naalakkersuisut ersarinnerusunik malittarisassiorsinnaanissaannut aajangersakkap piginnaatippai.

Assersuutigalugu sermeq, imerlu misiligutissat qanoq annertutigisut tiguneqarsinnaanerinit imaluunniit misissuinerit suut akuerisaanerinik malittarisassat killissanik aalajangersaasinnaapput.

§ 6-imut

Imm. 1-imut.

Sermimik, imermillu niuerneramik siunertaqartumik atuinissamut akuersissut sunik imaqarsinnaaneranut sinaakkutit, § 6-imi aalajangersakkap aalajangersarpai. § 4, imm. 1 malillugu atuinissamut akuersissutip ataani ingerlatat suut akuersineqarsinnaanersut aalajangersakkat nassuiarpaa. Imaanngilaq ingerlatat allattorsimasut tamarmik atuinissamut akuersissummi pinngitsooratik ingerlanneqartussat imaluunniit akuerisatut ingerlanneqassasut. Pissutsit, suliniutissatullu qinnutigineqartoq apeqqutaatillugit, ingerlatat suut atuinissamut akuersissummi ilaatinneqassanersut naliliinermik tunngaveqassaaq.

Nr. 1

Sermimik, imermillu katersinissamut, pissarsinissamut, piareersaanissamullu akuersissummik tunniussisoqarsinnaavoq. Sermeq, imerlu niuernermut atornissaannut piukkunnarsarumallugit isumalluutinik pissarsinermi, pisariaqartumik suliarinissaanut aamma piareersarnissaanut ingerlatat ilanngullugit pineqarput.

Assersuutigalugu imermut imigassamut imaluunniit suliffeqarfissuarmi atornissaanut piunarsaatit naammassineqarnissaat siunertaralugu imermik pissarsineq, saliinerlu ilaatinneqarsinnaapput.

Nr. 2

Sermip, erngullu pisinnaatitsissummik akuersissummik pigisaqartup atornissaanut akuersissummik pissarsissutigisimasaata tuninissaannut akuersissummik tunniussisoqarsinnaavoq. Uani atuisunut toqqaannartumik tunisinerit kiisalu suliffeqarfinnut imaluunniit niuernermik ingerlatsisunut allanut tunisinerit ilaatinneqarput.

Tunisineq, pingaartumik iluaqutissatut atornerqarnera pillugu akuersissummi immikkut piunarsaatit aalajangersaasoqarsinnaavoq. Tamanna pillugu § 28-mut nassuiaatit takukkit.

Nr. 3

Kalaallit Nunaanni sermimik, imermillu nassiussuinissamut aamma assartuinissamut akuersissummik tunniussisoqarsinnaavoq. Uani pissarsiffimmit aamma piareersarfimmit atuisunut assigiinngitsunut assartuineq ilaatinneqarpoq, uanilu suliniutip angisussaa, pisariaqartitailu apeqquaatillugit nunap iluani aamma avataani assartueriaatsit pineqarsinnaallutik.

Assartuinissaq, matumani isumannaallisaaneq, nassiussalerineq, avatangiisitigullu eqqarsaatigisassat pillugit Naalakkersuisut piunarsaatit aalajangersaasinnaapput. Tamanna pillugu § 28-mut nassuiaatit takukkit.

Atuinissamut akuersissut tunuliaqutaralugu sermimik, imermillu avammut tunisineq, avammut tunisinissamut immikkut akuersissuteqartariaqarput. Tamanna pillugu § 10-mut nassuiaatit innersuussutigineqarput.

Nr. 4

Aalajangersakkap uumap, siuliani immikkoortuni ersarinnerusumik nassuiarsimanngisatut sermip, erngullu niuernermik tunngavilinnut allatut atorsinnaatippai. Pisuussutip suliffeqarfinni, nunalerinermi imaluunniit nutaaliorluni niuernermut atornerqarsinnaanissaat pineqarsinnaavoq.

Imm. 2-mut.

Atuinissami ingerlatat aalajangersimasut akuerisaasut, atuinissamut akuersissummi pineqartumi aalajangersarneqassasut aalajangersakkap erseqqissarpaa. Taamaalilluni pissutsinut, piunarsaatinullu suliniummumut qinnutigineqartumut atuuttunut, akuersissut naleqqussarneqarsinnaavoq.

Imm. 3-mut.

Misissueqqaarnissamut akuersissut malillugu ingerlatat suut ingelanneqarsinnaanerinit, Naalakkersuisut ersarinnerusunik malittarisassiorsinnaanissaannut aalajangersakkap piginnaatippai. Tassunga atatillugu ingerlatanik aalajangersimasunik aamma inerteqquteqartoqarsinnaassaaq. Taamaalilluni ingerlatanut sunut atuinissamut akuersissuteqartoqarsinnaaneranut killissanik aalajangersaanissaannut Naalakkersuisut pisinnaatinneqarput,

§ 7-imut

Inatsisartut inatsisaat manna malillugu akuersissutitut tunniunneqartunut pisinnaatitsissummik pigisaqartut imaluunniit allat Inatsisartut inatsisaanni matumani pineqartut, inatsisit allat malillugit akuersissutit pisariaqartunik pissarsinissaannut pisussaajunnaarsinneqanngitsut aalajangersakkap ersarissarpaa. Assersuutigalugu illuliortiternissamut, sanaartornissamullu suliniutinut ataasiakkaanut nunaminertamik atugassiissutit pissarsisoqarnissaa pisariaqarsinnaavoq.

Taassumap saniatigut illuliortiternissamik, sanaartornissamilu annerusunik suliassani Naalakkersuisut akuersissuteqarnissaat kiisalu Avatangiisit illersorneqarnissaat pillugu Inatsisartut inatsisaat naapertorlugu avatangiisinut sunniutissaasa naliliiffigineqqaarnissaat (VVM) piumasaqaataasinnaavoq.

Inatsisartut inatsisaat manna malillugu atuinissamut akuersissummik tunniussisoqartinnagu suliniutip ingelanneqarnissaanut akuersissutit allat pisariaqartut qinnutigineqarsimanissaat imaluunniit pigineqarnissaat pillugu erseqqissummik piumasaqaateqanngilaq. Taamaakkaluartoq aallartinnissamut piffissaliussaq pillugu § 21-mi nassuiaatit innersuussutigineqarput. Kisianni suliniutip ingelanneqarnissaanut pisariaqartumik akuersissummik tunniussisoqassanngitsoq oqartussap paasissutissiissutigippagu, siunnersuut malillugu atuinissamut akuersissummik tunniussisoqarsinnaassanngilaq, taamaattoqassappat suliniut teknikkikkut ingelanneqarsinnaassanngitsoq isigineqarsinnaassammat, tak. siunnersuutip § 15-iani piumasaqaat.

§ 8-mut

Imm. 1-imut.

Pissutsit pineqartut, suliniutillu pivisunngortinneqarnissaanut pisariaqartitat apeqqutaatillugit, § 4 naapertorlugu atuinissamut akuersissut kisermaassisussaatitaaffilerlugu imaluunniit kisermaassisussaatitaaffilernagu tunniunneqarsinnaanissaanut aalajangersagaq periarfissiivoq.

Kisernaassisussaatitaaffilerlugu atuneq tassaavoq, sumiiffimmi kisernaassisussaatitaaffiusumi sermimik, imermillu niuerneramik siunertalimmik kisernaassilluni atuinissamut kisernaassineq.

Kisernaassinerup kingunerisaanik, inatsit malillugu sumiiffimmut kisermanneqartumut misissueqqaarnissamut akuersissutinik imaluunniit atuinissamut akuersissutinik pisinnaatitsissummik pigisaqartunut allanut tunniussisoqarsinnaangilaq. Taamaattoq kisernaassinissamik akuersissummik tunisisoqangippat sumiiffimmut tassunga pisinnaatitsissummik pigisaqartunut arlalinnut misissueqqaarnissamut, atuinissamullu akuersissutinik tunniussisoqarsinnaassaaq.

Sumiiffimmut ataatsimut pisinnaatitsissummik pigisaqartunut arlalinnut atuisinnaanermik akuersissummik tunniussisoqassappat, pisinnaatitsissummik pigisaqartup pisinnaatitaaffiinik tamanna annikillisitsinnginnerisoq Naalackersuisut eqqumaffigisariaqarpat.

§ 4 naapertorlugu atuinissamut akuersissummum tamarmut kisernaassisussaatitaaneq tunniunneqassaaq, imaappoq ataatsimoortumik akuersissummik tunniussisoqartillugu misissueqqaarnissamut akuersissummum aamma atuinissamut akuersissummum Aalajangersagaq § 9-mut innersuussivoq, taassumallu kingorna § 4, imm. 3 malillugu immikkut ittumik misissueqqaarnissamut akuersissummik kisernaassisussaatitaaffilerlugu tunniunneqarsinnaassanani

Imm. 2-mut.

Sumiiffimmut sermimik imaluunniit imermik atuiiffissatut akuersissuteqarfigineqarsimasumut tamarmut imaluunniit ilaanut kisernaassisussaatitaaneq tunniunneqassasoq aalajangersakkap ersarissarpaa.

Atuinissamut akuersissutip sumiiffiata iluani taamaallaat kisernaassisussaatitaaffilerlugu akuersissummik tunniussisoqarsinnaavoq. § 19-imut nassuiaatit innersuussutigineqarput.

Kisernaassisussaatitaaneq sumiiffimmut killilersukkamut attuumassuteqarmat, pisinnaatitsissummik pigisaqartut allat pisuusummum pineqartumut kisernaassisussaatitaaffilerlugu imaluunniit kisernaassisussaatitaaffilernagu akuersissummik pissarsisinnaanissaat aalajangersakkap mattutinngilaa. Assersuutigalugu taserujussuaq imaluunniit kuussuaq. Nunatami angisuumi atuinissamut periarfissagissaartumi pisuusummi atorneqarsinnaasut assigiinngitsut atornissaannik ingerlatsisut arlaqartut kissaateqartillugit, tamanna pingaaruteqarsinnaavoq. Pisinnaatitsissummik pigisaqartumut pisuusummik tamakkerlugu atuisinnaangitsumut ataasiinnarmut atuinissamut akuersissummik tunniussisoqarsinnaanissaa pinngitsoortinniarlugu, nunaminertamik inniminniisinnaaneq uani eqqarsaatigineqarpoq.

Imm. 3-mut.

Sermimik, imermillu atuinissamut qaqugukkut kisernaassisussaatitaaffilerlugu akuersissummik tunniussisoqarsinnaaneranut imm. 3 pingaarnertut piumasaqaasiivoq.

Teknikkimut tunngasut, inuiaqatigiillu soqutigisaat, pijuartitsisussamik atuinissaq, imaluunniit suliniutip naleqquttumik ingerlanneqarsinnaassanngikkaluartup piviusunngortinneqarnissaanut pisariaqartillugu kismaassisussaatitaaneq taamaallaat tunniunneqarsinnaasoq aalajangersakkap ersarissarpaa. Taamaalilluni kismaassisussaatitaaneq immi inatsisitigut piumasaqaataanilu aallaaviunngilaq, kisianni pisuussut iluatsittumik atorsinnaaqullugu kismaassisussaatitaanermik tunniussinissamut pissuteqarsinnaavoq.

Kismaassisussaatitaaffilerlugu imaluunniit kismaassisussaatitaaffilernagu akuersissummik tunniussisoqassanersoq Naalakkersuisut naliligassaraaq. Tamatumani qinnuteqaatit ataasiakkaat, suliniutillu qanoq issusii tunngavigalugit naliisoqartassaaq. Qinnuteqartoq kismaassinissaminik qinnuteqarsimatinnagu, nalinginnaasumik kismaassisussaatitaaffilerlugu akuersissummik tunniussisoqartassanngilaq. Taamakkaluartoq tassunga atatillugu Naalakkersuisut qinnuteqaammik pituttorsimassanngillat.

Imm. 4-mut.

Kismaassisussaatitaanermut Naalakkersuisut immikkut piumasaqaatinik aalajangersaanissaanut aalajangersakkap piginnaatippai. Piumasaqaatit atuinissamut akuersissummi aalajangersarneqassapput.

Assersuutigalugu Kismaassisussaatitaanerup pijuartitsinissamik, nammassisaqarsinnaanermik, inuiaqatigiillu soqutigisaannik illersuisinnaanermik siuarsaataasumik atorneqarnissaanik piumasaqaatinik qulakkeerisinnaasumik, atuinissamut piumasaqaatit ilaatinneqarsinnaapput.

Pisariaqanngitsumik nunaminertamik inniminniinissap pinngitsoortinneqarnissaa eqqarsaatigalugu, kismaassisussaatitaanerup atatiinnarneqarnissaanut aamma piumasaqaatinik aalajangersaasoqarsinnaavoq. Soorlu assersuutigalugu kismaassisussaatitaaneq atatiinnarumallugu sermimik, imermillu ersarinnerusumik taasamik atuisoqassasoq piumasaqaataasinnaapput. Pisinnaatitsissummik pigisaqartoq pisuussummik atuinngikkuni imaluunniit killilimmik atuiguni pisariaqanngitsumik nunaminertamik inniminniineq pineqarsinnaavoq, taamaattoqartillugumi qinnuteqartut allat sumiiffimmi pineqartumi kismaassisussaatitaaneq patsisaalluni pisuussummik atuinissaanut akornuserneqassammata.

Allat namminneq atugassamittut imaluunniit siunertanut allanut pisuussummik atuisinnaanerinik ersarissaasunik immikkut aamma piumasaqaasiortoqarsinnaavoq. Sumiiffik akuersissuteqarfik illuaraqarfimmiikkuni imaluunniit allanit pisuussummik sulit atuisussanik atorneqaruni tamanna naleqqussinnaavoq.

Imm. 5-imut.

Kisermaassisussaataaneq qanoq, qaqugukkullu tunniunneqarsinnaanera pillugu, aalajangersakkap Naalakkersuisut ersarinnerusunik malittarisassiorsinnaatippai. Uani assersuutigalugu qaqugukkut kisermaassisussaataaffilerlugu akuersissummik tunniussisoqarsinnaanera pillugu § 8, imm. 3-mi piumasaqaatinik imaluunniit tunniussinissami pingaarnersuinissami piumasaqaatinik ersarissaallutik malittarisassaasinnaapput.

§ 9-mut

Imm. 1-imut.

§ 4, imm. 3 malillugu misissueqqaarnissamut immikkut akuersissut, kisermaassisussaataaffilerlugu tunniunneqarsinnaanngitsoq aalajangersakkap aalajangersarpaa. Misissueqqaarnissamuinnaq akuersissuteqartoqarpat, misissueqqaarnissamut pisinnaatitsissut immikkuullarissanngilaq. Ingerlatsisut allat sumiffimmi tassani Inatsisartut inatsiaat malillugu akuersissummik tunineqarsinnaassapput.

§ 8 naapertorlugu sumiiffimmi pisuusummik misissueqqaarnissamut aamma atuinissamut akuersissummut ataatsimoortumut ilaatillugu, kisermaassisussaataaneq taamaallat tunniunneqarsinnaavoq.

§ 10-mut

Imm. 1-imut.

§ 4 malillugu akuersissut naapertorlugu sermip, erngullu atorneqartup avammut tunineqarnissaannut avammut tunisinissamut akuersissummik Naalakkersuisut tunniussisinnaasut aalajangersakkap aalajangersarpaa. Taamaalilluni misissueqqaarnissamut akuersissummut aamma atuinissamut akuersissummut avammut tunisinissamut akuersissummik tunniussisoqarsinnaavoq.

Avammut tunisinissamut akuersissummik tunisinissamik, avammut tunisinissaq Kalaallit Nunaata aningaasaqarneranut, inuiaqatigiinnilu soqutigisanut, matumani pilersuinerup isumannaassusaa ilanngullugu, naleqqutissasoq siunnersuummi pingaarnertut piumasaqaatigineqarpoq. Tamatuminnga Naalakkersuisut naliliissapput. Taamaalilluni pisinnaatitsissummik pigisaqartup avammut tunisinissamut akuersissummik tunineqarnissaa inatsisitigut piumasaqaataanngilaq. Ilutigisaanik piumasaqaatit naammassineqarnersut nalilersugassaassaaq.

Avammut tunisinissamut immikkut piumasaqaatinik, avammut tunisinissamut akuersissummi aalajangersaasoqarsinnaavoq. Assersuutigalugu akiliutissanut piumasaqaatit, teknikkikkut isumannaallisaanermullu tunngasut, pitsaassutsimut tunngasut, uppersaasiisarnermullu

tunngasinnaapput. Tassunga tunngatillugu §§ 24-mi aamma 28-mi nassuiaatit innersuussutigineqarput.

Avammut tunisinissamut akuersissut § 4 malillugu akuersissummut atavog. § Taamaalilluni 4 malillugu akuersissummi piumasaqaataasut ataqqineqassapput. Assersuutigalugu annertussutsit atugassatut akuerisaasut pillugit § 4 malillugu akuersissummi aalajangersaasoqarsimappat, annertunerusumik avammut tunisisoqarnissaanut akuersissummik tunniussisoqarsinnaangilaq. Taamaakkaluartoq avammut tunisinissamut piumasaqaatinik allanik, avammut tunisinissamut akuersissummi aalajangersaasoqarsinnaavog.

§ 4 malillugu akuersissummi piumasaqaataasut naapertorlugit avammut tunisineq pissaaq. Avammut tunisineq suliniutip nassuiaataanit annertuumik allaaneruppat, § 4 malillugu akuersissummi piumasaqaatit allanngortissallugit imaluunniit ilassuteqarfigissallugit pisariaqarsinnaassaaq.

Avammut tunisineq Kalaallit Nunaata aningaasatigut, inuiaqatigiitsigullu soqutigisaannut naleqqutinngippat, ajoqusiisinnaappallu avammut tunisinissamik qinnuteqaammik Naalakkersuisut itigartitsisinnaapput.

Piumasaqaataasut naammassineqarnersut naliliinermi tunngavigineqassaaq. Ilaatigut avammut tunisinissaq suliffissaqartitsiniarnermut, atukkatigut naligiissitsinissamut, kulturikkullu pingaartitanut tapertaassanersoq imaluunniit sunniuteqassanersoq kiisalu Kalaallit Nunaanni sermimik, imermillu niuernermit tunngavilimmik atuinerup ineriartortinneqarnissaanut tunngavissiiinersoq naliliinissamut ilaatinneqarsinnaavog. Taassumap saniatigut avammut tunisineq immikkoortortami aningaasaliinernut piusunut imaluunniit periarfissaasunut, assersuutigalugu niuernermit akornusiinikkut imaluunniit naleqqutinngitsumik unammilleqatigiissitsinermik pilersitsinikkut sunniuteqarnerlussanersoq isiginiarneqarsinnaavog, soorluttaaq avammut tunisineq Kalaallit Nunaanni inuussutissarsiutinut piusunut imaluunniit periarfisaasunut allanut sunniuteqarnerlussanersoq isiginiarneqarsinnaasog.

Avammut tunisinerup inuiaqatigiinnut kingunissaanik naliliinermi, avammut tunisineq nunat imaluunniit inuit pillaatitut iliuuseqarfigineqarsimasunik ilaatitsinersog, tamannalu Kalaallit Nunaata nunat tamalaat akornanni atassuteqaataannut kingunerlussanersoq, aningaasatigut imaluunniit politikikkut kinguneqassanersoq imaluunniit nunat tamalaat akornanni pillaaasisitsissutinik unioqqutitsinerussanersoq aamma isiginiarneqarsinnaavog.

Pisut apeqqutaatillugit, pissutsit pingaaruteqartut allat naliliiniarnermit ilaatinneqarsinnaapput.

Avammut tunisineq sumiiffimmi pilersuinerup isumannaatsuuneranut assersuutigalugu imermik pilersuinerup, suliffeqarfimmut atatillugu imaluunniit attaveqaasersuutitut pisariaqartunut imeqarfiit pisariaqartut annikkillinerisigut imaluunniit atornissaanut aarlerinartumik sunniuteqassappat, avammut tunisinissamut akuersissummik tunniussisoqarsinnaanngilaq. Tamanna pisuussutit atorsinnaanerani, pisuussutillu sumiiffiup qanitarisaani atorneqarnissaanut pisariaqaassutit nalilerneqarnerani tunngaveqassaaq. Pilersuinerup isumannaassusaa, avammut tunisinissamut akuersissummik piffissami tunniussivimmi nalilerneqassaaq.

Imm. 2-mut.

Avammut tunisinissamut akuersissut, avammut tunisinissamut immikkut akuersissutitut imaluunniit akuersissummik piusumut ilassutitut atunniunneqassasoq aalajangersakkap aalajangersarpaa. Pisinaatitsissummik pigisaqartup nunamut tunitsiviusumut, assartorneqarneranilu takutissinnaasamik uppersaateqarnissaa siunertaavoq.

§ 4 malillugu akuersissummik tunniussinerup ilutigisaanik, avammut tunisinissamut akuersissut tunniunneqarsinnaavoq. Taamaalilluni suliniutini avammut tunisinissaq tunngaviusussaattillugu, § 4 malillugu akuersissummik qinnuteqarnermut ilaatillugu avammut tunisinissamut akuersissummik qinnuteqartoqarsinnaavoq.

§ 4 malillugu akuersissummik pisinnaatitsissummik pigisaqartoq, avammut tunisinissamut akuersissummik kingusinnerusukkut aamma qinnuteqarsinnaavoq. Taamatut pisoqartillugu avammut tunisinissamut akuersissummi piunasaqaatit immikkut isiginiarneqassapput. Akuersissummik piunasaqaatinut allannguutit imaluunniit ilassutit pisariaqarsinnaapput.

Imm. 3-mut.

Qaammatisiutit ukiuisa naaneri tamaasa qinnuteqarnikkut avammut tunisinissamut akuersissut nutarterneqartassasoq aalajangersakkap aalajangersarpaa. Taamaalilluni akuersissut immini nutarterneqarneq ajorluni, piffissaligaasumik akuersissut pineqarpoq.

Akuersissutini paasissutissat, matumani avammut tunisinerup annertussusaa, siunertaa, avatangiisinullu tunngasut ilanngullugit, ataavartumik nutarterneqartarnissaat ukiumoortumik nutarterneqartarnissaanik piunasaqaatit qulakkiissavaa.

Taamaakkaluortoq § 4 malillugu akuersissummik ilaatillugu pisinnaatitsissummik pigisaqartup sermimik, imermillu avammut tunisinissamut akuersissummik tunineqarneranit siusinnerpaamik qaammatit arfinillit qaangiunnerini ukiumoortumik nutartarinissamik piunasaqaat atuutissaaq. Assersuutigalugu avammut tunisinissamut akuersissut siulleg oktobarip qaammataani tunniunneqarsimappat, avammut tunisinissamut akuersissut siusinnerpaamik qaammatisiutit ukiuata tulliaata naanerani nutarterneqassaaq. Taassumap kingorna avammut tunisinissamut akuersissutitut nutarterneqartut, qaammatisiutit ukiuata naanerani nutarterisarnissamik pingaarnertut malittarisassaaq malissavaat.

Nutarterineq qinnuteqarnikkut pissaaq, siullermeertumillu qinnuteqarnermi suleriaaseq aamma piumasqaatit malillugit suliarineqassalluni, tak. § 34, imm. 3.

Imm. 4-mut.

Avammut tunisinissamut akuersissutinik tunniussisarnernut malittarisassanik ersarinnerusunik Naalackersuisut aalajangersaanissaannut aalajangersakkap piginnaatippai. Tamanna avammut tunisinissamut akuersissutit ilusissaannut malittarisassanut tunngasinnaavoq, matumani avammut tunisinissamut akuersissutini oqaatsinut, imarisassaannut, ilusissaannullu piumasqaatit imaluunniit avammut tunisinissamut akuersissummi saniatigut piumasqaatit ilanngullugit.

Avammut tunisinissamut malittarisassanik aalajangersaanissamut Naalackersuisut aalajangersakkatigut piginnaatinneqarput, matumani immikkut ittumik pisoqartillugu avammut tunisinissamut killilersuutinik aalajangersaanissaq imaluunniit inerteqquteqarnissaq ilanngullugit. Tamanna avammut tunisineq assersuutigalugu politikkikkut imaluunniit aningaasatigut killilersuutinut, avatangiisinut tunngasunut imaluunniit pilersuinermi isumannaassutsimut atatillugu Kalaallit Nunaata aningaasaqarnikkut imaluunniit inuiaqatigiit soqutigisaannut aarlerinarsinnaatillugu pisariaqarsinnaavoq. Avammut tunisineq Kalaallit Nunaata nunat tamalaat akornanni atassuteqaataanik ajoqusiisinnaappat imaluunniit aningaasatigut, politikkikkut imaluunniit avatangiisitigut aarlerinarsinnaappat inerteqquteqarnissaq aamma pingaaruteqarsinnaavoq.

§ 11-mut

Inatsisartut inatsisaat manna malillugu aktianik piginneqatigiiffinnut imaluunniit piginneqataassuteqarluni ingerlatseqatigiiffinnut, Kalaallit Nunaanni angerlarsimaffeqartunut akuersissutinik taamaallaat tunniussisoqarsinnaavoq.

Aktianik piginneqatigiiffinnut aamma piginneqataassuteqarluni ingerlatseqatigiiffinnut aalajangersagaq aamma innersuussut, Aktie aamma anpartsselskabit pillugit inatsisip Kalaallit Nunaanni atulersinnera pillugu peqqussummi (ingerlatseqatigiiffinnut inatsit) malittarisassanut naapertuutsillugit paasineqassapput.

”Angerlarsimaffeqartunut” pineqartillugu, ingerlatseqatigiiffinnut inatsimmi aamma Aningaasarsianit akileraarutit pillugit Inatsisartut inatsisaanni nassuiaatit innersuussutigineqarput. Taassumap kingunerisaanik, Kalaallit Nunaanni aningaasaliilluni ingerlatsivinnut aamma akileraartussaataaneq pillugu malittarisassat atuuttut naapertorlugit, ingerlatseqatigiiffiit Kalaallit Nunaanni angerlarsimaffeqartutut Qitiusumik Suliffeqarfinnik Nalunaarsuiffimmi nalunaarsorsimassapput.

Inunnut, suliffeqarfinnut inunnit nammineq pigineqartunut, immikkoortortaqarfinnut imaluunniit ingerlatseqatigiiffimmut nunani allani angerlarsimaffilinnut akuersissutinik tunniussisoqarsinnaanngilaq.

Ingerlatseqatigiiffittut iluseqarnissamut, sumilu angerlarsimaffeqarnissamut piumasaqaataasut piffissami akuersissuteqarfiusumi tamarmi pisinnaatitsissummik pigisaqartup naammassisimassavai. Tassunga tunngatillugu § 14-imut nassuiaatit innersuussutigineqarput.

Akuersissummik qinnuteqaatip tunniunnerani, piumasaqaataasoq naammasseqartoq qinnuteqartup uppersarsassavaa. Qinnuteqaatip imarisasaanut piumasaqaatit pillugit § 32-mi nassuiaatit innersuussutigineqarput.

§ 12-imut

Aalajangersagaq pisinnaatitsissummik pigisaqartumut, taassumallu aningaasaqarnikkut inissisimaneranut piumasaqaasiivoq. Piffissaq akuersissuteqarfiusoq tamakkerlugu piumasaqaatit naammassineqarsimassapput. Tassunga tunngatillugu § 14-imut nassuiaatit innersuussutigineqarput.

Akuersissummik qinnuteqaatip tunniunnerani, piumasaqaataasoq naammassineqartoq qinnuteqartup uppersarsassavaa. Qinnuteqaatip imarisasaanut piumasaqaatit pillugit § 32-mi nassuiaatit innersuussutigineqarput.

Imm. 1-imut.

Inatsisartut inatsisaat malillugu akuersissummut pisinnaatitsissummik pigisaqartoq akiliisinnaassuseqassasoq, pigisaminullu aamma aningaasaatiminut tamakkiisumik atuisinnaassasoq piumasaqaataavoq. Pisinnaatitsissummik pigisaqartoq akiliisarnerminik unitsitsisimappat, akiliisinnaajunnaarsitaasimappat, pinngitsaaliissummik atorunnaarsitaasimappat, allatigulluunniit taakkununga nallersuunneqarsinnaasunik inissisimappat, piumasaqaataasoq naammassineqarsimassanngilaq.

Inatsisartut inatsisaat malillugu akuersissutit inuinnarmut tunniunneqaratik taamaallaat aktianik piginneqatigiiffimmut tunniunneqarsinnaammata, tak. § 11, aningaasaqarnermut tunngatillugu piumasaqaatit ingerlatseqatigiiffiup naammassisassarai. Taamaalilluni ingerlatseqatigiiffimmi peqataasut, matumani aamma piginnittuviit aningaasaqarnerinut tunngasut imm. 1-imi piumasaqaatinut attuumassuteqanngillat. Taamaattoq pisinnaatitsissummik pigisaqartut aqutsisuinut aamma piginnittuviinut piumasaqaatit pillugit imm. 3-mut nassuiaatit innersuussutigineqarput.

Imm. 2-mut.

Pisinnaatitsissummik pigisaqartoq akilersimanngisaminik 100.000 koruuninik imaluunniit amerlanerusunik Kalaallit Nunaanni pisortani oqartussanut akiitsoqassanngitsoq, imm. 2-mi ersarissarneqarpoq.

Pisinnaatitsissummik pigisaqartut akuersissummik pissarsisut aningaasatigut akisussaassuseqarnissaat, ingerlatamullu akuersissuteqarfiusumut sunniuteqarsinnaasumik aningaasatigut ajornartorsiuteqarnermik ersersitsisinnaasumik, pisortanut akilersimanngisaminik akiitsoqannginnissaat aalajangersakkap taassumap qulakkiissavaa.

Piomasagaat ingerlatseqatigiiffimmut akuersissummik tunineqartumut atuuppoq. Tassunga atatillugu piginnittut pisortanut akiitsorisinnaasai sunniuteqassanngillat.

Imm. 3-mut.

Pisinnaatitsissummik pigisaqartoq aamma pisinnaatitsissummik pigisaqartup aqutsisui kiisalu piginnittuviit ilanngullugit – inaarutaasumik eqqartuunneqarnermikkut aningaasatigut pinerluttuliorsimasutut eqqartuunneqarsimanngissaannik imm. 3-mi aalajangersagaq piomasagaasiivoq. Imaappoq, inuit pinerluttuliorsimasutut taamatut eqqartuunneqarsimasut ingerlatseqatigiiffiup ingerlataannut akisussaasuusinnaanngillat imaluunniit suliffeqarfiup akuersissummik qinnuteqartup ingerlatsineranut akulerussimassanatik. Taassumap saniatigut arlaannaalluunniit suliffimmik ingerlatsisinnaajunnaarsinneqarsimassanngilaq, ingerlatseqatigiiffiulluunniit ingerlatsineranut sunniuteqarsinnaasunik allatigut killilersorneqarsimassanatik.

Tassunga atatillugu "aqutsisut" tassaapput aqutsinermut pingaarnertut akisussaaffeqarlutillu aalajangiisinnaatitaasut, matumani qullersaqarfimmiut, siulersuisut, teknikkikkullu aqutsisut ilanngullugit. Ingerlatseqatigiiffiup akuersissutaannut, piomasagaatillu malinneqarnissaannut sunniuteqarsinnaallutik ingerlatseqatigiiffiup qullersai ilaatinneqarput. Taamaalilluni akunnerani aqutsisut, teamlederit, allalluunniit ulluinnarni ingerlatsinermut assigisaanulluunniit akisussaaffeqartut aalajangersakkami ilaatinneqanngillat.

Aningaasatigut pinerluttuliorsimanernut assersuutitut taaneqarsinnaasut taassapput peqquserlunneq, imminut paarititanik peqquserluuteqarneq, allat sinnerlugit iliuuseqarsinnaatitaanermi peqquserlunneq, akiitsoqarluni peqquserlunneq, akileraarutitigut peqquserlunneq, pinerlunnikkut aningaasarsianik malunnarunnaarsaaneq, allatigulluunniit aningaasatigut peqquserlunnerit.

§ 13-imut

Pisinnaatitsissummik pigisaqartup akuersissut malillugu ingerlatassanik ingerlatsisinnaanissaminut pisariaqartunik suliamut paasisimasaqarnissaa, aalajangersagaq piomasagaasiivoq. Taassumap kingunerisaanik ingerlatanut akuersissut malillugu ingerlanneqarsinnaatitaasunut ingerlatsisinnaanissamut pisinnaatitsissummik pigisaqartoq

pisariaqartumik suliatigut ilisimasaqassaaq, misilittagaqassaaq, piginnaasaqarlunilu. Paasisimasaqarnissaaq pillugu piumasaqaat teknikkikkut ilisimasaqarnissamut, niuerneramik paasisimasaqarnissamut aamma inatsisitigut, malittarisassiuussanullu naleqquttumik ilisimasaqarnissamut tunngassuteqarsinnaavoq, taamaalilluni ingerlatsinerit illersorneqarsinnaasumik, malittarisassanullu atuuttunut naapertuuttumik ingerlanneqarsinnaatillugit.

Pisariaqartumik piginnaasassatut taaneqarsinnaasut tassaapput akuersissummi pineqarlutik pisuussutitut pineqartunut ilisimasaqarneq, assersuutigalugu sermimik aamma imermik atuinissamut ilisimasaqarneq, niuerfimmuut pineqartumut ilisimasaqarneq, ingerlatanullu avatangiisitigut aamma aningaasatigut piumasaqaatinut ilisimasaqarneq.

Imaanngilaq pisinnaatitsissummik pigisaqartoq suliffeqarfiup iluani paasisimasassanut tamanut nammineerluni paasisimasaqassaaq. Siunnersortit imaluunniit suleqatigisat aqutugalugit naleqquttumik ilisimasassat ilisimanissaat qulakkeersimagaanni, piumasaqaat naammassineqassaaq.

Akuersissummik qinnuteqaatip tunniunnerani, piumasaqaataasoq naammassineqartoq pisinnaatitsissumiik pigisaqartup uppersarsassavaa. Qinnuteqaatip imarisassaanut piumasaqaatit pillugit § 32-mi nassuiaatit innersuussutigineqarput.

§ 14-imut

Imm. 1.

Pisinnaatitsissummik pigisaqartup piffissaaq akuersissuteqarfiusoq tamakkerlugu §§ 11-13-imi piumasaqaatit naammassissagai, § 14, imm. 1-imi aalajangersakkap aalajangersarpaa. Imaappoq, piffissami akuersissutip tunniunneqarfiani, aammali akuersissutip piffissaaq atuuffia tamakkerlugu ingerlatseqatigiiffittut iluseqarnissamut, sumilu angerlarsimaffeqarnissamut piumasaqaataasut, aningaasatigut piumasaqaataasut, pisariaqartumik paasisimasaqarnissamut piumasaqaataasoq pisinnaatitsissummik pigisaqartup naammassissagai.

Pisinnaatitsissummik pigisaqartumut piumasaqaat ataaseq, arlallilluunniit pisinnaatitsissummik pigisaqartup naammassiunnaarpagit, § 38, nr. 1-imi aalajangersakkat malillugit akuersissut utertinneqarsinnaavoq. Taamaalilluni assersuutigalugu ingerlatseqatigiiffik akuersissummik tunineqarsimasooq pinngitsaaliissummik atorunnaarsinneqarsimaguni, akiliisinnaajunnaarsimaguni assigisaanilluunniit aqqusaagaqaruni. Assinganik aamma pisinnaatitsissummik pigisaqartoq nunamut allamut nuuppat. Ersarinnerusumik misissornissaannut §§ 11-13 aamma § 38, nr. 1-imut nassuiaatit innersuussutigineqarput.

Utertitsisoqartinnagu § 39-mi malittarisassat qimerloorneqaqqaassapput, taamaalilluni pisinnaatitsissummik pigisaqartup utertitsinissamut tunngavissiisup iluarsineqarnissaanut piffissalernerqassalluni. Taassuma saniatigut ingerlatsinermut inatsimmi malittarisassat nalinginnaasut naapertorlugit, pisumi tassani utertitsineq naleqquttumik kinguneqartitsinerunersoq nalilerneqassaaq. Assersuutigalugu pisinnaatitsissummik pigisaqartoq pisortanut 100.000 koruunit sinnerlugit akiitsoqarluni aningaasatigut unammillernartoeqassappat, ajornartorsiut qaangiuttussaasoq nalilerneqarpat, utertitsinissaq naleqqutitsinngitsutut nalilerneqassaaq.

Imm. 2-mut.

Pisinnaatitsissummik pigisaqartumut §§ 11-13-imi piumasagaatinik itisiliisunik, Naalackersuisut ersarinnerusunik malittarisassiorsinnaanissaannut imm. 2-mi aalajangersagaq pisinnaatitsivoq.

Uani assersuutigalugu tassaasinnaapput ilinniarsimassuseq, misilittakkat, allagartat imaluunniit piginnaasat naleqquttut allat pillugit pisinnaatitsissummik pigisaqartup imaluunniit taassumap sulisuisa naammassisassaat piumasagaatit aalajangersimasut.

§ 15-imut

Imm. 1-imut.

Naalackersuisut atuinissamut akuersissummik tunniussitinnagit, suliniut teknikkikkut aamma aningaasatigut ingerlanneqarsinnaasoq qinnuteqartup qularnarunnaarsissagaa, aalajangersagaq suliniummut pingaarnertut piumasagarpoq.

§ 4 malillugu atuinissamut akuersissutit aalajangersakkami ilaatinneqarput. § 5, imm. 1 malillugu misissueqqaarnissamut akuersissummum atattillugu ilaatigut pisinnaatitsissummik pigisaqartup sermimik, imermillu atuinissamut teknikkikkut, aningaasaqarnikkullu periarfissanik misissuisinnaanissaa siunertaammat, § 4, imm. 3 malillugu misissueqqaarnissamut immikkut akuersissutit piumasagaammum ilaatinneqanngillat. Taassuma saniatigut aalajangersagaq § 16, imm. 1-imut atasutut isigineqassaaq, taassuma kingorna piumasagaatitalerlugu atuinissamut akuersissummik tunniussisoqarsinnaammat. Pisinnaatitsissummik pigisaqartoq piumasagaatitalimmik atuinissamut akuersissutaatilik, naak suliniut teknikkikkut, aningaasaqarnikkullu ingerlanneqarsinnaasoq qularnarunnaarsinneqarsimangikkaluortoq, § 16, imm. 2 malillugu misissueqqaarsinnaavoq. Piumasagaatitalimmik atuinissamut akuersissutit pillugit malittarisassat ersarinnerusumik misissornissaanut § 16-imut nassuiaatit innersuussutigineqarput. Teknikkikkut aamma aningaasatigut ingerlanneqarsinnaanissaanik piumasagaat naammassineqarnerseq paasiumallugu, suliniummik tamarmik naliliinermik tunngaveqassaaq.

Suliniut teknikkikkut ingerlanneqarsinnaanersoq nalilerneqarnissaani ilaatigut sumiiffik qinnutigineqartoq, pilersaarutigisamillu ingerlatassat pingaartinneqarsinnaapput.

Assersuutigalugu sumiiffik imeqarfiup killeqarfianiippat, tassungalu avatangiisinut inatsit naapertorlugu immikkut malittarisassanik aalajangersaasoqanngippat, pilersaarut teknikkikkut ingerlanneqarsinnaanngitsutut aallaavittut isigineqarsinnaassaaq.

Suliniutip ingerlanneqarnissaanut suliassat akornutaasut nalilerneqarpat, suliniut aamma teknikkikkut ingerlanneqarsinnaanngitsutut isigineqassaaq. Uani assersuutigalugu tassaasinnaapput suliniutit sumiiffinni erngup qummut killinga, imaani angallavik nerukitsoq imaluunniit ikkarluit patsisaallutik umiarsuit angalasinnaanngippata imaluunniit sumiiffiit tikikkuminaappata. Qinnuteqartup pigisaqartup aaqqiissutissatut siunnersuutaa naliliinermi isiginiarneqarsinnaavoq.

Suliniutip aningaasatigut ingerlanneqarsinnaanissaanut piunasaqaatip kingunerisaanik, suliniut aningaasatigut piviusorsiorpalaartumik tunngavissaqartoq qinnuteqartup qularnarunnaarsissavaa. Tamanna ima paasineqassaaq, suliniutip aallartisarneqarnera aamma ingerlanneqarnera aningaasalersorneqarsinnaassaaq. Taassumap saniatigut suliniut illersorneqarsinnaasumik ingerlanneqarsinnaaniassammat, aningaasatigut aarlerinarsinnaasut suliniutip nammassinnaasariaqarpai, allanngujaatsumillu ingerlatsinissaaq qulakkeersinnaasariaqarlugu.

Piffissami qinnuteqarfiusumi pisinnaatitsissummik pigisaqartup, piffissaaq akuersissuteqarfiusooq tamakkerlugu matusussernissaanut aningaasaateqassasooq piunasaqaatigineqanngilaq. Taamaakkaluartoq suliniutip aallartisarneqarnera aamma ingerlanneqarnissaa, assersuutigalugu aningaasalersuinissamik pilersaarutitigut, matumani allat aningaasaliissappata taakkua taanerisigut, qanoq aningaasalersorneqarsinnaassanersoq qinnuteqartup qularnarunnaarsissinnaavaa.

Suliniummik ataatsimut naliliineq tunngavigalugu, aningaasatigut tunngavissat piviusorsiorpalaarnersut, naammassineqarsinnaanersullu naliliinermi isiginiarneqarsinnaavoq.

§ 4 malillugu atuinissamut akuersissut, aningaasalersuinissamut pilersaarummik ilalimmik suliniummik pilersaaruteqarnissaanik piunasaqaatitaqarpoq. Aningaasalersuinissamut pilersaarutitut piunasaqaatit ersarinnerusumik atuarnissaannut § 333, imm. 1, nr. 5-imut nassuiaatit innersuussutigineqarput.

Imm. 2-mut.

Suliniutip teknikkikkut, aningaasatigullu ingerlanneqarnissaanut uppernarsaanissaaq siunertaralugu qinnuteqartup uppernarsaatit suut nassiussaneraim pillugu ersarinnerusunik malittarisassiornissamut, imm. 2-mi aalajangersakkap Naalakkersuisut aalajangersaasinnaatippai. Taassumap saniatigut suliniutip teknikkikkut aamma aningaasatigut ingerlanneqarnissaanut uppernarsaanissamut piunasaqaatissat pillugit Naalakkersuisut ersarinnerusunik malittarisassanik aalajangersaasinnaatinneqarput.

§ 16-imut

Imm. 1-imut

§ 15-imi suliniummut piumasaqaammut, aalajangersagaq atuutsitsinnginneruvoq. Suliniutip ingerlanneqarsinnaanerani uppersaanissaq piffissami qinnuteqarfiusumi naammassineqarsinnaanngippat, pisinnaatitsissummik pigisaqartoq piumasaqaatitalerlugu atuinissamut akuersissummik aalajangersakkap tunineqarsinnaatippaa.

Suliniutip ersarinnerusumik piffissaliussap iluani teknikkikkut, aningaasatigullu ingerlanneqarsinnaanerani piumasaqaat pisinnaatitsissummik pigisaqartup naammassillugulu qularnarunnaarsissavaa. Taassumap pisinnaatitsissummik pigisaqartup paasissutissanik, uppersaatissanillu pisariaqartunik katersinissaanut piffissalerneqassaaq, ilutigisaanillu siumut ingerlanissaq qulakkiissallugu.

Piffissaliussaq Naalackersuisut aalajangissavaat, piffissaliussarlu ukiunik pingasunik sivilunerusinnaanngilaq. Pisinnaatitsissummik pigisaqartup piumasaqaammik qaqugukkut naammassinnaanissaanik naliliineq tunuliaqutaralugu, piffissaliussaq aalajangersarneqassaaq.

Atuinissamut akuersissut piumasaqaatitaqaraluartoq, Inatsisartut inatsisaata malittarisasaanut allanut atatillugu, aalajangersagaq malillugu piumasaqaatitaerlugu atuinissamut akuersissut piffissami tunniunneqarfianit tunniunneqarsimasutut isigineqassaaq.

Imm. 2-mut.

Suliniutip teknikkikkut aamma aningaasatigut ingerlanneqarsinnaanerani qularnarunnaarsitsinissamik imm. 1-imi piumasaqaataasoq naammassineqartinnagu, atuinissamut ingerlatat aallartinneqaqqusaanngitsut aalajangersakkap ersarissarpaa. Suliniutip teknikkikkut aamma aningaasatigut ingerlanneqarsinnaanerani qularnarunnaarsitsinissamik imm. 1-imi piumasaqaataasoq naammassineqartoq, Naalackersuisut akuersissutigissavaat. Taamaakkaluartoq piumasaqaataasup naammassineqarnerani Naalackersuisut akuersinissaasa tungaannut, pisinnaatitsissummik pigisaqartoq misissueqqaarsinnaavoq. Taamaalilluni piumasaqaatip naammassineqarnissaanut pisinnaatitsissummik pigisaqartoq paasissutissanik, uppersaatissanillu katersinnaatinneqarpoq.

Imm. 3-mut.

Piffissaliussatut aalajangersarneqartoq tikitsinnagu imm. 1-imi piumasaqaataasoq naammassineqarsimanngippat, piumasaqaatitalerlugu akuersissut erngertumik atorunnaassaaq.

Piumasaqaatitalugu atuinissamut akuersissut atorneqanngikkuni atorunnaatussaalluni piffissaligaasoq, aalajangersakkap ersarissarpaa. Tamatumani nunaminertamik pisariaqanngitsumik inniminniisoqannginnissaa pillugu.

Imm. 4-mut.

Immikkut ittumik pisoqartillugu imm. 1-imi piffissaliunneqartumut, aalajangersakkap Naalakkersuisut immikkut akuersissuteqarsinnaatippai. Pisinnaatitsissummik pigisaqartup aqussinnaangisaanik pisoqartillugu, piffissaliussatullu aalajangersarneqartoq tikitsinnagu suliniutip teknikkikut, aningaasatigullu ingerlanneqarnissaanik qularnarunnaarsitsinissamik piunasaqaataasup naammassineqarnissaanut tamanna akornutaatillugu pingaaruteqarsinnaavoq. Taamaattumik pisinnaatitsissummik pigisaqartup pisinnaatitaaffini annaangikkaluarlugu, piunasaqaatit naammassineqarnissaannut piffissaqarnerunissaanut immikkut akuersissut eqaannerusumik piffissaqartitsisinnaavoq. Taamaakkaluartoq immikkut akuersissuteqartoqassanersoq pisuni ataasiakkaani nalilersorneqartassaaq.

Immikkulli akuersissummut atatillugu § 21-mi aallartinnissamut piffissarititaasumut malittarisassat eqqarsaatigineqartassapput. Tassunga tunngatillugu nassuiaatit innersuussutigineqarput.

Imm. 5-imut.

Piunasaqaatitalerlugu akuersissutinut ersarinnerusunik malittarisassanik, aalajangersakkap Naalakkersuisut aalajangersaasinnaatippai.

§ 17-imut

Imm. 1-imut.

§ 4 malillugu misissueqqaarnissanut aamma sermip, erngullu niuernermik siunertanut atornerqarnissaannut akuersissut, piffissamut ukiut 20-t tikillugit akuersissuteqarfilerlugu tunniunneqarsinnaasoq aalajangersakkap aalajangerpaa.

Piffissaq akuersissuteqarfiusoq Naalakkersuisut aalajangersassavaat, taannalu akuersissummi allassimassalluni. Suliniutip annertussusaa, aningaasaliinissamik pilersaarutit, pisuussummik ineriartortitsinissamut aamma atuinissamut naatsorsuutigisamik piffissamik atuinissaq, inuiaqatigiinni aamma avatangiisitigut eqqarsaatigisassat, pissutsillu allat tunuliaqutaralugit naliliinikkut piffissaq akuersissuteqarfiususaaq aalajangersarneqassaaq.

§§ 21 aamma 22 malillugit aallartinnissamut piffissaliussamik aamma ingerlatsisussaataitanermut piunasaqaatinik pisinnaatitsissummik pigisaqartup naammassinninnissaa, piffissami akuersissuteqarfiusumiaalajangiisuvoq. Piunasaqaatit taakkua naammassineqanngippata, piffissaq akuersissuteqarfissatut aalajangersarneqaaqqaartoq apeqqutaatinnagu akuersissut atorunnaarsisinnnaavoq. Piunasaqaatit taakkua ersarinnerusumik misissornissaannut, aalajangersakkanut taakkununnga nassuiaatit innersuussutigineqarput.

Imm. 2-mut.

Imm. 1 malillugu aalajangersarneqarluni piffissap akuersissuteqarfiusup atorunnaarneranut atatillugu, piffissamik akuersissuteqarfiusumik aalajangersakkap Naalakkersuisut sivitsuisinnaatippai. Piffissaq akuersissuteqarfiusoq pisinnaatitsissummik pigisaqartup qinnuteqarnerit tamaasa ukiut qulit tikillugit Naalakkersuisut sivitsorsinnaavaat.

Piffissamik akuersissuteqarfiusumik sivitsuineq piumasaqaatinik ilasinissamut imaluunniit allannguissamut tunngavissiisinaavoq. Tamanna pillugu imm. 4-mi nassuiaatit takukkit.

Piffissap akuersissuteqarfiusup sivitsorneqarnissaa inatsisitigut piumasaqaataangilaq. Piffissaq akuersissuteqarfiusoq sivitsorneqassanersoq aalajangiinissami, nr. 1-5-imi pissutsit tunuliaqutaralugit Naalakkersuisut aalajangiinissaanni naliliinissaq apeqqutaassaaq.

Nr. 1

Sivitsuinissamik naliliinissami inuiaqatigiinni, najukkamilu soqutigisat, matumani aamma attaveqaasersuutit imaluunniit pisortat pilersuinerat Naalakkersuisut isiginiarsinnaavaat.

Nr. 2

Pisuussut atuinnarsinnaanersoq naliliinissami pisuussutip qanoq issusaa, piujuarsinnaassusaalu naliliiffigineqarsinnaavoq. Tassani avatangiisitigut illersorneqarsinnaasumik, aningaasatigullu illersorneqarsinnaasumik pisuussut suli atorneqarsinnaassanersoq nalilerneqassaaq.

Nr. 3

§42-mi aalajangersagaq malillugu pisinnaatitsissummik pigisaqartup ingerlatat pillugit ataavartumik nalunaarusiai aamma sermeq, imerlu qanoq annertutigisup atorneri pillugu nalunaarutai naliliinissami Naalakkersuisut ilanngussinnaavaat. Tassani inernerit nalunaarutigineqartut kiisalu nalunaaruteqarneq piffissaagallartillugu pisimanersoq Naalakkersuisut pingaartissinnaavaat.

Taassuma saniatigut suliniummik ingerlatsinissami, ineriartortitsinissamilu siunissami periarfissat Naalakkersuisut ilanngussinnaavaat.. Uani suliniut teknikkikkut, aningaasatigullu suli ingerlanneqarsinnaanersoq, pisuussutillu atorneqarnera suli ineriartorteqqinneqarsinnaanersoq pillugit naliliinerusinnaavoq, matumani pisinnaatitsissummik pigisaqartup ataavartumik nalunaarusia ilanngullugit..

Nr. 4

Piffissami akuersissuteqarfiusumi akuersissuteqarnermi piumasaqaataassunik pisinnaatitsissummik pigisaqartoq eqqortitsinersoq naliliinermi isiginiarneqarsinnaavoq.

Nr. 5

Pissutsit pingaarutillut allat, soorlu assersuutigalugu inatsimmi allannguutit, niuernermi pissutsit imaluunniit teknologitigut siuariaatsit qinnuteqaatip sivitsorneqarnissaanik naliliinissami aamma ilaatinneqarsinnaapput.

Imm. 3-mut.

Imm. 1-imi piffissap akuersissuteqarfiusup imaluunnit imm. 2 malillugu piffissaliussamik sivitsuisimanerup naanissaa kingusinnerpaamik qaammatinik arfinilinnik sioqqullugu, pisinnaatitsissummik pigisaqartoq sivitsuinissamik qinnuteqarsimassaaq. Piffissaliussap iluani qinnuteqaat tunniunneqassaaq. Piffissaliussap qaangiutinnginnerani qinnuteqaatip nassiunneqarsimanissaa aalajangiisuuvoq.

Imm. 4-mut.

Piffissamik akuersissuteqarfiusumik sivitsuineq, atuinissamut akuersissummut tapiliussami ersarinnerusumik piumasaqaatit malillugit aalajangersarneqassaaq. Uani annerusumik nalunaarusiornissamut immikkut piumasaqaasiernerit, avatangiisinut aamma inuiaqatigiinnut sunniutissaanik nalileeqqinnerit imaluunniit pisuussutip atuinarnissaanut pissutsit allat pingaaruteqarsinnaasut pineqarsinnaapput.

§ 18-imut

Imm. 1-imut.

§ 4, imm. 3 malillugu misissueqqaarnissamut immikkut akuersissut, piffissamut ukiut pingasut tikillugit akuersissuteqarfilerlugu tunniunneqarsinnaasoq aalajangersakkap aalajangersarppaa.

Piffissaq akuersissuteqarfiusussaq Naalakkersuisut aalajangersassavaat, taannalu misissueqqaarnissamut akuersissummi allassimassalluni. Ingerlatassatut qinnutigineqartut, misissueqqaarnissallu naammassineqarnissaanut piffissaq atussangatinneqartup naliliiffiginerisigut, piffissaq akuersissuteqarfiusussaq aalajangersarneqassaaq.

§§ 21, imm. 2 aamma 22 malillugit ingerlatat aallartinneqarnissaannut piffissaliussamik, ingerlatsisussaataitanermillu pisinnaatitsissummik pigisaqartup naammassisimanissaa, piffissamut akuersissuteqarfissamut aalajangiisuuvoq. Piumasaqaatit taakkua naammassineqanngippata, piffissaq akuersissuteqarfissatut aalajangersarneqaaqqartoq apeqqutaatinnagu misissueqqaarnissamut akuersissut atorunnaarsinnaavoq. Piumasaqaatit taakkua ersarinnerusumik misissornissaannut, aalajangersakkanut taakkununga nassuiaatit innersuussutigineqarput.

Imm. 2-mut.

Pisinnaatitsissummik qinnuteqartup qinnuteqarneratigut, piffissaq akuersissuteqarfiusoq qinnuteqarnerit tamaasa ukioq ataaseq tikillugu aalajangersakkap sivitsorneqarsinnaatippaa. Taamaattoq misissueqqaarnissamut piffissaq akuersissuteqarfiusoq ukiunik tallimanik sivilisnerusinnaanngilaq.

Sivitsuinissaq pillugu aalajangiinissami, naliliinissaq apeqqutaassaaq. Uani ilaatigut misissueqqaarnerup siuariartornera, ingerlatseqqinnissamullu naatsorsuutigisat isiginiarneqarsinnaapput.

Imm. 3-mut.

Piffissap akuersissuteqarfiusup qaangiunnissaa kingusinnerpaamik qaammatinik pingasunik sioqqullugu, pisinnaatitsissummik pigisaqartoq sivitsuinissamik qinnuteqassaaq. Piffissaliussap iluani qinnuteqaat tunniunneqassaaq. Piffissaliussap qaangiutinnginnerani qinnuteqaatip nassiuunneqarsimanissaa aalajangiisuvoq.

Imm. 4-mut.

Piffissamik akuersissuteqarfiusumik sivitsuineq, misissueqqaarnissamut akuersissummut tapiliussami ersarinnerusumik piumasaqaatit malillugit aalajangersarneqassaaq. Uani misissueqqaanissamut piumasaqaataaqqartut aamma misissoqqinneqarsinnaapput.

§ 19-imut

Imm. 1-imut.

§ 4 malillugu akuersissummi sumiiffiup ersarinnerusumik killilersugaasup iluani, pisinnaatitsissummik pigisaqartoq taamaallaat ingerlatsisinnaasoq aalajangersakkap aalajangersarpaa.

Kisermaassisussaatitaaffilerlugu atuinissamut akuersissummik tunniussisoqarsimangippat, sumiiffimmi ataatsimi pisinnaatitsissummik pigisaqartunut arlalinnut Naalakkersuisut akuersissuteqarsinnaapput. § 8-mi nassuiaatit innersuussutigineqarput.

Pisinnaatitsissummik pigisaqartunut arlalinnut akuersissuteqartoqartinnagu, pisinnaatitsissummik pigisaqareersup akuersissutiminik atuinissaminut periarfissai annikillissanersut nalilernerqassaaq. Tassunga atatillugu pisuussutip tunngavia erseqqissumik naliliiffigineqassaaq, tamarmiusumillu atuineq piujuartitsissasoq qulakkeerneqarluni. Taamaalilluni pisuussut sinnerlugu akuersissutinik arlalinnik tunniussisoqannginnissaaa tunngaviuvoq.

Pisinnaatitsissummik pigisaqartoq sanaartussalluni kissaatigissappagu tamanna immikkut akuersissuteqartariaqarpoq, matumani aamma inatsit alla malillugu nunaminertamik atugassinneqarnissaa ilanngullugu. Taamatut tunniussinerni suliniutit arlaqartut akornanni aaqqiagiinngissutaasinnaasut aamma eqqarsaatigineqassapput.

Aalajangersakkap ersarissarpaa

Aalajangersakkap ersarissarpaa, sumiiffik akuersissuteqarfiusoq naleqqanik, killinik imaluunniit nunami naleqquttunik aalajangersaanikkut killilersorneqarsinnaasoq, tamannalu akuersissummi allassimassasoq. Sumiiffiup ingerlatat ingerlanneqarsinnaaffia ersarissumik,

eqqortumillu killilersorsimanissaa aalajangiisuvoq, taamaalilluni pisinnaatitsissummik pigisaqartup ingerlataminut ersarissunik sinaakkuteqarsinnaaniassammat.

Imm. 2-mut.

Akuersissummik ersarissarneqartumik sumiiffik akuersissuteqarfiusoq naleqqanik, killiliussanik imaluunniit sumiiffimmut allatigut pingaarutilinnik aalajangersakkatigut killilersorneqarsimasinnaasoq aalajangersakkap ersarissarpaa. Sumiiffiup ingerlatat ingerlanneqarsinnaaffia ersarissumik, eqqortumillu killilersorsimanissaa aalajangiisuvoq, taamaalilluni pisinnaatitsissummik pigisaqartup ingerlataminut ersarissunik sinaakkuteqarsinnaaniassammat.

§ 20-mut

Imm. 1-imut.

Sumiiffiup akuersissuteqarfiusup allinissaanut imaluunniit allanngortinnissaanut, aalajangersagassatut siunnersuutip Naalackersuisut aalajangiisinaatippai. Pisinnaatitsissummik pigisaqartup nammineerluni tamanna qinnutigissavaa.

Allannguinerup kingunerisaanik, pisinnaatitsissummik pigisaqartoq sumiiffimmik atuiunnaarluni sumiiffik akuersissuteqarfioqqaartoq nuunneqarsinnaavoq, kisiannili sumiiffimmi angeqqataanik ingerlatsisinnaassalluni. Sumiiffik akuersissuteqarfioqqaartoq eqqarsaatigalugu qaleriisitsisoqarsinnaavoq.

Allanngueq sumiiffimmik akuersissuteqarfiusumik aamma milliliinerusinnaavoq. Pisinnaatitsissummik pigisaqartup sumiiffimmik tamakkerlugu atuinnginnerani, taamaalillunilu sumiiffimmik mikinerusumik atuinissaminik pisariaqartitsinerani pingaaruteqarsinnaavoq.

Sumiiffik akuersissuteqarfiusoq allilerneqarpat, sumiiffimmik akuersissuteqarfioqqaartumik pisinnaatitsissummik pigisaqartup atuisinnaatitaanini pigiinnassavaa, kisiannili sumiiffiup saniani sumiiffimmi, ataatsimullu isigalugu sumiiffimmi anginerusumi ingerlataminik ingerlatsisinnaassalluni.

Taamaakkaluartoq sumiiffimmik akuersissuteqarfiusumik allanngueq imaluunniit alliliineq ilaatigut nunaminertanut oqartussanit akuersissuteqarfiusariaqarsinnaammat, imaluunniit avatangiisinut tunngatillugu akuersissuteqarfiusariaqarsinnaammat pisinnaatitsissummik pigisaqartup pisuni tamani eqqumaffigisassavaa. Tamanna sanaartukkamik pilersitsisoqarpat, piiaasoqarpat imaluunniit nuutsisoqarpat pisariaqarsinnaavoq.

Sumiiffimmik akuersissuteqarfiusumik alliliinissaq imaluunniit allatigut allannguinissaq pillugu aalajangiineq, nr. 1-4-mi pissutsit tunuliaqutaralugit pissaq. Allattukkat tamakkiisuunngillat, taamaalillunilu tunngavissat allat Naalackersuisut ilaatissinnaavaat,

ingerlatsinermullu inatsimmi tunngavik naapertorlugu suliap naammattunik paasissutissinneqarnissaa qulakkeerlugu.

§ 4, imm. 3 malillugu misissueqqaarnissamut immikkut akuersissummi sumiiffimmik akuersissuteqarfiusumik alliliinissamik qinnuteqaatit eqqarsaatigalugit, qinnuteqaatit tamarmik immikkut naliliiffigineqartartussaammata nr. 1-3-mi piumasaaqatit sakkukillissamik naliliiffigineqarsinnaapput.

Nr. 1

Allanguinermi imaluunniit annertusaanermi pisuussutip atornerani naatsorsuutigisamik pitsangorsaatissaq Naalackersuisut aamma pingaartissinnaavaat.

Siullertut pisinnaatitsissummik pigisaqartup tamanna nassuiarsinnaassavaa, kisiannili tusarniummut akissutit, tak. § 36, avataaniillu paasissutissat allat naliliinermut aamma ilanngunneqarsinnaapput.

Aningaasatigut iluanaarutit naliliinermi ilanngunneqarsinnaapput. Ilaatigut pisinnaatitsissummik pigisaqartup kaaviiartaasa naatsorsuutigisamik amerlinissaat, matusissutissallu kiisalu inuiaqatigiit aningaasaqarnerini toqqaannartumik, malitsigisaanillu iluanaarutissat ilaatinneqarsinnaapput. Tamatumani aamma Inatsisartut inatsisaanni malittarisassat malillugit qaavatigut akiliutit, akileraarutinik akiliutit, sulisunik najukkameersunik sulii pisariaqartitsineq il.il. ilaatinneqarsinnaallutik.

Naliliinermut ilaatillugu pisinnaatitsissummik pigisaqartoq sumiiffimmik alliliinissamik imaluunniit allanngortitamik atuinnissaminik pisariaqartitsinersoq, piginnaasaqarnerlorlu pingaartinneqarsinnaavoq.

Siunissami qaninnerusumi, ungasinnerusumilu kingunissat naliliinermi pingaartinneqarsinnaapput.

Nr. 2

Suliniummik ingerlatsinissami, ineriartortitsinissamilu siunissamut missiliuussat Naalackersuisut pingaartissinnaavaat.

§ 42 malillugu pisinnaatitsissummik pigisaqartup sumiiffimmu akuersissuteqarfioqqaartumut ataavartumik nalunaarusiai naliliinermi ilaatinneqarsinnaapput. Tassani ilaatigut § 42, imm. 2 naapertorlugu sermeq, imerlu qanoq annertutigisut atorneqarsimaneri pillugit pisinnaatitsissummik pigisaqartup nalunaarusiai ilaatinneqarsinnaapput.

Pisinnaatitsissummik pigisaqartup allanguinissaq imaluunniit annertusaanissaq pisariaqartinneraa pillugu naliliinissami, paasissutissat taakkua tunngavissiisinnaapput. Pisinnaatitsissummik pigisaqartoq ukiumi kingullermi pitsaasunik angusaqarsimappat,

pisinnaatitsissummik pigisaqartoq pusuusummik annertunerusumik atuisinnaaneranut tamanna takussutaasinnaavoq.

Ukiup siuliani angusaq pitsaasimangippat, akuersissuteqarfiup annertusinissaanut tamanna akerliusinnaavoq. Killuani sumiiffiup akuersissuteqarfiup allanngornera imaluunniit annertusineqarnera allanik periarfissiisinnaavoq, tamannalu sumiiffiup akuersissuteqarfiup nuunneqarnissaanut imaluunniit allanngortinneqarnissaanut naliliinikkut tunngaviusinnaalluni.

Ataavartumik nalunaarusiornissamut piumasaqaatit ersarinnerusumik misissornissaannut nassuiaatit aamma § 42 innersuussutigineqarput.

Nr. 3

Nunamut imaluunniit kangerlummot aamma immamut, pinngortitamullu naatsorsuutigisamik kingunissat naliliinermi Naalakkersuisut pingaartissinnaavaat. Taamaalilluni § 29-mi malittariusassat malillugit pisinnaatitsissummik pigisaqartoq pinngortitamut kingunerisinnaasaannik nutaamik suliaqarlunilu tunniussissasoq piumasarineqarsinnaavoq. Sumiiffimmik akuersissuteqarfiusumik annikilliliinissaq qinnutigineqartillugu, pingaartumik sanaartukkat nuunneqartussaattillugit kingunissaanik naliliiginnarnissaq naleqqussinaavoq.

Nr. 4

Aalajangersakkap aalajangersarpaa, pissutsit pingaarutillut allat Naalakkersuisut isiginiarsinnaagaat. Taamaalilluni 1-3-mi allassimasut tamakkiisuunngitsut aalajangersakkat ersarissarpaa.

Pissutsit pingaarutillit allat assersuutigalugu tassaasinnaapput teknologitigut allannguutit, sumiiffimmi attaveqaasersuutinut tunngasut, inuiaqatigiinnut tunngasut kiisalu akuersissutinut imaluunniit ingerlatanut allanut ataqatigiissarineq.

Imm. 2-mut.

Sumiiffimmik akuersissuteqarfiusumik allannguinnissaq imaluunniit allilliinissaq pillugu aalajangiinnissaq eqqarsaatigalugu, § 36-mi tusarniaaneq pillugu malittarisassat aamma atuuttut aalajangersakkap ersarissarpaa.

Taamaalilluni sumiiffiup akuersissuteqarfiusup allineqarnissaa imaluunniit allanngortinneqarnissaa pillugu aalajangiisoqartinnagu, kommunalbestyrelsi tusarniaaffigineqassaaq. Uani kommunip pilersaarusiornermi pisinnaatitaaffia, najukkamilu pissutsinik isumaginninnissaminut periarfissaa, matumani aamma nunaminertanik atuineq, avatangiisinut tunngasut, kommunillu pilersaarusiortfigineqarnerani ataqatiginnerit eqqarsaatigineqarput.

Sumiiffimmi akuersissuteqarfiusumi allanngineq imaluunniit alliliineq inuiaqatigiinnut, avatangiisinut imaluunniit inuussutissarsiutinut annertuumik kinguneqassasoq nalilerneqaruni, aamma tamanut tusarniaasoqassaq, tak § 36, imm. 2.

Tusarniaaneq pillugu malittarisassat ersarinnerusumik misissornissaannut § 36-mut nassuiaatit innersuussutigineqarput.

Imm. 3-mut.

Imm. 3-p aalajangersarpaa, sumiiffiup akuersissuteqarfiusup allanngortinneqarnera imaluunniit allilerneqarnera, § 4 malillugu akuersissummut tapiliussatigut aalajangersarneqassasoq.

Allannguinissamut imaluunniit alliliinissamut Naalakkersuisut piumasaqaatinik ersarinnerusunik aalajangersaasinnaapput, matumani uppernarsaanissamik piumasaqaat, sumiiffimillu atuinissaq ilanngullugit. Taamaalilluni assersuutigalugu allannguinissap annertussusissaanut, atuinissami ingerlatassanut killissanik imaluunniit piumasaqaatinik, il.il. piumasaqaasiortoqarsinnaassaaq. Taassumap saniatigut piumasaqaatinik allanik aalajangersaaneq pillugu § 28-mut atatillugu piumasaqaat isigineqassaaq. Tamanna pillugu nassuiaatit innersuussutigineqarput.

Imm. 4-mut

Sumiiffiup akuersissuteqarfiup allilernissaanut imaluunnit allanngortinnissaanut qinnuteqaatinik suliaqarnissamut malittarisassanik ersarinnerusunik, Naalakkersuisut aalajangersaasinnaannissaanut aalajangersakkap pisinnaatippai. Assersuutigalugu qinnuteqaatip imarisaanut, uppernarsaanissamut, assinullu piumasaqaataasinnaapput.

Taassuma saniatigut sumiiffiup akuersissuteqarfiup allilernissaanut imaluunniit allanngortinnissaanut akuersissutinut piumasaqaatit pillugit, matumani teknikkikkut piumasaqaatit, nalunaarusiortussaataaneq, isumannaallisaanerit kiisalu avatangiisit, nuna imaluunniit sumiiffiup atorneqarnerata illersorneqarnissaa siunertaralugu nalinginnaasumik killersuutaasinnaasut ilanngullugit malittarisassanik ersarinnerusunik aalajangersaanissaannut Naalakkersuisut pisinnaatinneqarput.

§ 21-mut

Aallartinnissamut piffissaliussaq § 21-mi aalajangersakkat aalajangersarpaat, Inatsisartullu inatsisaat malillugu akuersissut tunniunneqartoq naapertorlugu ingerlatassat akuerisaasut ulloq kingusinnerpaaq aallartinneqarsimaffissaat aalajangersarlugu.

Imm. 1-imut.

Aallartinnissamut piffissaliussaq aalajangersakkap aalajangersarpaa. § 4 malillugu atuinissamik akuersissutip tunniunneqarneranit kingusinnerpaamik ukiut tallimat iluini

pisinnaatitsissummik pigisaqartup atuinissami ingerlatassat aallartissimassagai, tassani aalajangersarneqarpoq.

Atuinissami ingerlatassat aallartisarneqarnissaannut pisinnaatitsissummik pigisaqartoq aalajangersakkap piffissalerpaa. Taassumap saniatigut akuersissutinik allanik pisariaqartunik pissarsinissamut, soorlu nunaminertamik atugassinneqarnissamut, avatangiisinut sunniutigisinnaasaanik nalilersuinermit, oqartussallu akuersissutaannut allanut piffissaq atorneqarsinnaavoq. Ilutigisaanik pisinnaatitsissummik pigisaqartoq siuariaateqarani akuersissut pigiinnarnagu imaluunniit nunaminertamik inniminniiginnarani, suliniutip piviusunngortinneqarnissaa eqeersimaartumik sulissutigigaa aallartinnissamut piffissaliussap qulakkeerpaa.

Pisuussutip pissarsiarineratigut, atorneratigullu suliniutip piviusunngortinneqarnissaanik siunertaqartunik, atuinissamut ingerlatsinernik pisinnaatitsissummik pigisaqartup aallartitsinissaa piumasaqaatigineqarpoq. Ingerlatassat piffissaliussap iluani aallartinneqarsimasussat tassaapput ingerlatassat § 4 malillugu atuinissamik akuersissummi ingerlatassatut akuerineqarsimasut. Kaaviiartaqalersimanissaq piumasaqaataangilaq. Piumasaqaatip nammassineqarsimanissaa, pisinnaatitsissummik pigisaqartup qularnarunnaarsitassaraa. Taamaakkaluartoq pisuni tamani nalilersugassaassaaq.

Imm. 1-imi aallartinnissamut piffissaliussaq atuinissamut ingerlatassanut taamaallaat tunngassuteqarpoq. Taamaalilluni § 4 malillugu misissueqqaarnissamut akuersissutitaqarluni aamma atuinissamut akuersissutitaqarluni ataatsimoortumik akuersissummi, misissueqqaarnissamut ingerlatassani pisariaqartitat assigiinngissinnaammata, taakkua aallartissimanissaannut piumasaqaateqanngilaq. Taamaakkaluartoq immikkut ittumik misissueqqaarnissamut tunngasut imm. 2-mi takukkit.

Aallartinnissamut piffissaliussap iluani misissueqqaarnerit ingerlanneqarsinnaapput, aallaavittulli piumasaqaatip naammassineqarnissaanut naammassanani. Taamaakkaluartoq misissueqqaarnissamut ingerlatat, aallartinnissamut piffissaliussamik sivitsuinissamut tunngavissiisinnaapput. Tamanna pillugu imm. 3-mi nassuiaatit innersuussutigineqarput.

Imm. 2-mut.

§ 4, imm. 3 malillugu misissueqqaarnissamut immikkut akuersissutinut tunngatillugu, ingerlatassap aallartissimanissaannut sivikinnerusumik piffissaliisoqarluni ukiumik ataatsimik piffissaliisoqarpoq.

Akuersissutip tunniunneqarneranit kingusinnerpaamik ukiup ataatsip kingorna, akuersissut malillugu misissueqqaarnermi ingerlatassat pisinnaatitsissummik pigisaqartup aallartissimassavai.

Aalajangersagaq misissueqqaarnissamut immikkut akuersissutitut taamaallaat atuuppoq, taamaalillunilu § 4 malillugu misissueqqaarnissamut akuersissutitut aamma atuinissamut akuersissutitut ataatsimut tunniunneqartunut atuutigani.

Imm. 3-mut.

Imm. 1-imi aallartinnissamut piffissaliussamik, imm. 2-milu misissueqqaarnissat aallartisarsimanissaanut piffissaliussamik Naalakkersuisut sivitsuisinnaasut aalajangersakkap aalajangersarpaa. Qinnuteqarnerit tamaasa ukioq ataaseq tikillugu sivitsuisoqarsinnaavoq.

Pisinnaatitsissummik pigisaqartup qinnuteqarneratigut, Naalakkersuisut piffissaliussamik sivitsuisinnaapput. Piffissamik sivitsuisoqarsinnaanissaani, nr. 1-imi imaluunniit nr. 2-mi piunasaqaatit naammassineqartut pisinnaatitsissummik pigisaqartup uppersaanissaa piunasaqaataavoq. Taamaakkaluortoq piffissaliussamik sivitsuisoqarnissaa akuerineqassanersoq, tunngavilersuilluni naliliisoqassaaq. Naalakkersuisut naliliinermi tunngavissatigut eqqarsaatigisassat allat ilanngussinnaavaat, matumani assersuutigalugu § 15 malillugu suliniut teknikkikkut, aningaasaqarnikkullu sulii ingerlanneqarsinnaanersoq ilanngullugu.

Nr. 1

Suliniutip piviusunnigortinneqarnissaa pisinnaatitsissummik pigisaqartup piffissap ingerlanerani eqeersimaartumik sulissutigisimallugu uppersarpagu, Naalakkersuisut piffissaliussamik sivitsuisinnaapput. Suliniut siuarateqarnerisooq, suliniullu piviusorsiorpalaarnersoq, naleqquttumillu piffissap iluani piviusunnigorsinnaarpasinnerisooq naliliinermi isiginiarneqarsinnaavoq.

Imm. 1-imi aallartinnissamut piffissaliussaq eqqarsatigalugu, misissueqqaartoqarsimanersoq isiginiarneqarsinnaavoq. Ingerlatsinerit taamak ittut imm. 1-imi aallartinnissamut piffissaliussamik naammassinninnissamut imminermi naammangillat. Taamaakkaluortoq ingerlatat atuinissamut ingerlatanut, suliniutillu piviusunnigortinneqarnissaanut imak qanitsigisut isigineqartariaqartillugit, misissueqqaarnermik ingerlatat piffissaliussamik sivitsuinissamut naleqquttumik pissuteqartillugu sivitsorneqarsinnaassapput. Taamaakkaluortoq misissueqqaarnermi ingerlatat anginerusut, soorlu najoqqutassiamik misileraanerit pineqartariaqarput. Ingerlatat annikinnerit, soorlu killilimmik imermik misiliinerit naammakkunnangillat. Taamaakkaluortoq pisunik naliliinissamik tunngaveqassaaq.

Taassumap saniatigut piffissami tassani akuersissutitut allanik imaluunniit oqartussanit akuersissutitut pisariaqartunik pissarsinissani, pisinnaatitsissummik pigisaqartup eqeersimaartumik sulissutigisimaneraa isiginiarneqarsinnaavoq.

Suliniutip ingerlanneqarnissaanut aalajangiisuusumik akuersissummik oqartussaq itigartitsisimappat, § 15 naapertorlugu suliniut ingerlanneqarsinnaassanngimmat, sivitsuinissamat aallaavittut tunngavissaqassanngilaq. Taamaakkaluartoq maalaaruteqarnissamat periarfissat tamakkerlugit misilinneqarsimanersut isiginiarneqartariaqarpoq.

Atuivinnissaq pisinnaatitsissummik pigisartup imak qanitsigippagu, suliniullu imak siuarsimatillugu, imm. 1-imi piffissaliussap qaangiutsiarnerani atuinissamik ingerlatassat imaluunniit imm. 2 eqqarsaatigalugu misissueqqaarnermik ingerlatassat aallartinneqarsinnaatillugit, akuersissut atorunnaarsinneqartariaqanngitsoq aalajangersakkap kingunerivaa.

Nr. 2

Siumut ingerlanissamat akimmiffiusoqarsimatillugu, pisinnaatitsissummillu pigisaqartup aqussinnaasimangisaanik paasinartumik pisoqarsimatillugu Naalackersuisut piffissaliussamik sivitsuisinnaapput.

Assersuutigalugu pisut tassaasinnaapput, oqartussat pisariaqartumik akuersissutissaat suliap sularineqarneratigut kinguaattoorsimasut. Taamaakkaluartoq akuersissutit pisariaqartut allat pissarsiarinissaat, pisinnaatitsissummik pigisaqartup piffissap naleqquttup iluani eqeersimaartumik sulissutigisimaneraa isiginiarneqarsinnaavoq. Pisut aqunneqarsinnaanngitsut aamma tassaasinnaapput avataani immikkut pisut, matumani ajunaarnersuit imaluunniit niuernermi pissutsit suliniutip siuariartornissaanut sunniuteqarsimasut.

Kinguaattoorneq pisinnaatitsissummik pigisaqartup aqussinnaanngisaanik pisimatillugu, pissutsillu taakkua siumut ingerlanerup attatiinnarneqarsinnaannginneranut aalajangiisuusimappata aatsaat, nr. 2 malillugu sivitsuisoqarsinnaassaaq. Assersuutigalugu suliniutip siuariartornissaanut aalajangiisuullutik immikkut ittumik pisunut assingusinnaapput soorlu ajunaarnersuit, ajutoornerit imaluunniit naatsorsuutiginnngisamik pisut.

Imaassinnaavoq aamma oqartussat suliamik suliaqarnerat kinguaattoorsimasoq, naak suliap sularineqarnissaa piffissaliussatut ilisimaneqartoq sioqqullugu pisinnaatitsissummik pigisaqartoq piffissaagallartillugu qinnuteqaammik tamakkiisumik nassitsisimagaluartoq.

Silap pissussaa aallaavittut patsisaasinnaanngilaq. Taamaakkaluartoq immikkut naliliisoqartariaqarpoq, tassani ilaatigut pisinnaatitsissummik pigisaqartup ingerlatassaminik ingerlatsinissaminut piffissaanut sunniuteqartumik silarlussimanersoq pingaartinneqarluni.

Killuanik pissutsit pisinnaatitsissummik pigisaqartup ilimagereersinnaasariaqarai patsisitut isigineqarsinnaassanngillat. Soorlu assersuutigalugu tikinneqarsinnaaneranut killiliisut, soorlu

assersuutigalugu piffissat eqqissimatitsiffiusut, ukiuuneranilu nalinginnaasumik pissutsit ilisimallugit pilersarusiorsimanginneq imaluunniit oqartussat akuerisariaqagai pillugit kingusinaarluni qinnuteqarnerit.

Imm. 4-mut.

Aallartinnissamut piffissaliussap qaangiunnissaanut kingusinnerpaamik qaammatit pingasut sioqqullugit, pisinnaatitsissummik pigisaqartoq sivitsuisoqarnissaanik qinnuteqaammik nassitsissasoq aalajangersakkap aalajangersarpaa. Aallartinnissamut piffissaliussap qaangiutinnginnerani qinnuteqaatip nassiuuneqarnissaa aalajangiisuvoq.

Imm. 5-imut.

Aalajangersakkap aalajagersarpaa, imm. 1-2-mi piffissaliussatut aalajangersarneqartup imaluunniit imm. 3 malillugu piffissaliussamik sivitsuisinnaanerup iluani piumasaqaataasumik ingerlatassat aallartinneqanngippata, akuersissut erngertumik atorunnaassasoq. Taamaalilluni ingerlatsinngikkaluarluni akuersissutit atatiinneqarsinnaapput.

Erngertumik atorunnaarsitsisoqassaaq, imaappoq oqartussanit immikkut aalajangiisoqartariaqanngitsoq, piffissaliussalli malinneqarnissaanut pisinnaatitsissummik pigisaqartup nammineerluni akisussaaffigigaa.

Aalajangersakkap kingunerisaanik, aallartinnissamut piffissaliussap iluani ingerlatassat pisinnaatitsissummik pigisaqartup aallartissimanagit akuersissut atorunnaarpat, malitsigisaanik imm. 3 malillugu sivitsuinissamik qinnuteqartoqarsinnaanngilaq. Taamaattoqassappat Inatsisartut inatsisaat malillugu akuersissummik nutaamik qinnuteqartoqartariaqarpoq, taannalu malittarisassat atuuttut malillugit nalilerneqarluni. Erngertumilli aallartitsinissamut periarfissat pillugit tulliuuttumi imm. 5-imi nassuiaatit takukkit.

Imm. 6-imut.

Imm. 3-mi piffissaliussap iluani pisinnaatitsissummik pigisaqartup sivitsuinissaq qinnutigingitsoorsimappagu, akuersissutip imm. 4-aa malillugu atorunnaarsimasup atuutsilerseqqinnissaanut aalajangersagaq periarfissiivoq. Atuutsilersinneqaqqissappat patsiseqartariaqarpoq. Taamaalilluni piffissaliussamik qaangiinnermi akuersissutip erngertumik atorunnaarnissaa pillugu pingaarnertut malittarisassamit, atuutsilersitseqqinneq atuutsitsinnginneruvoq qaqutikkut atorneqarsinnaasoq.

Taassumap saniatigut atuutsilersitseqqinnissamut tunngavilersuisinnaasumik immikkut pisoqarsimappat, pisinnaatitsissummik pigisaqartup imm. 3-mi piumasaqaataasut naammassissavai. Taassumap kingunerisaanik suliniut teknikkikkut, aningasaqarnikkullu sulii ingerlanneqarsinnaappat aatsaat, tak. § 15, pisinnaatitsissummillu pigisaqartup suliniutip piviusunngortinneqarnissaa eqeersimaartumik sulissutigisimappagu imaluunniit siumut

ingerlanissamut pisinnaatitsissummik pigisaqartup aqussinnaanngisaanik pisoqarsimatillugu, atuutsilerseqqinnissamut qinnuteqaat Naalakkersuisut taamaallaat akuerisinnaavaat.

Akuersissutip atorunnaarneranit kingusinnerpaamik qaammatit pingasut kingorna, atuutsilersitseqqinnissamik qinnuteqaat tunniunneqassaaq. Piffissaliussaq malinneqanngippat, atuutsilersitsisoqaqqittoqarsinnaanngilaq. Taamaattoqassappat Inatsisartut inatsisaat malillugu akuersissummik nutaamik ingerlatseqatigiiffik qinnuteqartariaqassaaq.

§ 22-mut

Ingerlatsisussaatitaanissamik § 22-mi aalajangersagaq aalajangiivoq, taanna malillugu Inatsisartut inatsisaat malillugu akuersissut tunniunneqartoq malillugu, piffissaq akuersissuteqarfiusoq tamakkerlugu pisinnaatitsissummik pigisaqartup ingerlatassat ingerlatissagai.

Pisinnaatitsissummik pigisaqartup ingerlatsisussaatitaaneq naammassinngippagu, § 38, nr. 2-mi aalajangersagaq malillugu Naalakkersuisut akuersissut utertissinnaavaat. Akuersissutitnik utertitsisarneq pillugu malittarisassat ersarinnerusumik misissornissaannut, § 38-mut nassuiaatit innersuussutigineqarput.

Imm. 1-imut.

Inatsisartut inatsisaat malillugu akuersissut tunniunneqartoq malillugu ingerlatassatut akuerisaasut, piffissaq akuersissuteqarfiusoq tamakkerlugu pisinnaatitsissummik pigisaqartup ingerlatissagai aalajangersakkap aalajangerpaa.

Aalajangersagaq § 21-mi aallartinnissamut piffissaliussamut atatillugu isigineqassaaq. § 21, imm. 1-2-mi aallartinnissamut piffissaliussap imaluunniit § 21, imm. 3 malillugu piffissaliussamik sivitsuinerup atorunnaarnerani, ingerlatsisussaatitaaneq atuutilissaaq. Akuersissutip tunniunnerani piffissami siullermi, aallartinnissamullu piffissaliussap atorunnaarnissaata tungaanut ingerlatsisussaatitaanerup naammassinissaanut, pisinnaatitsissummik pigisaqartoq pisussaaffeqanngilaq.

Aalajangersagaq § 26, imm. 2-mut innersuussivoq, taassuma kingorna sillimmasiissuteqarnissamik imaluunniit qularnaveeqquteqarnissamik piumasaaqat naammassineqartinnagu ingerlatsinerit aallartinneqaqqusaanngimmata. Innersuussinerup kingunerisaanik, imaanngilaq ingerlatsisussaatitaaneq pisinnaatitsissummik pigisaqartumut atuutinngitsoq. Sillimmasiissuteqarnissamik imaluunniit qularnaveeqquteqarnissamik piumasaaqat naammassineqanngippat ingerlatsisoqaqqusaanngilaq, taamaalillunilu pisinnaatitsissummik pigisaqartup ingerlatsisussaatitaaneq naammassisinnaassanagu. Ingerlatsisussaatitaaneq naammassineqarsinnaaqqullugu, pisinnaatitsissummik pigisaqartup piumasaaqatit piffissaagallartillugu naammassisassarai.

Akuersissutit suussusaannik aalajangersagaq immikkoortitsinngilaq, taamaalilluni Inatsisartut inatsisaat malillugu akuersissutitut tunniunneqarsimasunut tamanut atuulluni.

Ingerlatsisussaataitaanerup naammassineqarnissaanut akuersissutit ataasiakkaat, pisinnaatitsissummillu pigisaqartup suut ingerlatissanerai apequtaapput. § 5-mi, § 6-mi aamma § 10-mi aalajangersakkat naapertorlugit ingerlatassat akuersissummi aalajangersarneqassapput. Ingerlatassat annertussusissaat, suussusaallu nalinginnaasumik pisinnaatitsissummik pigisaqartup qinnuteqarnerminut atatillugu paasissutissanik nassiussimasaanik kiisalu tusarniaanermut atatillugu paasissutissanik tiguneqaratarsimasinnaasunik allaaveqassapput. Taamaalilluni pisinnaatitsissummik pigisaqartup nammineeirluni qinnutigisimasaanut, ingerlatassatullu akuersissuteqarfignisimasaanut ingerlatsisussaataitaanermik piunasaqaat pissusissamisuginnartumik malitsiuvoq.

Soorlu assersuutigalugu sikusarnera aamma ukiuunera imaluunniit pissutsit allat ingerlatsinissamut killiliisut imaluunniit sumiiffimmut tikikkuminaatsitsisut eqqarsaatigalugit, ingerlatat piffissani aalajangersimasuni ingerlanneqassasut akuersissummi ersarissarneqarsinnaavoq. Taamaalilluni piffissani taaneqartuni taakkunani ingerlatassat ingerlanneqarnissaannut pisussaaffiussaaq.

Akuersissuteqarnermi siunertaasup naammassineqarnissaanut ingerlatassanut pisariaqartunut, soorlu assersuutigalugu atuinnissamut akuersissutit ataani pissarsinermut imaluunniit misissueqqaarnissamut akuersissummut atatillugu imermik misiliinermut, ingerlatsinissamik piunasaqaat attuumassuteqarpoq. Taamaakkaluartoq aningaasatigut iluanaarutit imaluunniit kaaviiartitat, piunasaqaatip naammassineqarnissaanut aalajangiisuunngillat.

Ingerlatassatut akuerisaasut, akuersissut naapertorlugu ilumut ingerlanneqartut, nunaminertamillu inniminniisoqarnissaata pinngitsoortinneqarnissaa ingerlatsisussaataitaanerup isumagaa. Ilutigisaanik pisinnaatitsissummik pigisaqartup aallartarnissaminut piffissamik pisariaqartitsisinnaanera eqqarsaatigineqarpoq, taamaattumillu aallartinnissamut piffissarititaasoq atorunnaartinnagu, ingerlatsisussaataitaaneq atuutilissanani.

Imm. 2-mut.

Pisinnaatitsissummik pigisaqartoq ingerlatanik unitsitsigallarsinnaatillugu, imm. 1-imi ingerlatassatut piunasaqaataasumut, aalajangersakkap Naalakkersuisut immikkut akuersissuteqarsinnaatippai.

Immikkut akuersissut ukiut marlukkaarlugit tunniunneqarsinnaavoq. Pisinnaatitsissummik pigisaqartoq ingerlatat unitsitinnagit, ingerlatanik unitsitsigallarnissamik qinnuteqassaaq.

Immikkut akuersissuteqassagaanni, nr. 1-imi aamma 2-mi piumasaqaataasut pisinnaatitsissummik pigisaqartup naammassisimassavai.

Nr. 1

Ingerlatat unitsikkallarneqartariaqarnissaannut immikkut pissuteqartoq, pisinnaatitsissummik pigisaqartup uppersarsassavaa. Assersuutigalugu immikkut pisut tassaasinnaapput naatsorsuutigingisamik pisut, ajunaarnersuit, pissutsilluunniit allat piffissami pineqartumi ingerlatanik ingerlatsisinnaanani pisinnaatitsissummik pigisaqartup aqussinnaasimangisai.

Nr. 2

Taassumap saniatigut ingerlatat qanoq aallarteqqinnissaanut pilersaarummik pisinnaatitsissummik pigisaqartoq saqqummiussissaaq. Pilersaarut taanna piviusorsiorpalaassaaq, ingerlatallu unitsikkallarneqarnissaannut pisut pissutaasut malillugit nalilerneqarsinnaatillugu, ingerlatat aallarteqqinnissaannut piffissaliussamik ersarissumik takutitsissalluni.

Immikkut akuersissuteqartoqassappat, unitsitsigallarneq pineqassaaq. Ingerlatat aallarteqqinnissaat ilimanaateqanngippat, immikkut akuersissummik tunniussisoqarsinnaanngilaq.

Imm. 3-mut.

Aalajangersakkap aalajangersarpaa, ingerlatat unitsinneqartinnagit ingerlatat unitsinneqarallarnissaannut immikkut akuersissummik qinnuteqartoq qinnuteqaammik nassitsissasoq. Ingerlatsisussaataitanermit immikkut akuersissuteqarani ingerlatat unitsinneqarata, pisinnaatitsissummik pigisaqartup aallaavittut § 22, imm. 1-imi ingerlatsisussaataitanermit akerliussaaq. Taamaalilluni piffissamut unitsitsivioersumut kingumut atuuttussamik immikkut akuersissuteqarnissamut, § 22, imm. 2-mi inatsisitigut tunngavissaqanngilaq.

Pisinnaatitsissummik pigisaqartup ingerlatsisussaataitaneq naammassinngikkuniuk, § 38, nr. 2-mi aamma § 39-mi aalajangersakkat malillugit Naalakkesuisut akuersissummik utertitsinnaapput. Akuersissutinik utertitsineq pillugu malittarisassat ersarinnerusumik misissornissaannut, tassunga nassuiaatit innersuussutigineqarput.

§ 23-mut

Sumiiffimmi akuersissuteqarfiusumi pisinnaatitsissummik pigisaqartup saniatigut allat ingerlatsisinnaanerit pillugu piumasaqaatinik ersarissaasunik, aalajangersakkap Naalakkersuisut akuersissummi aalajangersaasinnaatippai. Uani assersuutigalugu illuaraqarfinni illuaqqap piginnittua kuummit illuaqqamut imermut aqquusiimatillugu imaluunniit aalisarnermut imaluunniit takornarialerinermit atatillugu ingerlatat imminerminni

piginnaatitsissummik pigisaqartut pisuusummik atuinerinut akornusiitinnagit pingaaruteqarsinnaavoq.

§ 24-mut

Imm. 1-imut.

Pisinnaatitsissummik pigisaqartup pisuusummik avammut tunisinerminut Namminersorlutik Oqartussanut akiliuteqarnissaa pillugu, aalajangersakkap Naalakkersuisut akuersissummi piumasaqaatinik aalajangersaasinnaatippai.

Imm. 2-3-mi aalajangersakkat malillugit akiliutissaq aalajangersarneqassaaq.

Sermeq, imerlu misissueqqaarnissamut akuersissummi imaluunniit atuinissamut akuersissummi ilaatinneqartut, Inatsisartullu inatsisaat malilluug avammut tunisinissamut akuersissut naapertorlugu avammut tunineqartut aalajangersakkami pineqarput.

Akiliisussaataaneq atuutilernersoq, kingorna atuneq pinnagu avammut tunisineq aalajangiisuvoq. Taamaalilluni pisuussut misissueqqissaarnissamik siunertamut atornerqarnersoq, misiligummik tunisassiortoqarnersoq imaluunniit toqqaannartumik niuernissamik siunertaqartoqarnersoq apeqqutaatinnagu akiliisussaataaneq atuutilissaaq.

Akiliuteqartussaataaneq akuersissummi aalajangersarneqassaaq. Akiliutissaq minnerpaamik ukiumut ataasiarluni akiligassanngortinneqartassaaq. Taassuma saniatigut piumasaqaatit akuersissummi aalajangersarneqartut malillugit pisinnaatitsissummik pigisaqartoq akiliissaaq. Nalinginnaasumik § 42, imm. 3 malillugu avammut tunisinerup nalunaarutigineqarneranut atatillugu akiliuteqartoqartassaaq. Nalunaaruteqartussaataaneq pillugu malittarisassat ersarinnerusumik misissornissaannut § 42, imm. 3-mut nassuiaatit innersuussutigineqarput.

Imm. 2-mut.

Tunisassiornermut akitsuutitigut, ukiumoortumillu tunngaviummik akiliuteqartarnikkut kiisalu naatsorsuinissami ersarinnerusumik tunngavissatigut akiliutissaq ataavartumik akilerneqartarsinnaasoq aalajangersakkap aalajangersarpaa.

Akilerarusiinerunngitsoq aalajangersakkap ersarissarpaa.

Sermeq, imerlu iluaqutigineqartut tunuliaqutaralugit, tunisassiornermut akitsuut naatsorneqassaaq. Taamaalilluni akiliutissaq nikerarsinnaavoq.

Sermimut, imermullu niuernermik tunngavilimmik atuinissaq siunertaraluguavammut tunineqartumut Namminersorlutik Oqartussat akiliiffigineqarnissaat, tunisassiornermut akitsuutip qulakkiissavaa.

Kalaallit Nunaannit anninneqartup annertuussusaa naatsorsuinermit tunngavissiisaaq. Naatsorsuinermit sermimut kilogram, imerlullu literi aallaavigineqassaput.

§ 42, imm. 3 naapertorlugu pisinnaatitsissummik pigisaqartup avammut tunisani nalunaarutigissallugu pisussaaffeqarpoq. Qanoq annertutigisumik avammut tunisisoqarnersoq nalunaarummi allassimassaaq. § 42, imm. 3-mut nassuiaatit innersuussutigineqarput.

Sermimik, imermillu avammut tunisinernut Namminersorlutik Oqartussat allaffissornermi aningaasartuutaanut matussutissatut, ukiumut tunngaviusumik akiliutisaaq aalajangersarneqassaaq. Pisinnaatitsissummik pigisaqartut ataasiakkaat sermimik imaluunniit imermik avammut tunisaasa annertuussusaat imaluunniit ingerlatat qanoq annertutiginersut apeqqaatinnagit, tunngaviusumik akiliutisaaq ukiumut akiliutisaaq aalajangersimasooq. Taamaakkaluartoq Namminersorlutik Oqartussat sermimik, imermillu avammut tunisinermut atatillugu siammasissumik allaffissornermi aningaasartuutaanut matussusiissapput. Assersuutigalugu siunnersuutip § 40-a malillugu nakkutilliinissamut aningaasartuutissat ilaatinneqarsinnaapput.

Tassunga tunngatillugu oqaatigineqassaaq, suliniutip angissusaa katitigaaneralu kiisalu nakkutilliineq sumi ingerlanneqarnersoq, matumani aamma sumiiffiit tikikkuminaannersut apeqqaatillugit aningaasartuutit taakkua annertussilerneqaratarsinnaammata. Taamaalilluni akiliutissat taakkununga aningaasartuutitut naapertuutissapput.

Imm. 3-mut.

Tunisassiorneq Kalaallit Nunaanni imaluunniit avataani pinersoq imaluunniit bulkimut avammut tunisisoqarniarnersoq apeqqaatillugu, akiliutit nikerarsinnaasut aalajangersakkap aalajangersarpaa.

Taamaalilluni aalajangersagaq ima paasineqassaaq, tunisassiornermut akitsuut aamma ukiumut tunngaviusumik akiliutissat nikerarsinnaasut. Taamaalilluni suliniutitut ataasiakkaanut naleqqussakkanik, akiliutissat pillugit piunasaqaasiortoqarsinnaavoq. Kalaallit Nunaanni tunisassiortoqaruni malitsigisaanik Kalaallit Nunaat isertitaqarsinnaammat, Kalaallit Nunaanni tunisassiornermut appasinnerusunik akiliuteqartitsisoqarnissaanut tunngavissaqarpoq.

Tunisassiorneq tassaavoq imermik maqitsineq imaluunniit sermimik tunisassiassatut poortuineq. Tunisassiorneq taanna sumi pinersoq kiisalu pisuussutip poortorneqarnissaa imaluunniit suliarineqaqinnissaa aalajangiisuvoq. Imermik bulkimut avammut tunisinermi imeq suliareqqaarnagu imaluunniit tunisassiaralugu poortuisoqqaaranani annertuukkuutaartumik assartorneqartarmat, tassannga immikkoorpoq.

Qinnuteqartup avammut tunisinissaminik qinnuteqarnermini paasissutissiisutigissavaa, tunisassiornissaq Kalaallit Nunaanni imaluunniit avataani pissanersoq imaluunniit imermik bulkimut avammut tunisisoqarniarnersoq, tak. siunnersuummi § 34, imm. 1, nr. 2.

Imm. 4-mut.

Aalajangersakkap aalajangersarpaa, § 24 malillugu akuersissummi piumasaqaatit aalajangersarneqartut naapertorlugit pisinnaatitsissummik pigisaqartup akiliutissaq akilinngippagu, akiitsut pisortanut akiitsutut isigineqassapput.

Kalaallit Nunaanni pisortanut akiitsut akilersinniarneqartarnerini malittarisassat atuuttut naapertorlugit akiitsut Akileraartarnermut Aqutsisoqarfimmit akilersinniarneqarsinnaapput.

Akiitsut 100.000 koruunit sinneqarpata § 38, nr. 1, tak. § 12, imm. 2, tak. § 14 malittarisassat naapertorlugit akuersissutit utertinneqarnissaanut tunngaviusinnaavoq. Akiliutissap akilernerqarnissaa pillugu piumasaqaat annertuumik imaluunniit ataasiaannaarani unioqquutinneqarpata, § 38, nr. 3-mi malittarisassat naapertorlugit akuersissut utertinneqarsinnaassaaq. Taamaakkaluartoq pisuni tamani tamanna naleqqutissanersoq nalilerneqartuaannassaaq, matumani aamma aningaasatigut unamminartut qaangiuttussaanersut ilanngullugu. Utertitsineq pillugu malittarisassat ersarinnerusumik misissornissaannut, § 38, nr. 1-imut aamma 3-mut nassuiaatit innersuussutigineqarput.

Imm. 5-imut.

Akiliutissat pillugit malittarisassanik ersarinnerusunik, aalajangersakkap Naalackersuisut aalajangersaasinnaatippai.

Tamanna nalunaarummi pisinnaavoq.

Imm. 1-3 malillugit akiliutissap naatsorsorneqarnissaa, annertussusissaalu pillugit Naalackersuisut malittarisassanik aalajangersaasinnaapput. Tassani imm. 3 tunngavigalugu, suliarinninnerit annertussusaat apeqqutaatillugit assigiinngitsunik akigititaqartoqarsinnaavoq, matumanilu aamma imeq suliarinneqqaarani imaluunniit assersuutigalugu puujaasamut maqeriarlugu umiarsuarmik assartorneqarnerisooq ilanngullugu. Taassuma saniatigut akigititanik aalajangersaanermi tunngavissat allat ilaatinneqarsinnaassapput, matumani aamma soorlu niuernermi akigititat, unammilleqatigiinnermilu atugassarititat ilanngullugit. Taassuma saniatigut aningaasanut inatsimmi aalajangersarneqarlutik aningaasatigut sinaakkutissat iluini akiliutissat annertussusissaat aalajangersarneqarsinnaassasoq naatsorsuutigineqarpoq.

Taassuma saniatigut akiliutissanut piumasaqaatinik, matumani piffissaliussat ilanngullugit Naalackersuisut ersarinnerusunik malittarisassiorsinnaanissaannut pisinnaatinneqarput.

§ 25-mut

Imm. 1-imut.

§ 4 malillugu akuersissutit tunniunneqartup malitsigisaanik ingerlatsinermi ajoqusikkat taarserneqarnissaat, pisinnaatitsissummik pigisaqartup akisussaaffigigaa aalajangersakkap aalajangersarpaa. Akuersissut malillugu ingerlatsinikkut ajoqusikkat

akisussaaffigineqarnissaanut, akisussaasutut tunngaviusariaqartumik aalajangersagaq aalajangiivoq. Taassumap kingunerisaanik pisinnaatitsissummik pigisaqartup taarsiisussanngortinneqarnissaani, mianersugaalliornermik ersersitsisoqarnissaa piumasaqaataanngilaq.

Ajoqusernerit sulluunniit, matumani inunnik aamma pigisanik ajoqusiinerit ilanngullugit, akisussaaffigineqassapput.

Pisinnaatitsissummik pigisaqartup akisussaaffigisassaminik ajoqusiisimasooq ajoquserneqartup nammineerluni uppersaasiinnginnissaa akisussaaffiliinerup qulakkiissavaa. Ajoquserneq ingerlatap pineqartup kingunerisaanik ajoqusernerusooq, ajoquserup kisiat uppersassavaa,. Akuersissuteqartariaqarlutik ingerlatat ajoqusiinissamut immikkut aarlerinarsinnaanerat, matumani avatangiisinut ajoqusiisinnaanerat imaluunniit allat piinik ajoqusiisinnaanerat ilanngullugu, akisussaasutut tunngaviusariaqarnermut patsisaavoq.

Akuersissummut ilaanatik ingerlatat malitsigisaannik ajoqusertoqarpat, taarsiisuteqarnissamut nalinginnaasumik inatsisitigut malittarisassat naapertorlugit imaluunniit inatsit alla naapertorlugu akisussaaffik nalilerneqartariaqarpoq.

Imm. 2-mut.

Ajoqusertoq ajoqusiinermut pisooqataasimappat, imm. 1 malillugu taarsiineq annikillisinneqarsinnaavoq imaluunniit atorunnaarsinneqarsinnaavoq. Taamaattoq ajoquserneqartoq piaarluni imaluunniit mianersugaalliorujussuarluni ajoqusernermut pisooqataasimappat aatsaat, taarsiineq annikillisinneqarsinnaavoq imaluunniit atorunnaarsinneqarsinnaavoq.

Soorlu assersuutigalugu ajoquserup assiaqutit isumannaallisaataasut peersimappagit, iseqqusinnginnerit isiginngitsuusaarsimappagit imaluunniit mianersooqussutit ersarilluinnartut malissimangippagit. Ajoqusertoq patsisissaqarani sumiiffimmi ulorianarsinnaasunik ingerlatsivimmiissimaguni, ulorianartorlu pillugu ersarissumik allagartalersuisoqarsimatillugu imaluunniit allatigut paasissutissiisoqarsimatillugu annertuumik mianersuaalliornerusinnaavoq.

§ 26-mut

Imm. 1-imut.

§ 4malillugu akuersissut tunniunneqartoq malillugu ingerlatat inuussutissarsiornermi akisussaasnermut sillimmasersimassasut, allatigulluunniit qularnaveeqquserneqarsimassasut aalajangersakkap aalajangersarpaa. Ingerlatat kingusernerisaannik ajoqusernerusinnaasut matussuserneqarsinnaaniassammata aningaasatigut qularnaveeqqusersimanissaq qulakkiissallugu, piumasaqaatip taassumap siunertaraa.

Inuiaqatigiit aamma inuit imaluunniit suliffeqarfiit, ingerlatanit pineqartumut eqqorneqarsinnaasut illersorneqarnissaanni tamanna pingaaruteqarpoq.

Pisinnaatitsissummik pigisaqartup ingerlatsinermi kingunerisaanik taarsiissuteqarnissamik piunasaqaataaratarsinnaasumut qularnaveeqqusersimanissaa, sillimmasiissuteqarnissamik piunasaqaatip qulakkiissavaa.

Imm. 2-mut.

Sillimmasersimanissamik imaluunniit qularnaveeqqusiinissamik piunasaqaat naammassineqarsimatinnagu ingerlatat aallartinneqaqqusaanngitsut, taamaalillunilu ajoquserneqaratarsinnaasut taarsiiffigineqarnissaannut qularnaveeqqusiisoqarsimanissaa imm. 2-p ersarissarpaa..

Imm. 3-mut.

Sillimmasiinissamut imaluunniit qularnaveeqqusiinissamut pisussaaffik pillugu piunasaqaatinik ersarinnerusunik Naalakkersuisut aalajangersaasinnaapput. Tamanna ilaatigut qanoq annertutigisumik sillimmasersimanissamik, sillimasiissutillu aningaasartassaannut ersarissaanerusinnaavoq.

Taassumap saniatigut akuersissut malillugu ingerlatanik ingerlatsinermi nioqqutinik pilersuisut taarsiinissamut akisussaaffigisaannut tunngatillugu, pisinnaatitsissummik pigisaqartup nioqqutinik imaluunniit sullissinernik pilersuisui sillimmasersimanissaannik imaluunniit allatigut qularnaveeqqusiisimanissaannik piunasaqaatinik Naalakkersuisut aalajangersaasinnaapput.

Imm. 4-mut.

Sillimmasersimanissamut aamma qularnaveeqqusersimanissamut piunasaqaatinik ersarinnerusunik, aalajangersakkap Naalakkersuisut aalajangersaasinnaatippai. Uani sillimmasiissutit aningaasartassaannut, matussusiinissap annertussusissaannut kiisalu qanoq ittunik, qanorlu annertutigisumik qularnaveeqqusersimanissamut piunasaqaatit ilaatinneqarsinnaapput.

§ 27-mut

Imm. 1-imut.

Avatangiisinik, nunatamillu pineqartumik iluarseeqqinnissamut aningaasartuutaasinnaasut matussuserneqarnissaannut pisinnaatitsissummik pigisaqartup aningaasatigut qularnaveeqqusiisimanissaa pillugu, Inatsisartut inatsisaat manna malillugu akuersissummi tunniunneqartumi, aalajangersakkap Naalakkersuisut piunasaqaatinik aalajangersaasinnaatippai. Avatangiisit ajoquserneqarsimatillugit pisinnaatitsissummik pigisaqartup nammineerluni iluarseeqqinngippat, aningaasanik atugassaqaarnissaanut qularnaveeqqusiussat naammassapput, taamaalilluni iluarseeqqinnissami aningaasartuutissat pisortanit akiligassanngortinneqannginnerussammata..

Ingerlatat naammassineqareerpata iluarseeqqinnissaq aalajangersakkami pingaarnertut siunnerfigineqarpoq, aammali piffissap akuersissuteqarfiusup ingerlanerani § 26 malillugu sillimmasiissutitut ilaangitsumik iluarseeqqittoqartariaqartoq naliliisoqartillugu pingaaruteqarsinnaalluni.

Qularnaveeqqusiinissamut Naalakkersuisnut akuersissummi ersarinnerusunik piunasaqaasiorsinnaapput, matumani pisut suut qularnaveeqqusiinissamut ilaatinneqassanersut, aningaasanillu atugassiineq ilanngullugu.

Imm. 2-mut.

Suliniutip qanoq ittuunera, annertussusaa, avatangiisinut sunniutaasinnaasut kiisalu iluarseeqqinnissami aningaasartuutissatut missiliussat tunuliaqutaralugit qularnaveeqqusiussasat annertussusissaat, ilusissaallu Naalakkersuisunit aalajangersarneqassasut, aalajangersakkap aalajangersarpaa.

Qularnaveeqqusiussaq assersuutigalugu aningaaserivimmi qularnaveeqqusiunneqassasoq, akiligassanut akissat qularnaveeqqutitut toqqorneqassasoq imaluunniit ingerlatseqatigiiffik piginnittoq qularnaveeqqusiissasoq Naalakkersuisut aalajangersarsinnaavaat.

Naleqquttumik tunngaveqartitsinissamut aalajangersagaq atavoq, tassanilu ingerlatat kingunerisaannik avatangiisitigut akornusiisinaanernut naapertuuttumik qularnaveeqqusiisoqassalluni. Akornuserneqaratarsinnaasunut, iluarseeqqinnissamilu aningaasartuutaasinnaasunut qularnaveeqqusiussat naapertuunnissaat, ingerlatallu assigiinngissusaasa isiginiarneqarnissaat taassumap qulakkiissavaa.

Imm. 3-mut.

Pissutsit annertuumik allanngorpata, Naalakkersuisut qularnaveeqqusiinissamut piunasaqaatinik allannguinnissaannut imm. 3-p periarfissippai. Uani assersuutigalugu tassaasinnaavoq avatangiisinut sunniutissat imaluunniit iluarseeqqinnissami aningaasartuutissat ilimageqqaakkamit annertunerussasut paasissutissat takutippassuk. Soorlu aamma akuersissutip annertussusaa allannguffigineqarpat, soorlu assersuutigalugu sumiiffik akuersissuteqarfiusoq allanngortinneqarpat. Taamaalilluni aularnaveeqqusiineq peratarsinnaasunut qaqugukkulluunniit naleqqussarneqarsinnaavoq.

Qularnaveeqqusiinissamut piunasaqaatinik allanngiineq, imm. 2-mi tunngaviit naapertorlugit pissaaq.

§ 28-mut

Imm. 1-imut.

Inatsisartut inatsisaat malillugu akuersissummi piumasaqaatit allat aalajangersarneqarsinnaasut, imm- 1-imi aalajangersagaq tamakkiisuunngitsumik allattugartaqarpoq. Taamaalilluni § 4 malillugu atuinissamut akuersissutit aamma § 10 malillugu avammut tunisinissamut akuersissutit pineqarput. Akuersissutip suussusaa, suliniullu pineqartoq apeqqutaatillugit piumasaqaatinut nikerarsinnaasunut, aalajangersagaq pingaarnertut sinaakkutissiivoq.

Malittarisassatigut pisariaqartumik Naalakkersuisut eqaassuseqartinniarlugit, ilutigisaanillu sumi nalinginnaasumik piumasaqaatinik aalajangersaanissap pisariaqarsinnaaneraniq qitiusumik takussutissiitillugu, aalajangersagaq siammasissumik oqaasertalerneqarpoq. Taamaakkaluartoq ingerlatsinermi inatsisitigut nalinginnaasumik tunngavissat naapertorlugit, matumami naligiissitsinissamut tunngavik aamma naleqquttumik tunngaveqartitsinissaq ilanngullugit, piumasaqaatinik aalajangersaasoqartassaaq.

Nr. 1

Akuersissutit uninnaasat, atorunnaarnissaat aamma utertinneqarnissaat pillugit ersarinnerusunik piumasaqaasiortoqarsinnaavoq, akuersissutillu eqaatsumik aqunneqarnissaat taassumap qulakkiissallugu, matumani aamma sumiginnaasoqartillugu, pissutsit allanngornerini imaluunniit malittarisassat naleqqussarneqarnissaannik pisariaqartitsisoqarnissaa ilanngullugit.

Aalajangersakkap kingunerisaanik akuersissut qaqugukkut, susoqartillugulu uninnaasanut, atorunnaarnissaanut imaluunniit utertinneqarnissaanut piumasaqaatinik aalajangersaasoqarsinnaavoq.

Piffissap atorunnaaneratigut imaluunniit akuersissutip nalinginnaasumik pisoqarneratigut naammassineratigut uninneq pissaq.

Akuersissummi piumasaqaataasoq imaluunniit piffissaliussaq malinneqanngippat, atorunnaarsitsinermi akuersissut immi atorunnaartarpoq. Akuersissummik atorunnaarsitsineq imaaliillaannaq pissaq, tamannalu pillugu ingerlatsinermi inatsisitigut immikkut aalajangiisoqassanani. Assersuutigalugu ingerlatseqatigiiffik akuersissummik tunineqarsimasoq pinngitsaaliissummik atorunnaarsitaasimappat, allatigulluunniit atorunnaarsimappat atorunnaarsitsisoqarsinnaavoq.

Utertitsinerup kingunerisaanik, ingerlatsinermi inatsisitigut aalajangiinerup kingunerisaanik akuersissut unissaaq. Sumiginnaaneq, siuariartunnginneq, akuersissutilluunniit atorunnaarsinneqartariaqarneranut pissutsit allat tunuliaqutaralugit tamanna pisinnaavoq. Taamaalilluni utertitsineq naliliinermik, aalajangiinermillu tunngaveqartariaqarpoq, tassanilu suliat suliarineqartarnerinut inatsimmi malittarisassat malinneqassapput, ingerlatsinermi inatsisitigut nalinginnaasumik tunngavissat isiginiarneqassapput, matumani illuatungerisamik tusarniaanissaq pillugu malittarisassat ilanngullugit.

Nr. 2

Pisuussut qanoq annertutigisoq atorneqassanersoq aamma atorneqarsinnaanersoq pillugu piumasaqaatinik Naalakkersuisut aamma aalajangersaasinnaapput.

Pisinnaatitsissummik pigisaqartup pisuussut minnerpaamik qanoq annertutigisoq atussallugu pisussaaffigineraa pillugu Naalakkersuisut piumasaqaasiorsinnaapput. Taamaalilluni suliniut aningaasatigut, ingerlatsinikkullu piujuartissinnaallugu, pisuussummik atuineq minnerpaatut ingerlanneqarnissaa qulakkeerneqassaaq.

Taassuma saniatigut pisinnaatitsissummik pigisaqartup pisuussut annerpaamik qanoq annertutigisoq atussaneraa Naalakkersuisut piumasaqaasiorsinnaapput. Uani assersuutigalugu pisuussummik piujuartitsisussamik atuinissaa qulakkeermallugu naleqqussinnaavoq.

Annertussuseq pillugu piumasaqaasiormi, § 33 imm. 1, nr. 3 malillugu pisinnaatitsissummik pigisaqartup pisuussut naatsorsuutigisamik atugassatut suliniutissatut pilersaarummi taasaa Naalakkersuisut ilaatigut ilanngussinnaavaat. Assinganik sermeq, imerlu avammut nioqqutissatut missiliorlugu qinnuteqartup qinnuteqaammuni paasissutissiissutigisaa, avammut tunisinissamat akuersissummi piumasaqaatinut ilaatinneqarsinnaavoq.

Aalajangersagaq § 22-mi ingerlatsisussaataitanermut atatillugu isigineqassaaq, taassumallu kingorna pisinnaatitsissummik pigisaqartoq akuersissummut naapertuuttumik ingerlatsinissamik pisussaaffeqassalluni. Minnerpaamik ingerlatsinissap qulakkeerneqarneratigut minnerpaaffiliineq ingerlatsisussaataitanermut tunngavissiivoq, akuerisaasumillu annerpaamik atorsinnaasap pisuussummik annerpaamik atuinissaaq killilerlugu.

Nr. 3

Iluarsaassineq, iluarseeqqinnerlu pillugit piumasaqaatinik aalajangersaasoqarsinnaavoq. Taassumap kingunerisaanik, assersuutigalugu ingerlatat unitsillugit pisinnaatitsissummik pigisaqartoq sumiiffik illersorneqarsinnaasumut utertillugu iluarseeqqinnissaanik imaluunniit ataavartumik iluarsaassisarnissaanik pisussaaffilerneqarsinnaavoq.

Nr. 4

Aarlerinarsinnaasut millisinniarlugit, ingerlatsinerlu illersorneqarsinnaasoq qulakkeermallugu teknikkikkut, isumannaallisaanermut, avatangiisinullu tunngasunut piumasaqaasiortoqarsinnaavoq. Assersuutigalugu atortut uppernarsaasersimanissaannut, ikuallattoqaratarsinnaaneranut illersuinissamat aamma aqqutissianik nakkutilliinissamat, atortut avatangiisinut ulorianannginnissaannut, eqqagassalerinermullu tunngatillugu piumasaqaataasinnaapput.

Nr. 5

Sermeq aamma imeq iluaqutissatut, illup iluani, assigisaanilluunniit atorneqartussaaitillugu inuit peqqissusaasa illersornissaaq eqqarsaatigalugu pitsaassutsimut tunngasunut aamma peqqissutsimut tunngasunut piumasaqaatinik aalajangersaasoqarsinnaavoq.

Piumasaqaatinik aalajangersaanermi nunami niuerfimmi tuniniagassat imaluunniit avammut tunisassat immikkoortinneqarsinnaapput.

Nr. 6

Aalajangersagaq nr. 5-imut atasutut isigineqassaaq. Sermeq aamma imeq iluaqutissatut, illup iluani, assigisaanilluunniit atorneqartussaaitillugu piumasaqaatinik aalajangersaanermi, nakkutilliinissaq pillugu aamma piumasaqaasiortoqarsinnaavoq, matumani malittarisassat atuuttut malinneqarnissaasa qulakkeerneqarnissaannut, pisinnaatitsissummik pigisaqartup nammineq nakkutilliinissaa ilanngullugu.

Imm. 2-mut

§ 4 aamma § 10 malillugit akuerisissutit naapertorlugit sermimut, imermullu atorneqartumut aamma avammut tunisassiarineqartunut uppersaasiisarnissaaq pillugu malittarisassanik ersarissunik aalajangersaasinnaanissaannut, imm. 2-p Naalakkersuisut piginnaatippai. Taamaalilluni akuersissummik pissarsiniarluni, nioqqutit pitsaassusissatut aalajangersakkanik malinninnissaat pillugu malittarisassanik aalajangersaasoqarsinnaavoq. Uppersaasiineq nioqqutit pitsaassusiinik qulakkeerinissamut sakkussaallunilu, nioqqutit uppersaakkamik qaffasissummik pitsaassusilerlugit nioqqutigineqarnissaannut sakkussaapput. Ilaatigut uppersaasiinissamik atorneqarsinnaasumik, qanoq pitsaassuseqarneranik nalunaarnissamut immikkoortunik aalajangersaasoqarsinnaavoq.

§ 29-mut

Imm. 1-imut.

Suliniut nunap imaluunniit kangerluup aamma immap isikkuanik annertuumik allannguissappat imaluunniit pinngortitaq, matumani uumasut nujuartat naasullu ilanngullugit, annertuumik sunnerneqassatillugit, qinnuteqartoq pinngortitamut kingunissaanik naliliinissaa pillugu, aalajangersagaq pumasaqaammik aalajangersaavoq.

Naatsorsuutigisamik nunamut imaluunniit kangerlummot aamma immamut aamma pinngortitamut kingunissai, pinngortitamut kingunissaanik naliliinerup ersarissassavaa. Suliniutip kingunerisaanik nunap aamma sumiiffiup isikkuanut, pinngortitalu qanoq issusaanut allannguutissaviit, naatsorsuutigisamillu allannguutissat pinngortitamut kingunissaanik naliliinissami allaaserineqassapput. Uani assersuutigalugu nunap ilusaa, kangerlummot imaluunniit immamut sunniutissat kiisalu uumasut najortagaannik, naasoqarfinnillu akornusersuinerit imaluunniit aserorterinerit ilanngullugit.

Naalackersuisut suliniutip kingunissaanik naliinissaanni, akuersissummilu piumasaqaasiornissaannut pinngortitamut kingunissaanik naliliineq tunngavissiissaaq. Taamaattumik Inatsisartut inatsisaat malillugu Naalackersuisut akuersissummik tunniussitinnagit, pinngortitamut kingunissaanik naliliineq tunniunneqarsimassaaq. Tassunga atatillugu qinnuteqaatip imarisassaa pillugu § 32-mi nassuiaatit innersuussutigineqarput.

Suliniut annertuumik kinguneqartussatut isigineqarsinnaanersoq pillugu, suliniut pineqartoq naliliiffigineqartariaqarpoq. Taamatut naliliinissami suliniutip qanoq ittuussusaa, annertussusaa, sumiiffiup mianernassusaa, allannguutaasinnaasullu qanoq annertutigissanersut pingaartinneqarsinnaavoq. Uumasunut sunniutissat eqqarsaatigalugit, suliniut piaqqiorfinnut, imaanilu miluumasut ingerlaarfiinut sunniuteqassanersoq pingaartinneqarsinnaavoq.

Suliniutummi sanaartortoqartariaqassappat, Inatsisartut inatsisaat manna malillugu akuersissut imminermini sanaartukkanik pilersitsinissamut periarfissiinngikkaluartoq, pingaaruteqassutsimmut piumasaqaataasup naammassineqarnissaanut tamanna imminermini tapertaasinnaavoq. Taamaakkaluartoq suliniutip ingerlanneqarnissaanut sanaartortoqarnissaa aalajangiisuusinnaavoq, taamaattumillu akuersissummik tunniussoqartinnagu pinngortitamut kingunerisinnaasai tamakkerlugit qulaajarneqarsimanissaat aalajangiisuulluni.

Nassuiaasiussalluni qinnuteqartup akisussaavoq, taanna suliniutip sunniutigisinnaasaannut ilisimasaqarnerpaammat. Suliniummik pilersaaruteqarlunilu ingerlatsisoq, avatangiisinut kingunerisinnaasaanik uppersaanissamut aamma akisussaananeramik tunngaviumumut aalajangersagaq naapertuuppoq.

Imm. 2-mut.

Pinngortitamut kingunissaanik naliliisoqassanersoq qinnuteqaatini tamani isummerfigineqartassasoq, imm. 2-mi aalajangersakkap ersarissarpaa. Qinnuteqartoq isumaqaruni tamanna pisariaqanngitsoq, tamanna qinnuteqaammi allanneqarlunilu tunngavilersorneqassaaq.

Qinnuteqaat amigarpat, tak. § 35, Naalackersuisut qinnuteqaammik itigartisisinnaapput. § 29, imm. 1 malillugu piumasaqaataatillugu qinnuteqartoq pinngortitamut kingunissaanik naliliinermik suliaqarsimanngippat, qinnuteqaat amigartutut isigineqassaaq. Taamaattumik qinnuteqaatip suliarineqarnissaanut piumasaqaatit, § 29, imm. 1 malillugu qinnuteqartoq pinngortitamut kingunissaanik naliliinermik suliaqassasoq Naalackersuisut piumasaqaatigisinnaavaat. § 35-mut nassuiaatit innersuussutigineqarput.

Imm. 3.

Pinngortitamut kingunissaanik naliliinissamut piumasaqaatit pillugit, aalajangersakkap Naalackersuisut ersarinnerusunik malittarisassiorsinnaatippai. Assersuutigalugu naliliinissap imarisassaaa aamma annertussusissaa, uppersaasiinissamut piumasaqaatit, suliamut

ilisimasalinnik naliliisitsinerit kiisalu nassuiaatip ilusissaanut piumasagaatit pineqarsinnaapput.

Nalinginnaasunik malittarisassiortoqarsinnaavoq imaluunniit suliniutit, sumiiffiilluunniit aalajangersimasut siunnerfigineqarsinnaallutik.

§ 30-mut

Imm. 1-imut.

Akuersissut malillugu ingerlatat unitsinneqarnissaannik Naalakkersuisut peqqusinissaannut, aalajangersakkap inatsisitigut tunngavissaqartippai.

Aalajangersakkap kingunerisaanik, ingerlatat aalajangersimasut unitsinneqarnissaannik Naalakkersuisut peqqusinnaapput. Ingerlataq nunap isikkuanut, kangerlummut aamma immamut imaluunniit pinngortitamut ilimanartumik annertuumik ajoqusiinnaasoq ilimagineqarpat, unitsitsinissamut peqqusisoqarsinnaavoq.

Suliniut ilimanartumik annertuumik ajoqusiissanersoq pillugu naliliinissami pisoq, pissutsillu piviusut aallaavigineqassapput. Assersuutigalugu soorlu akuersissutip tunniunneqarneranit ilimagisimasamit ingerlatassaq annertunerussasoq paasinarsippat imaluunniit avatangiisit naatsorsuutiginnisamik sunnerneqarpata.

Unitsitsinissamik peqqussut ataavartuunngilaq, pissutsillu ersarinnerusumik misissorneqarsinnaanissaasa imaluunniit ikiuutaasinnaasunik iliuuseqartoqarnissaata tungaanut annertuumik ajoqusiinissap pinngitsoortinnissaa siunertaralugu tunniunneqassalluni.

Avatangiisit innarlitsaaliorneqarnissaanik Inatsisartut inatsisaat naapertorlugu peqqussuteqarnissamut periarfissat aalajangersakkap ilavai. Nunap, kangerluup aamma immap imaluunniit pinngortitap annertuumik ajoqusernissaa aalajangersakkap pinaveersaartissavaa, taamaalillunilu ajoqusiisoqanngitsoq suli atuutilereerluni. Ingerlataq alla ajoqusiisoq pineqarpat, aalajangersagaq tunngavigalugu peqqussuteqartoqarsinnaanngilaq, tamannali inatsit alla malillugu pisariaqarluni, matumani Avatangiisit innarlitsaaliorneqarnissaanik Inatsisartut inatsisaat ilanngullugu. Uani assersuutigalugu peqqissutsimut imaluunniit avatangiisitigut ajornartorsiuteqalermik kinguneqartumik allat ingerlatsinerini atuuppoq.

Akuersissummik tunniussisoqartinnagu qinnuteqartup pinngortitamut kingunissaanik naliliinissamik pisussaaffia pillugu, aalajangersagaq § 29-mut atasutut isigineqassaaq. Pinngortitamut kingunissaanik naliliineq suliarineqareersimagaluartoq, akuersissutip tunniutereernerani ingerlataq nunap isikkuanut, kangerlummut aamma immamut imaluunniit pinngortitamut ilimanartumik annertuumik ajoqusiinnaasoq ilimagineqalerluni nutaanik pissuteqarsinnaavoq, nutaanilluunniit ilisimasaqartoqalersinnaalluni.

Ingerlataq annertuumik ajoqusiisinaanani, pissutsillu iluarsineqarsinnaangippata pissutsit patsisaallutik § 38, nr. 5 malillugu akuersissut utertinneqarsinnaavoq. Utertitsineq pillugu malittarisassat ersarinnerusumik misissornissaannut, tassunga nassuiaatit innersuussutigineqarput..

Imm. 2-mut.

Imm. 1 malillugu ingerlatamut inerteqquteqarnissamut aalajangersakkap Naalackersuisut inatsisitigut tunngavissaqartippai. Aalajangersagaq imm. 1-ip malitsigisaatut isigineqassaaq, ajoqusiinerlu unitsitsinikkut imaluunniit pinaveersaataasumik iliuseqarnikkut pinngitsoorneqarsinnaatinnagu aamma nunap isikkua, kangerluk aamma imaq imaluunniit pinngortitaq illersorniarlugit pisariaqartut nalilerneqartillugu atuutissalluni.

Ingerlataq ilimanartumik annertuumik ajoqusiissasoq nalilerneqarpat, pissutsillu iluarsineqarsinnaatinnagit inerteqquteqarneq atorineqarsinnaavoq.

Ingerlatamut inerteqquteqarneq pisut apeqquataatillugit, § 38-mi aalajangersakkat malillugit akuersissut utertinneqarsinnaavoq. Matumani aamma nunap isikkuanut, kangerlummut aamma immamut imaluunniit pinngortitamut annertuumik ajoqusiinissamik ilimanaateqanngitsunik allatigut ingerlatatigut ingerlatsisuussaataaneq naammassineqarsinnaangippat.

§ 31-mut

Imm. 1-mut.

Qinnuteqariaatsimut pingaarnertut sinaakkutit, Inatsisartullu inatsisaat malillugu Naalackersuisut akuersissutinik qanoq tunniussisinaanersut aalajangersakkap aalajangersarppaa.

Qinnuteqartoqarneratigut imaluunniit imm. 2-mi malittarisassat malillugit tamanut ammasumik qinnuteqartitsinikkut (neqeroortitsineq) Naalackersuisut akuersissutinik tunniussinissaannut, aalajangersakkap periarfissaqartippai.

Neqeroortitsinermi akuersissut ataaseq imaluunniit amerlanerusunut tunniunneqarsinnaapput. Taassumap saniatigut neqeroortitsineq sumiiffimmuut ataatsimut imaluunniit amerlanerusunut tunngassuteqarsinnaavoq.

Imm. 2-mut.

Tamanut ammasumik qinnuteqaqqusineq qinnuteqarfissamut killissarititaasoq naatinnagu minnerpaamik ullorsitini ulluni 90-ini saqqumitinneqassasoq imm. 2-p ersarissarppaa.

Saqqummiineq Naalackersuisut nittartagaanni aamma allatigut pissaaq, matumani aamma assersuutigalugu aviisini, tusagassiorfinnilu allani saqqummiussinikkut.

Taassumap saniatigut toqqaanissami piumasaqaatinik naleqquttunik, kinaassusersiunngitsunik, immikkoortitsinerunngitsunillu Naalackersuisut aalajangersaasinnaapput. Tamanna kinaassusersiunngitsumik toqqaanissamik piumasaqaatinut aamma atuuppoq. Tamanna piumasaqaatinik sunik atuisoqarnissaanik naliliinissamik tunngaveqarpoq. Qinnuteqartut akornanni toqqaanissap naleqquttumik, isertuaatsumillu ingerlanissaa toqqaanissamik piumasaqaatinik aalajangersaanerup qulakkiissavaa.

Imm. 3-mut.

Aalajangersakkami allassimavoq, suleriaatsit aalajangersarneqarsimasut malillugit qinnuteqartoqarsimagaluartorluunniit Naalackersuisut akuersissummik tunniussinngissinnaasut. Akuersissummik tunniussinissaq qaqugukkut naleqqutissanersoq pillugu Naalackersuisut aalajangiisinaanissaannut tamanna eqaassuteqartitsivoq, aamma qinnuteqarnissamut pisortatigoortumik piumasaqaataasut qinnuteqaatip naammassippagit.

Qinnuteqartoq akuersissut inatsisitigut pisinnaatitaaffiunngitsaq aalajangersakkap ersarissarpaa. Taamaakkaluartoq qinnuteqaatinik itigartitsitsinerni tamani ingerlatsinermi inatsisitigut nalinginnaasumik tunngavissat malillugit, Inatsisartullu inatsisaanni malittarisassat allat naapertorlugit pisassaaq.

Imm. 4-mut.

Neqeroortitsinissat qanoq ingerlanneqarnissaannut malittarisassanik ersarinnerusunik Naalackersuisut aalajangersaasinnaanissaannut aalajangersakkap pisinnaatippai. Uani suleriaasissap qanoq aaqqissuunneqarnissaannut malittarisassat ilaatinneqarsinnaapput, matuma qinnuteqarnissamut piffissaliussaq, uppersaanissamullu piumasaqaatit ilanngullugit.

Qinnuteqaatinik toqqaanissami piumasaqaatit suut pingaartinneqassanersut pillugit, Naalackersuisut aamma malittarisassanik aalajangersaasinnaapput. Assersuutigalugu misilittakkat, aningaasatigut imaluunniit teknikkikkut nammassinnaasat pingaartinneqarsinnaapput.

Taassumap saniatigut naliliinissami ataatsimiititaliaq pillugu, taassumallu katitigaanissaa pillugu Naalackersuisut malittarisassanik aalajangersaasinnaapput. Assersuutigalugu paasisimasaqarnissamut piumasaqaataasinnaapput imaluunniit oqartussanik akuutitsinerusinnaalluni.

§ 32-mut

Imm. 1-imut.

Misissueqqaarnissamut, atuinissamullu piumasaqaatit pillugit qinnuteqaatinut piumasaqaatit § 32-p aalajangersarpai.

Atuinissamut akuersissutininik qinnuteqaatit § 33 naapertorlugu suliniutitut pilersaarummik ilaqassapput. Suliniutitut pilersaarummut piumasaqaatit misissornissaannut tassunga nassuiaatut innersuussutigineqarput.

§ 41 naapertorlugu qinnuteqaat suliarineqarsinnaaqqullugu pisariaqartutut nalilerneqartillugu, Naalakkersuisut qinnuteqartumit paasissutissanik annertunerusunik noqqaasinnaapput. Ersarinnerusunik misissuinissamut tassunga nassuiaatit innersuussutigineqarput.

Qinnuteqaammut piumasaqaatissat, paasissutissallu tunniunneqartussat annertussusissaasa inissinnissaanni suliniutip annertussusaa eqqarsaatigineqassaaq. Suliniutini mikinerusuni paasissutissat pisariaqartut, suliniutitut anginerusunut sanaartukkanik il.il. pilersitsiviusariaqartunut sanilliullugu annikinnerusinnaapput.

Nr. 1

Ingerlatassat akuersissummik qinnuteqarfigineqartut, qinnuteqaammik nassuiarneqarsimassapput.

Atuinissamut ingerlatsinissamut imaluunniit misissueqqaarnissamut akuersissummik qinnuteqartoqarnerisooq tassani allanneqassaaq.. § 4 malillugu ataatsimoortumik qinnuteqaat eqqarsaatigalugu, § 8 malillugu kisermaassisussaatitaaffilerlugu qinnutigineqarpat taanna aamma allanneqassaaq.

Taassumap saniatigut ingerlatassat ataasiakkaat nassuiaatigineqassapput. Pilersaarutaasumik ingerlatassat ersarissumik paasineqarsinnaanngorlugit nassuiaat peqqissaartumik allassimassaaq, taamaalilluni inatsit atuuttoq naapertorlugu nalilerneqarsinnaaniassammata.

§ 4 malillugu atuinissamut qinnuteqaatit eqqarsaatigalugit aalajangersagaq § 33-mut, suliniummik immikkut pilersaaruteqarnissaanik qaavatigut piumasaqaateqartumut atasutut isigineqassaaq.

Nr. 2

Sermimik, imermillu atuinissamut ingerlatassanik ingerlatsinissamut akuersissummik nunataq qinnuteqarfigineqartoq pillugu qinnuteqaat paasissutissartaqassaaq.

§ 19, sumiiffik akuersissuteqarfiusoq naleqqanik, killiliussanik imaluunniit sumiiffimmut allatigut pingaarutilinnik aalajangersakkatigut killilersorneqarsinnaaneramik ersarissaasoq innersuussutigineqarpoq. Taamaalilluni akuersissutit eqqortumik suliarineqarnissaa, killilersorneqarnissaalu qulakkeerumallugu sumiiffiit ingerlatanik ingerlatsiviusussat pillugit, qinnuteqartup eqqortumik nalunaarutiginninnissaa pingaaruteqarpoq.

Nr. 3

Pisinnaatitsissummik pigisaqartumut §§ 11-13-imi piumasaqaatinik qinnuteqartup naammassinninneranut, qinnuteqaat uppersaatinik ilaqassaaq.

§ 11 naapertorlugu ingerlatseqatigiiffik qinnuteqartoq aktianik piginneqatigiiffiussaaq imaluunniit pigineqataassuteqarluni ingerlatseqatigiiffiussaaq Kalaallit Nunaanni angerlarsimaffeqartoq. Tassunga uppersaatatit assersuutigalugu CVR-inut nalunaarsuiffimmit uppersaataat, ingerlatseqatigiiffiup suuneranik, sumilu angerlarsimaffeqarneranik uppersaasooq atorseqarsinnaavoq.

Taassumap saniatigut qinnuteqartup § 12-imi aningaasatigut piumasaqaatit naammassillugit, qinnuteqartup uppersaasavaa. Pisortanut akiitsut pillugit akileraartarnermut aqutsisoqarfimmit uppersaataat tassunga uppersaataasinnaavoq. Assersuutigalugu ingerlatseqatigiiffimmi aqutsisunut imaluunniit piginnittuvinnut Pinerluuteqarsimasunik Qitiusumik Nalunaarsuiffimmit uppersaatatit (pinerluuteqarsimannginnermut uppersaatatit) kiisalu ingerlatseqatigiiffimmut piumasaqaatit eqqarsaatigalugit ilumoorluinnarluni nalunaarutit aamma uppersaataatigineqarsinnaapput.

Kiisalu § 13 naapertorlugu pisariaqartumik qinnuteqartut paasisimasaqarlutik qinnuteqartup uppersaasavaa. Tamanna qinnuteqartut piginnaasaannik, misilittagaannillu paasisutissatigut, inuillu attuumassuteqartut CV-annik saqqummiussinikkut uppersarneqarsinnaavoq.

Ersarinnerusumik misissornissaannut §§ 11-13-imut nassuiaatit innersuussutigineqarput.

Nr. 4

Suliniutip teknikkikkut, aningaasatigullu ingerlanneqarsinnaanera pillugu § 15-imi piumasaqaatit suliniutip naammassissagai pillugu, qinnuteqaat aamma uppersaateqassaaq.

§ 15-imi allasimasutut suliniut teknikkikkut, aningaasatigullu ingerlanneqarsinnaasooq qinnuteqartup qularnarunnaarsippagu aatsaat, akuersissut tunniunneqarsinnaavoq. Piffissami qinnuteqarfiusumi tamanna qularnarunnaarsinneqarsinnaanngippat, piffissaliussatut aalajangersarneqartup iluani ingerlanneqarsinnaaneranut uppersaataat saqqummiunneqarnisaanik piumasaqaatitalimmik, piumasaqaatitalerlugu akuersissummik tunniussisoqarsinnaavoq, tak. § 16.

Akuersissutit, oqartussallu akuersissutaat pisariaqartut allat, qinnuteqartup piffissami qinnuteqarfiusumi pissarsiarisimasai qinnuteqaammut ilanngunneqarsinnaapput.

Ersarinnerusumik misissornissaannut §§ 15-imut aamma 16-imut nassuiaatit innersuussutigineqarput.

Nr. 5

Taassumap saniatigut § 39-mi malittarisassat malillugit, qinnuteqaat pinngortitamut kingunissaanik naliliinermik ilaqassaaq. Qinnuteqartoq isumaqaruni pinngortitamut kingunissaanik naliliisoqartariaqanngitsoq, tamanna qinnuteqaammi tunngavilersorneqassaaq, tak. § 29, imm. 2.

Pinngortitamut kingunissaanik naliliinissamut piumasaqaatit ersarinnerusumik misissornissaannut, § 29-mut nassuiaatit innersuussutigineqarput.

Nr. 6

Kiisalu qinnuteqaat paasissutissanik pingaarutilinnik allanik imaqassaaq. Tassani paasissutissaasinnaapput nr. 1-5-imi eqqaaneqaratik, qinnuteqaammik tamakkiisumik aamma eqqortumik naliliinissamut pisariaqartut.

Taamaalilluni nr. 1-5-imi allattukkat tamakkiisuunngillat.

Naalackersuisut qinnuteqaammik suliaqarnerini paasissutissat pingaaruteqarsinnaasut, qinnuteqartullugu pigisai aalajangersakkami aamma pineqarput. Aalajangersagaq § 41-mut atasutut isigineqassaaq, taassuma kingorna qinnuteqartup ingerlataminnik oqartussat suliaqarnerini paasissutissat, uppernarsaatillu pisariaqartut tamaasa tunniutissavai. Assersuutigalugu sumiiffimmi pissutsit pillugit annerusumik uppernarsarlugit paasissutissiissutigineqarnissaat pineqarsinnaavoq. Assersuutigalugu pinngortitamik, kulturikkut avatangiisunik imaluunniit uumasoqassutsimut sunniutaagallartussat pillugit aarlerinarsinnaasut pillugit aalajangersimasumik imaluunniit ilassutitut naliliinerit aamma pineqarsinnaapput. Qinnuteqartoq qinnuteqartinnani sumiiffik imaluunniit suliniut pillugu pissutsinik piviusunik imaluunniit inatsiseqarnermut tunngasunik nalunaarusiortitsisimaguni, taakkua pisut aallaavigalugit aalajangersakkamut ilaasutut paasissutissatut pingaarutilittut isigineqarsinnaapput.

Imm. 2-mut.

Qinnuteqaatip imarisassaanutpiumasaqaatinut ersarinnerusunik piumasaqaatinik Naalackersuisut aalajangersaanissaannut, aalajangersakkap piginnaatippai. Uani assersuutigalugu qinnuteqartoq, ingerlatseqatigiiffiup qinnuteqartup aaqqissuussaanaera aamma aqutsisui pillugit paasissutissat ersarinnerusut pillugit piumasaqaataasinnaapput kiisalu pinerluuteqarsimasunik nalunaarsuiffimmit aallarnissamut pisariaqartumik akuersissutit piumasaqaataasinnaasut. Suliniut pillugu paasissutissanut kiisalu allatigut uppernarsaanissamut piumasaqaatit pillugit malittarisassanik aamma aalajangersaasoqarsinnaavoq. Soorlu assersuutigalug nunap assingaasinnaapput, teknikkimut paasissutissaasinnaapput imaluunniit saaffissaasinnaapput.

Taassumap saniatigut § 4 malillugu akuersissutinik qinnuteqaatinut atugassamik nalinginnaasumik qinnuteqarfissamik Naalackersuisut suliaqarsinnaatinneqarput, taassumallu atorneqarnissaanut piumasaqarsinnaatinneqarlutik.

§ 33-mut

Imm. 1-imut.

§ 4 malillugu atuinissamut akuersissummik qinnuteqaat, suliniutitut pilersaarummik ilaqarnissaa pillugu aalajangersagaq piumasaqaasiivoq.

§ 4, imm. 3 malillugu misissueqqaarnissamut immikkut akuersissutitut imaluunniit malitsigisaanik § 10 malillugu avammut tunisinissamut akuersissummik qinnuteqaammut piumasaqaat aallaavittut atuutinngilaq.

Taamaakkaluortoq § 41 naapertorlugu, suliap suliarineqarnissaani pisariaqartunik paasissutissanik annertunerusumik Naalakkersuisut piumasaqarsinnaapput.

Pissutsinik nr. 1-7-imi taaneqartunik nassuiaat paasissutissartaqassaaq.

Suliniutitut pilersaarummut § 33-mi piumasaqaataasut, suliniutip nassuiaataata imarisassaanut minnerpaatut piumasaqaataapput. Suliniutip annertussusaa, katitigaaneralu apeqqutaallutik paasissutissat qanoq annertutigissanersut nikerarsinnaavoq. Suliniutitut mikinerusunut paasissutissat annikinnerusunik pisariaqartinneqarsinnaapput, suliniutinulli anginerusunut pissusissamisoortumik paasissutissat annertunerussallutik. Imaappoq, paasissutissat naatsorsuutigineqartut, suliniutip annertussusaata ersersissinnaagai.

Nr. 1

Suliniutip siunertaa nassuiaammi nassuiaatigineqassaaq. Suliniutip suna angussallugu siunertarineraa, ingerlatassallu suut ingerlanneqassanersut nassuiaammi ersarissumik nassuiarneqarsimassaaq.

Suliniutip annertussusaa qinnuteqartup nassuiaatigissavaa. Uani suliniutip angissusaa, pisuussut sunarpiaq atorneqarniarnersoq, nunatarlu suna pineqarnersoq pillugu nassuiaat ilanngunneqarsinnaavoq.

Suliniut qanoq ingerlanneqartussatut pilersaarutigineqarnersoq qinnuteqartup nassuiaatigissavaa. Assersuutigalugu suliniut maskiinanik angisuunik atuiffiusariaqarnersoq, umiarsuit suut atorniarneqarnersut, sanaartugassanik pilersitsinissaq il.il. allassimasinnaapput.

Suliniutip ingerlanneqarsinnaanera, aarlerinartullu Naalakkersuisut nalilersinnaaniassamatigit suliniummi immikkoortut pingaaruteqarnerpaat, immikkoortunilu tamani naatsorsuutigisamik piffissamik atuinissat piffissaliussami allassimassapput.

Nr. 2

Suliniutissatut pilersaarut, suut nioqqutissiarineqassanersut pillugit paasissutissartaqassaaq. Nioqqutissat suuneri, pitsaassusaallu nassuiaatigineqassapput, matumani nioqqutissat iluaqutissatut imaluunniit suliffeqarfinni siunertanut, assersuutigalugu nunalerinermi atorneqassanersut ilanngullugu.

Nr. 3

Taassumap saniatigut pitsaassutsip qulakkeerneqarnissaanut suleriaatsit imaluunniit malittarisassat suut atorneqassanersut pillugu suliniutissatut pilersaarummi allassimassaaq. Uani nioqqutissiarineqartut malittarisassanik pingaarutilinnik naammassinninnissaasa qulakkeerneqarnissaanut pingaaruteqarsinnaasut ilaatigut pitsaassutsimik nakkutilliinerit imaluunniit uppersaananerit ilaatinneqarsinnaapput.

Nr. 4

Sermeq, imerlu naatsorsuutigisamik qanoq annertutigisoq atorniarneqarnersoq suliniutitut pilersaarummi allassimassaaq. Annertussusissat pillugit kisitsisitigut paasissutissat eqqortut, soorlu assersuutigalugu qaammammut imaluunniit ukiumut naatsorsuutigisamik pissarsiassat literinngorlugit paasissutissat kiisalu kisitsisit taakkua qanoq naatsorsorneqarnersut paasissutissiissutigineqassaaq.

Nr. 5

Suliniutitut pilersaarut aningaasalersuinissamik pilersaarutitaqassaaq, aningaasatigullu angusassatut naatsorsuutigisat pillugit nassuiaatitaqassalluni. Tassani isertitassatut naatsorsuutigisat takussutissartaa ilaatinneqassaaq, soorluttaaq suliniutip aallartisarneqarnera, ingerlanneqarneralu qanoq aningaasalersorneqarnissaat pillugu nassuiaammik ilaqassasoq. Assersuutigalugu nammineq aningaasaatitigut, allat aningaasaliinerisigut imaluunniit allatigut aningaasalersuineq pissanersoq, imm. 1-ilu naapertorlugu piffissaliussami taaneqarlutik immikkoortuni assigiinngitsuni aningaasat ataavartumik qanoq atorneqassanersut aamma allassimassaaq.

Suliniut aningaasatigut ingerlanneqarsinnaananerani qinnuteqartup qularnarunnaarsitsinissaanik piumasaqartumut § 15-imut, aalajangersagaq atasutut isigineqassaaq. Taassumap ersarinnerusumik misissornissaanut tassunga oqaaseqaatit innersuussutigineqarput.

Nr. 6

Kalaallit Nunaanni aamma avataanit sulisunik, pilersuisunillu atuinissaq pillugu suliniutitut pilersaarut nassuiaatitaqassaaq. Assersuutigalugu najukkami suliffeqarfinnik imaluunniit nunat tamalaat akornanni suleqatigisanut suleqatigiinnissamik isumaqatigiissutit, piginnaasanillu sunik tapersiissanersut paasissutissiissutigineqarsinnaapput.

Nr. 7

Akuersissutip uninnerani imaluunniit utertinnerani suliniut qanoq naammassineqassanersoq, suliniutissatut pilersaarummi nassuiaatigineqassaaq. Torersaanissaq, matumani suleriaatsit malinneqartussat ilanngullugit, pisinnaatitsissummik pigisaqartup qanoq qulakkeerniarnerai ersarissumik allassimassaaq.

Suliniut sanaartornissamik ilaqarpat, akuersissutip uninnerani taakkua qanoq peerneqassanersut imaluunniit aserfallatsaaliineqassanersut allassimassaaq. Sanaartukkat qanoq, qaqugukkullu piiarneqassanersut imaluunniit ingerlatassatut, aserfallatsaaliugassatullu tunniunneqassanersut allassimassaaq.

Tassumap saniatigut akuersissutip uninnerani naleqquttumik torersaanissaq imaluunniit aserfallatsaaliinissaq aningaasatigut qanoq qulakkeerneqassanersoq allassimassaaq.

Iluarseeqqinnissamut aningaasartuutissanut qularnaveeqqusiinissaq pillugu § 27-mut atasutut, aalajangersagaq isigineqassaaq. Taassumap ersarinnerusumik misissornissanut tassunga oqaaseqaatit innersuussutigineqarput.

Nr. 8

Kiisalu suliniutip tamakkiisumik naliliiffigineqarnissanut paasissutissanik pingaaruteqartunik allanik suliniutissatut pilersaarut paasissutissartaqassaaq. Tassani assersuutigalugu ilassutitut uppernarsaatit, piujuartitsinissaq pillugu paasissutissat, aarlerinarsinnaasunik naliliinerit, upalungaarsimanissamut pilersaarutit, teknikikkut imaluunniit inatsisitigut misissueqqissaarnerit kiisalu peqarpat soqutigisaqaqatigiinnit nalunaarutit ilanngunneqarsinnaapput.

Imm. 2

Pilersaarutip nassuiaataanut, matumani ilusissaa imassaalu ilanngullugit, ersarinnerusunik malittarisassanik Naalakkersuisut aalajangersaasinnaannut aalajangersakkap piginnaatippai. Tassani assersuutigalugu immikkoortitaakkanik nalunaarsuiffimmut, qanorlu annertutigisumik annikitsortaanik ilanngussisoqarnissanut piumasaqaataasinnaapput.

§ 34-mut

Imm. 1-imut

§ 10 malillugu avammut tunisinissamut akuersissummik qinnuteqaammut piumasaqaatinik aalajangersagaq aalajangersaavoq.

Avammut tunisinissaq akuerineqarsinnaanersoq pillugu, matumani piujuartitsinissaq,

Nr. 1-6-imi allassimasut minnerpaatut piumasaqaataapput. Taamaalilluni qinnuteqaatip suliarineqarnissaani pisariaqartillugu Naalakkersuisut qinnuteqartumit annertunerusumik paasissutissanik noqqaasinnaapput, tak aamma § 41.

Nr. 1.

Avammut tunisinissap siunertaa qinnuteqaammi ersarissumik allassimassaaq, matumani ersarissumik taasamik misissueqqaarnissamik ingerlatsinissaq imaluunniit atunissamik ingerlatsinissaq siunertaralugu avammut tunineqarniarnersoq ilanngullugu.

Nr. 2.

Tunisassiorneq Kalaallit Nunaanni imaluunniit avataani pissanersoq imaluunniit imermik bulkimut avammut tunisisoqarniarnersoq qinnuteqaammi paasissutissiissutigineqassaaq. Siunnersuutip § 24-a malillugu akiliutissaq pillugu piunasaqaatissamik aalajangersaanissamut atatillugu paasissutissaq pingaaruteqarpoq.

Nr.3

Sermeq, imerlu qanoq annertutigisoq avammut tunisassatut missiliuutigineqartut qinnuteqaammi allassimassapput. Annertussusissat pillugit kisitsisitigut paasissutissat eqqortut, soorlu assersuutigalugu qaammammut imaluunniit ukiumut naatsorsuutigisamik pissarsiassat literinngorlugit, kubikmeterinngorlugit imaluunniit tonsinngorlugit ilanngullugit paasissutissiissutigineqartariaqarput.

Nr. 4.

Taassumap saniatigut nuna tunitsivik avammut tunisinissamut akuersissummi allassimassaaq.

Nr. 5.

Piffissaq avammut tunisinissamut akuersissummi qinnutigineqartoq allanneqassaaq, soorlutaaq aalajangersimasumik nassiussassat pillugit paasissutissat ilanngunneqarsinnaasut. Oqaatigineqaassaaq, avammut tunisinissamut akuersissut piffissaligaammat, ukiumullu qinnutigineqaqqittariaqartarluni, tak. § 10, imm. 3.

Nr. 6.

Assartueriaasissaq pillugu, uani assersuutigalugu umiarsuarmik, timmisartumik, allamilluunniit assartuisoqartassanersoq pillugu qinnuteqaat paasissutissartaqassaaq, soorlutaaq assartuinermi avatangiisinut sunniutaasinnaasunik naliliinermik ilaqassasoq.

Naliliinermi ilaatigut umiarsuup qanoq ittuunissaa, ikummatissaq, angallavissamik toqqaaneq, aniatitsinissaq, sumiiffimmi soorlu silaannarmik mingutsitsinertut, nipiliornikkullu avatangiisinut sunniutaasinnaasut imaluunniit artinik allaneersunik siammartiterisinnaaneq nassuiaatigineqarsinnaapput.

Nuna nassitsivik tikillugu assartueriaasissaq tamaat allaatigineqarluni, nassitsivimmit nuna nassitsivik tikillugu assartueriaatsit atorneqartussat tamaasa sapinngisamik paasissutissiissutigineqassapput.

Nr. 7.

Kiisalu avammut tunisinissamut akuersissummik qinnuteqaat, paasissutissanik pingaarutilinnik allanik paasissutissartaqassaaq. Uani assersuutigalu suleqatissat, akuersissutit imaluunniit uppersaatit attuumassuteqartut, avammut tunisinermi akorngini suleqateqassappat taakkua pillugit paasissutissat imaluunniit paasissutissat avammut tunisinissamik suliniut eqqarsaatigalugu immikkut pingaarutillit pillugit paasissutissaasinnaapput.

Qinnuteqaatip nalilerneqarnissaanut paasissutissanik pingaaruteqarsinnaasunik tamanik, aamma nr. 1-4-mi toqqaannartumik taaneqanngikkaluartunik Naalakkersuisut pissarsisinaanissaat aalajangersakkap qulakkeerpaa.

Imm. 2-mut.

Sermimut, imermullu inuussutissatut imaluunniit nerisassiornermi atugassatut atorneqartussanut avammut tunisinissamut akuersissummik qinnuteqartoqarpat, peqqissutsimut aamma eqqiluisaarnermut akuersissutit pisariaqartut qinnuteqaammut ilanngunneqassapput. Uani ilaatigut erngup pitsaassusaanut uppernarsaat, misissueqqaarnermi inernerit, oqartussanit attuumassuteqartunit inuussutissanut akuersissutit ilanngunneqarsinnaapput.

Imm. 3-mut

Imm. 1-imi aamma 2-mi piumasaqaataasut, § 10, imm. 3 napertorlugu avammut tunisinissamut akuersissutit nutarterneqarnissaanik qinnuteqarnermi aamma atuuttut, aalajangersakkap aalajangersarpaa. Avammut tunisineq allannguuteqanngippat, paasissutissat siornatigut nassiunneqarsimasut atoqqinneqarsinnaassapput.

Imm. 4-mut

Avammut tunisinissamut akuersissutinik qinnuteqaatinut ersarinnerusunik malittarisassanik Naalakkersuisut aalajangersaanissaannut aalajangersakkap piginnaatippai, matumani avammut tunisinissamik qinnuteqarnermi uppernarsaanissamut aamma qinnuteqarfissanik aalajangersimasunik atuinissamik piumasaqaat ilanngullugu.

Til § 35

Imm. 1-imut.

Piumasaqaatit §§ 32-34-mi aalajangersarneqartut qinnuteqaatip naammassinngippagit, Inatsisartut inatsisaat malillugu qinnuteqaat Naalakkersuisut itigartissinnaagaat, aalajangersakkap aalajangersarpaa.

Taamaalilluni piumasarineqartunik qinnuteqaat amigaateqarpat, § 35 malillugu qinnuteqaammik itigartitsisoqarsinnaavoq. Qinnuteqaatilli §§ 32-34-mi piumasaqaataasut naammassippagit, inatsisitigulli piumasaqaataasut allat naammassineqanngitsut nalilerneqarpat, ingerlatsineri inatsisitigut nalinginnaasumik tunngaviit malillugit qinnuteqaat itigartissallugu pissusissamisuuksaaq.

Imm. 2-mut.

Qinnuteqaat piumasaqaataasunik amigaateqassappat, imm. 1 malillugu itigartitsisoqannginnerani, qinnuteqartup amigaataasunik tunniussinissaanut naleqquttumik periarfissinneqarnissaanut imm. 2-p periarfissippaa. Qinnuteqaatip itigartinnissaa sioqqullugu,

qinnuteqartoq qinnuteqaammik iluarsiinissaanut sapaatip akunnerinik marlunnik periarfissinneqassaaq. Piffissaliussap qaangiunnerani qinnuteqartup piumasaqaataasut suli naammassinngippagit, qinnuteqaat erngertumik itigartinneqarsinnaavoq. Taamaakkaluortoq qinnuteqartoq itigartinneqareerluni, qinnuteqaammik nassitseqqinnissaminut mattunneqanngilaq.

Imm. 3-mut.

Qinnuteqaammik iluarsiinissamut sapaatip akunnerinik marlunnik piffissaliussamit Naalalackersuisut immikkut akuersissuteqarnissaannut, aalajangersakkat pisinnaatippai.

Paasissutissat ilaat pissarsiariniarlugit utaqqinarsinnaanera, taamaattumillu sapaatip akunnerinik marlunnit sivisunerusumik piffissamik pisariaqartitsisoqarnera aalajangersakkami eqqarsaatigineqarpoq. Soorlu assersuutigalugu paasissutissat misissoqqissaartariaqarnerisigut, nalilersoqqaartariaqarnerisigut imaluunniit oqartussanit allanit paasissutissanik pissarsisoqartariaqartillugu suliaq sivisuumik suliarisussaattillugu.

Immikkut akuersissuteqassagaanni pissutsit immikkuullarissuusariaqarput, piffissaliussallu sivitsorneqarnissaa qinnuteqartup tunngavilersortariaqarlugu.

§ 36-mut

Imm. 1-imut.

§ 4 malillugu akuersissummik tunniussisoqartinnagu kommunimi pineqartumi kommunalbestyrelsi tusarniaaffigineqassasoq, aalajangersakkap aalajangersarpaa.

Kommunalbestyrelsi sorliup tusarniaavigineqarnissaanni, pisuussutip qinnutigineqartup sumiinnera apeqqutaassaaq. Kommunalbestyrelsi imaluunniit Nunaqqatigiit Siunnersuisoqatigiivi sumiiffimmi annertuumik ilisimasaqarsinnaapput, suliniummullu soqutigisaqarsinnaallutik, matumani pilersaarusiornissaq, attaveqaasersuutit, najukkami inuussutissarsiornermut tunngasut aamma eqqarsaatigalugit. Taamaalillu suliniut pineqartoq aalajangiisoqartinnagu kommunalbestyrelsip pingaarutilinnik immersueqataanissaanut periarfissinneqarnissaa tusarniaanerup qulakkiissavaa.

§ 4 malillugu misissueqqaarnissamut akuersissutit, atuinissamullu akuersissutit aalajangersakkamut aamma ilaapput. Taamaakkaluortoq § 10 malillugu avammut tunisinissamut akuersissutit aalajangersakkamut ilaangillat. Pissutsilli apeqqutaatillugit qinnuteqaatini taamak ittuni, ingerlatsinermt inatsimmi tunngavimmut naapertuuttumik kommunalbestyrelsi tusarniaaffigissallugu pingaaruteqarsinnaavoq.

Kommunit tusarniaaffigineqarnissaannut malittarisassat, sumiiffiup akuersissuteqarfiusup allilerneqarnissaa imaluunniit allanngortinneqarnissaa pillugu § 20 malillugu aalajangiinissani

aamma atuupput, tak. § 20, imm. 2. Ersarinnerusumik misissuinnissamut tassunga nassuiaatit innersuussutigineqarput.

Imm. 2-mut.

Suliniut inuiaqatigiinnut, avatangiisitigut imaluunniit inuussutissarsiutitigut annertuumik sunniteqarsinnaasutut nalilerneqarpat, Naalackersuisut qinnuteqaat tamanut tusarniutigissagaa aalajangersakkap aalajangerpaa.

Inuiaqatigiinnut, avatangiisinut imaluunniit inuussutissarsiornermut tunngasunut suliniut annertuumik kinguneqartussatut isigineqarnerseq, pisumik naliliinermik aallaaveqassaaq.

Piujartitsisussamik atuinissaq, teknikkimut tunngasut, inuiaqatigiillu soqutigisaat eqqarsaatigalugit, imaluunniit suliniutip allatigut ingerlanneqarsinnaassanngikkaluartup piviusunngortinneqarnissaanut pisariaqartillugu aatsaat kisermaassisussaataaneq tunniunneqartarmat, kisermaassisussaataaffilerlugu atuinissamut qinnuteqaatit annertuutigut aalajangersakkamut ilaatinneqartassapput, tak. § 8.

Suliniutip sanaartorfigeqqusaanngitsut imaluunniit illuaraqarfiit sunnissappagit aamma nunamut, kangerlummut, immamulluunniit kingunissaqartillugu imaluunniit aalisarnermut, inuussutissarsiutitigut ingerlatanut allanut imaluunniit pinngortitamut, matumani aamma uumasunut nujuartarnut aamma naasunut kingunissaqartillugu taakkua tamanut tusarniutigineqarnissaanut tunngaviusinnaapput.

Suliniutit anginerusut inuiaqatigiinnut, avatangiisinut imaluunniit inuussutissarsiutinut tunngasunut annertuumik sunniteqarsinnaasutut isigineqartariaqarput.

Killuanik suliniutit annertunngippata, ingerlatallu utaqqiisaagallartuinnaassappata imaluunniit annikitsuinnaassapata imaluunniit inuiaqatigiinnut, avatangiisinut imaluunniit inuussutissarsiutinut tunngasunut malunnaataanngitsunik kinguneqartussatut naatsorsuutigineqarpat taakkua tusarniutigineqartariaqanngissinnaapput.

Suliap naammattumik paasissutissiissutiginnissaata qulakkeerneqarnissaa, pisuni tamani aalajangiisuuvoq.

§§ 32-34 malillugit qinnuteqaammi pingaarutillit kisimik tamanut tusarniutigineqarsinnaapput. Taamaalilluni atortussat suut pingaaruteqarnerinik naliliinissaminni, Naalackersuisut missiliuillutik naliliissusanngortinneqarput. Uani pingaartumik ingerlatassat akuersissummik qinnuteqarfigineqartut nassuiaataat, sumiiffik akuersissuteqarfissatut qinnutigineqartoq pillugu paasissutissat, pinngortitamut kingunissaanik naliliineq, suliniutissatullu pilersaarutip ilaa ilanngutissallugit pingaaruteqarsinnaavoq. Tamanut saqqummiussisoqartinnagu atortut ilanngunneqartussaannngitsunik, matumani aamma isertuunneqartussanik imaluunniit

mianersuuttariaqartunik paasissutissartaqarnersut Naalackersuisut isumaliutigisariaqarpaat. Paasitinneqarsinnaatitaanermut inatsimmi allagaatinik takunnissinnaatitaaneq pillugu malittarisassat, naliliinermi ilaatigut isiginiarneqassapput.

Tamanut tusarniaanissami malittarisassat, sumiiffiup akuersissuteqarfiusup allilernerqarnissaa imaluunniit allangortinneqarnissaa pillugu § 20 malillugu aalajangiinissani aamma atuupput, tak. § 20, imm. 2. Ersarinnerusumik misissuinissamut tassunga nassuiaatit innersuussutigineqarput.

Imm. 3-mut.

Tusarniaaneq aallaavittut sapaatip akunnerinik sisamanik sivisussuseqassasoq aalajangersakkap aalajangersarpaa. Tamanna imm. 1 malillugu kommunimut tusarniaanissami, aamma imm. 2 malillugu tamanut tusarniaanissami atuuppoq.

Immikkut pissutissaqarpat, tusarniaanermi piffissaliussaq sivikinnerusinnaavoq imaluunniit sivisunerusinnaavoq.

Immikkut pissutsit assersuutigalugu tassaasinnaapput suliniutip suussusaa aamma annertussusaa. Suliniutit avatangiisinut imaluunniit inuiaqatigiinnut kinguneqassallutik annertuppata, imaluunniit nunani allani ingerlatsisunik imaluunniit oqartussanik attuumassuteqartunik allanik attaveqarneq pillugu piffissaqarnerunissaq pisariaqartinneqartillugu, tusarniaaneq sivisunerusinnaavoq.

Tusarniaanermi piffissaq suliniummut naleqqussartussanngorlugu, pissutsit immikkut itnut suliani ataasiakkaani naliliiffigineqartassapput.

§ 37-mut

Imm. 1-imut.

Inatsisartut inatsisaat malillugu allaffissornikkut suliassat Naalackersuisut oqartussanut allanut imaluunniit namminersortunut suliakkiussinnaagaat siunnersuutigineqarpoq. Allaffissornikkut suliassanik, assersuutigalugu suliat suliarineqartarnerinik aamma nakkutilliinermik Naalackersuisut suliakkiisinnaanerinik aalajangersakkap piginnaatippai. Akuersissutuni piumasaqaatinik aamma malittarinninnerusinnaavoq. Tamanna assersuutigalugu nakkutilliinermi imaluunniit qinnuteqaatinik teknikkimut tunngangaatsiartunik suliaqarnermi suliambut ilisimasaqarnissaq naleqqussinnaatillugu naleqqussinnaavoq. Isumalluutitigut allaffeqarfiup avataanit ikiorserneqarnissaa pisariaqartinneqarpat aamma, tamanna naleqqussinnaavoq.

Assersuutigalugu namminersortut tassaasinnaapput siunnersuisarfiit, suliassaqarfimmut ilisimasaqartut.

Suliassanut aalajangersagaq malillugu suliakkiissutigineqartunut Naalackersuisut suli akisussaapput, matumani Inatsisartut inatsisaat eqqortumik ingerlanneqarnissaa ilanngullugu.

Aalajangiisinnaatitaanernik namminersortunut tunniussinissamut aalajangersagaq pisinnaatitsinngilaq.

Nakkutilliinissamik suliassaq oqartussanut allanut imaluunniit namminersortunut suliakkiissutigineqassappat, nakkutilliinissamik malittarisassat atuuttut oqartussap allap, namminersortulluunniit malinnerani Naalackersuisut nakkutigissavaat.

Imm. 2-mut.

Auliassat namminersortumut suliakkiunneqassappata, Pisortat ingerlatsineranni suliassat sularineqartarnerat pillugu Inatsisartut inatsisaat, Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat aamma Inatsisartut Ombudsmandiat pillugu Inatsisartut inatsisaat. Imaappoq, suliaq pisortat ingerlatsinerisa avataani sularineqaraluarpuunniit ingerlatsinermi ileqqorissaarneq pillugu malittarisassat, illuatungerisanut tusarniaanissaq, tunngavigineqartut, sulianillu takunnissinnaatitaaneq suli malinneqassapput.

Imm. 3-mut.

Inatsisartut inatsisaata atornissaa pillugu, malittarisassanik ersarinnerusunik Naalackersuisut aalajangersaasinnaannaannut, aalajangersakkap piginnaatippai. Assersuutigalugu oqartussat allat imaluunniit suliffeqarfiit namminersortut suliamik qanoq isumaginninnissaat pillugu aamma uppersaanissamut, nalunaarusiornissamut, nakkutilliinissamullu suut piunnaasaataassanersut kiisalu suliambut akuusut akornanni paasissutissat ingerlateqqittarnerinut suleriaasissaq pillugit malittarisassaasinnaapput.

Maalaaruteqarsinnaaneq pillugu malittarisassanik Naalackersuisut aamma aalajangersaasinnaapput. Tamannali maalaaruteqarsinnaanermik, matumani aamma maalaaruteqarsinnaaneq inatsisitigut aalajangersagaanngitsumik annikilliliisunik malittarisassanik aalajangersaanissamut inatsisitigut tunngavissinngilaq.

§ 38-mut

Nr. 1-6-imi pissutsinik pisoqartillugu, Inatsisartut inatsisaat malillugu akuersissummik Naalackersuisut utertitsisinnaasut, aalajangersakkap ersarissarpaa.

Akuersissummik utertitsineq ingerlatsinermi inatsisitigut aalajangiineruvoq. Taamaalilluni ingerlatsinermi inatsisitigut nalinginnaasumik tunngavissat malillugit, matumani aamma tunngavilersorluanaanissamik tunngavik, misissuinissamut tunngavik, naatsorsuuteqarnissamik tunngavik, naligiissitsinissamut tunngavik, naleqquttumillu tunngaveqartitsinermut tunngavik malillugit utertitsisoqassaaq. Taassumap saniatigut aalajangersagaq malillugu utertitsineq, § 39-mi suleriaaseq naapertorlugu pissaaq. Ersarinnerusunik misissuinissamunt tassunga nassuiaatit innersuussutigineqarput.

Utertitsinissamut patsisit imm. 1-imi allattorneqartut, pissutsit akuersissummik utertitsinissamik kinguneqarsinnaasut nalinginnaanerpaajupput. Allattukkat tamakkiisuunngillat. Taamaalilluni imm. 1-imi toqqaannartumik pineqanngitsunik, kisiannili utertitsinissamut tunngavissiisunik pisoqassappat, pisoq apeqqutaatillugu ingerlatsinermi inatsisit naapertorlugu, Naalakkersuisut akuersissummik utertitsinissaapput.

Pisinnaatitsissummik pigisaqartup akuersissutip pigiinnarnissaanut nalinginnaasumik suut naatsorsuutigisinnaassanngikkai, aalajangersakkap nassuiarpaa.

Nr. 1

§ 14 naapertorlugu, piffissaq akuersissuteqarfiusoq tamakkerlugu pisinnaatitsissummik pigisaqartumut §§ 11-13-imi piumasaqaataasut naammassissavai. Uani pisinnaatitsissummik pigisaqartup ingerlatseqatigiiffiata suussusissaanut, angerlarsimaffianut, aningaasaqarnermut tunngasunut, paasisimasaqarnissamullu piumasaqaatit ilaatinneqarput. Pisinnaatitsissummik pigisaqartup piumasaqaatit naammassinngippagit, akuersissut utertinneqarsinnaavoq.

Assersuutigalugu pisinnaatitsissummik pigisaqartup angerlarsimaffia allanngorpat imaluunniit pinngitsaaliissummik atorunnaarsitaasimappat utertitsisoqarsinnaavoq.

Qaangiuttussamik aningaasatigut unamminartoq pineqarpat, akuersissut utertissallugu naleqqutissagunangilaq.

Oqaatigineqassaaq, Inatsisartut inatsisaat manna malillugu akuersissutit imatut inuussutissarsiummik ingerlatsinissamut akuersissutaanngimmata, sumiiffimmili aalajangersimasumi inuussutissarsiorsinnaanissaq taamaallaat akuersissutigineqarluni..

Pisinnaatitsissummik pigisaqartumut piumasaqaatit ataasiakkaat ersarinnerusumik misissornissaanut §§ 11-14-imi nassuiaatit innersuussutigineqarput.

Nr. 2

Inatsisartut inatsisaat malillugu akuersissut tunniunneqartoq malillugu ingerlatassaq, § 22 naapertorlugu pisinnaatitsissummik pigisaqartup piffissaq akuersissuteqarfiusoq tamaat ingerlatissavai. § 22 malillugu ingerlatsisussaataaneq pisinnaatitsissummik pigisaqartup naammassinngippagu, akuersissut utertinneqarsinnaavoq. Taamaakkaluatoq ingerlatsisussaataaneq aallaavittut aallartinnissamut piffissaliussap atorunnaarneranit aatsaat atuutilissamat, aallartinnissamut piffissaliussamut § 21-mi malittarisassat isiginiarneqassapput.

Ersarinnerusumik misissornissaanut § 22-mi nassuiaatit innersuussutigineqarput.

Nr. 3

Akuersissummi piumasaqaataasut pisinnaatitsissummik pigisaqartup malinngippagit, akuersissut utertinneqarsinnaavoq.

Taassuma saniatigut pisinnaatitsissummik pigisaqartup Inatsisartut inatsisaanni malittarisassanik malinninnginnippat akuersissut utertinneqarsinnaavoq.

§ 38, nr. 3 tunngavigalugu Naalackersuisut akuersissummik utertitsinnaassappata piumasaqaatinik imaluunniit Inatsisartut inatsisaanni malittarisassanik unioqqutitsineq annertussaaq imaluunniit ataasiaannarani pisimasuussalluni. Assersuutigalugu sumiiffiup akuersissuteqarfiusup avataani ingerlatsisoqaruni, tamanna akuersissutip piumasaqaataanik annertuumik unioqqutitsinerusinnaavoq. Piumasaqaatinik annikinnerusumik unioqqutitsinerni Naalackersuisut ataasiaannaratik peqqussuteqarsimappata, akuersissummik utertitsinissamut tamanna aamma tunngaviusinnaavoq. Assersuutigalugu naammassisassat uteqqiasumik naammassineqarneq ajorpata, soorlu assersuutigalugu § 42 naapertorlugu pisussaaffigalugu nalunaarusiortarsimangikkaanni, akuersissut aamma utertinneqarsinnaavoq.

Nr. 4

Akuersissummik tunniussinermut tunngaviusut annertuumik allanngorsimappata, akuersissut utertinneqarsinnaavoq. Akuerissummut tunngaviusunik allannguisunik nutaanik pisoqarpat imaluunniit nutaanik paasissutissaqalerpat, suliniut illersorneqarsinnaajunnaartutut imaluunniit ingerlanneqarsinnaajunnaartutut isigineqalerpat, tamanna akuersissummik utertitsinermik kinguneqarsinnaavoq.

Pisumik naliliinissaq, allannguinerlu annertuussasoq pineqarpoq. Assersuutigalugu inuunermut aamma peqqissutsimut tunngasut eqqarsaatigisariaqakkat, utertitsinissamut tunngavissaalluassapput.

Paasissutissat nutaat imaluunniit inatsisinut tunngasut, taamani akuersissummik tunniussiviusumi Naalackersuisunit ilisimaneqangitsut pineqartariaqarput. Assersuutigalugu soorlu suliniut teknikkikkut imaluunniit aningaasatigut ingerlanneqarsinnaajunnaarluni, pisuussutip tикиneqarsinnaanera pillugu paasissutissat nutaat saqqummerpata. Assersuutigalugu aamma teknologi atorneqartussatut naatsorsuutigineqarsimagaluartoq annertuumik allanngorsimasinnaavoq, imaluunniit piginnaasat, aningaasatigut piginnaasat imaluunniit misilittakkat naammassineqarsinnaajunnaarlutik suliniummi qitiusumik ingerlatsisut taarserneqarsimasinnaapput.

Allat assersuutigineqarsinnaasut tassaapput avatangiisini pissutsit allanngortut, matumani aamma sermip imaluunniit erngup qanoq issusaanik, taamaalillunilu atornissaanut periarfissamut sunniunneqartumik pinngortitami sumiiffiit mianernartut imaluunniit silap pissusaata allanngorneri pillugit kisitsisitigut paasissutissat nutaat ilanngullugit.

§ 38, nr. 4 naapertorlugu akuersissut utertinneqartinnagu, piumasaqaatit allanngorlugit akuersissut pigiinnarneqarsinnaanersoq isumaliutigineqartariaqarpoq. Akuliunneq annertunersoq pisuni tamani naliliiffigineqartassaaq.

Nr. 5

Nuna, kangerluk, imaq imaluunniit pinngortitaq annertuumik ajoquseratarsinnaalerpat akuersissut utertinneqarsinnaavoq. Taamatut pisoqartillugu § 30, imm. 1-imi malittarisassat malillugit ingerlatat unitsinneqassasut Naalakkersuisut peqqusisinnaapput. Pisut iluarsineqarsinnaanngippata, § 30, imm. 2 malillugu ingerlatanut Naalakkersuisut inerteqquteqarsinnaapput.

Ersarinnerusumik misissornissaanut § 30-mi nassuiaatit innersuussutigineqarput.

Utertitsisoqarsinnaatinnagu, aalajangersagaq naapertorlugu ajoquserneq qanoq annertutiginersoq naliliisoqassaaq. Naliliinermi assersuutigalugu ajoqusiinerup annertussusaa, ajoqusernerlu pitsaaliunikkut pinngitsoortinneqarsinnaanersoq pingaartinneqarsinnaavoq. Taassumap saniatigut naleqquttumik naliliinissami suliniut allanik ingerlatsinikkut ingerlanneqarsinnaanersoq kiisalu pisinnaatitsissummik pigisaqartup akuersissummik tigumminiinnarnissaanit nunap isikkua, imaq aamma kangerluk imaluunniit pinngortitaq pingaarnerunnginnersut pingaartinneqarsinnaavoq.

Nr. 6

Inatsisartut inatsisaata kiisalu malittarisassat, piumasaqaatillu Inatsisartut inatsisaanni § 30, imm. 1 aamma § 40, imm. 1 naapertorlugit aalajangersarneqartut malinneqarnissaanik Naalakkersuisut peqqusisinnaapput. Pisinnaatitsissummik pigisaqartup peqqussut malinngippagu, Naalakkersuisut akuersissut utertissinnaavaat.

Ersarinnerusumik misissornissaanut § 30, imm. 1 aamma § 40, imm. 1 nassuiaatit innersuussutigineqarput.

Pisoq pisinnaatitsissummik pigisaqartup peqqusummik, matumani aamma § 30, imm. 1 malillugu peqqusummik malinninnginnera aalajangersakkami píneqarput. Taamaalilluni pisinnaatitsissummik pigisaqartup peqqusummik malinnissimasinnaalluni, pinngortitarli eqqarsaatigalugu akuersissut utertinneqarsinnaalluni aalajangersagaq nr. 5-imit, aalajangersagaq immikkoorpoq.

§ 39-mut

Imm. 1-imit.

Naalakkersuisut akuersissummik utertitsinissaq pillugu aalajangiitinnagit, pisinnaatitsissummik pigisaqartoq pissutsinik akuersissummik utertitsinissamut tunngavissiisunik iluarsiinissaminut piffissalernerneqassasoq aalajangersakkap aalajangersarpaa. Akuersissummik utertitsinissaq pinngitsoortillugu, pissutsinik akuersissummik utertitsinermik kinguneqarsinnaasunik pisinnaatitsissummik pigisaqartup iluarsiinissaanut taassumap periarfissippaa.

Piomasagaatinik naammassinnginneq piffissaliussap iluani iluarsineqarsinnaanersoq pillugu piffissaliineq aamma naliliinermik, pisoq iluarsineqarsinnaanersoq pillugu naliliineq tunngaveqassaaq. Uani assersuutigalugu kukkunerit annikinnerusut tassuugu iluarsineqarsinnaasut imaluunniit ingerlatanik allassimasutut ingerlanneqanngitsunik pisinnaatitsissummik pigisaqartup iluarsisinnaaneri pineqarsinnaapput.

Pisoq iluarsineqarsinnaanngitsoq Naalakkersuisutalilerpassuk, utertitsinissaq sioqqullugu iluarsiinissamut piffissaliisoqassanngilaq. Uani assersuutigalugu utertitsinerunngitsumik allatigut pinngitsoortinneqarsinnaanngitsumik nuna annertuumik ajoquseratarsinnaatilluguusinnaavoq, matumani aamma inuunermut imaluunniit peqqissutsimut ulorianalerpat. Taamaakkaluartoq § 30-mi aalajangersakkat innersuussutigineqarput, taassuma kingorna ingerlatat unitsinneqarnissaannik Naalakkersuisut inerteqquteqarsinnaammata, pissutsillu iluarsiivigineqarsinnaanngippata allanngortinneqarsinnaanngitsumik inerteqquteqarsinnaallutik.

Imm. 2-mut.

Utertitsinissamut pissutaasoq imm. 1 naapertorlugu piffissaliussap ilauni pisinnaatitsissummik pigisaqartup iluarsinngippagu, Naalakkersuisut akuersissummik utertitsinnaasut aalajangersakkap aalajangersapaa.

Oqaatigineqassaaq, utertitsineq ingerlatsinerimi inatsisitigut aalajangiinerummat, utertitsinissarlugu sioqqullugu ingerlatsinerimi inatsisitigut nalinginnaasumik tunngavissat isiginiarneqassammata.

§ 40-mut

Imm. 1-imut.

Pisinnaatitsissummik pigisaqartut eqqarsaatigalugit Naalakkersuisut nakkutilliisussaasut aalajangersakkap aalajangersarpaa. Inatsisartut inatsisaat malillugu pisinnaatitsissummik pigisaqartup ingerlatsineranik Naalakkersuisut nakkutilliissapput.

Pisinnaatitsissummik pigisaqartup Inatsisartut inatsisaanni aalajangersakkanik, Inatsisartullu inatsisaat naapertorlugu malittarisassianik aamma piomasagaatinik malinninnersoq nakkutilliinermi aamma nakkutigineqassaaq.

Taassumap saniatigut Inatsisartut inatsisaata kiisalu Inatsisartut inatsisaat malillugu najoqqutassat aamma piomasagaatit aalajangersarneqartut malinneqarnissaannik, Naalakkersuisut peqqusisinnaapput.

Imm. 2-mut.

Nakkutilliinermi pisariaqartillugu, nakkutilliinermi oqartussaasuni sulisut eqqartuussivimmi aalajangiinertaqanngitsumik aammalu pisariaqartumik kinaassutsimut uppersaammik takutitsinikkut suliffeqarfimmut tamarmut isersinnaasut, aalajangersakkap aalajangersarpaa.

Pisariaqartutut nalilerneqartillugu siumut nalunaaruteqanngitsumik nakkutilliisoqarsinnaaneranut aalajangersagaq inatsisitigut tunngavissiivoq. Tamanna pillugu suliffeqarfik siumut nalunaarfigineqarnissaa pillugu piumasaqaateqanngilaq.

Nakkutilliinissami pisariaqartillugu taamaallaat isersinnaanissaq kisimi pineqarpoq, inullu nakkutilliisoq nakkutilliisuni sulisutut uppersaasiisinnaassasoq piumasaqaataalluni.

§ 37 naapertorlugu suliassaq suliakkiunneqarsimatillugu, nakkutilliineq pisortani oqartussamit allamit imaluunniit suliffeqarfimmit namminersortumit aamma ingerlanneqarsinnaavoq

Imm. 3-mut.

Pisinnaatitsissummik pigisaqartup naleqquttumik piffissaliunneqartup iluani peqqussutigineqartoq naammassinngippagu, pisinnaatitsissummik pigisaqartup akiligaanik, annaasaqaatigisinnaasaanillu Naalakkersuisut taakkua suliakkiissutigisinnaagai, imm. 3-mi aalajangersarneqarpoq.

Taamaalilluni aalajangersagaq marloqiusaavoq. Siullermik imm. 1 malillugu peqqussummik naammassininnisaminut pisinnaatitsissummik pigisaqartoq naleqquttumik piffisalerneqassaaq. Taamaalilluni peqqussutip imaaliallaannaq naammassineqarnissaanut, aalajangersakkap Nalaakkersuisut aalajangiisinnaatinngilai.

Naleqquttumik piffissaliussap iluani pisinnaatitsissummik pigisaqartup peqqussutigineqartoq naammassinngikkuniuk, peqqussutip naammassineqarnissaanut pisariaqartumik iliuusissat Naalakkersuisut aallartissinnaavaat. Taamatut pisoqartillugu Naalakkersuisut peqqussut naammassissavaat, kisianni pisinnaatitsissummik pigisaqartup akiligaanik, annaasaqaatigisinnaasaanillu pissalluni.

Pisinnaatitsissummik pigisaqartup akiligassaanik Naalakkersuisut inerteqquteqarpata, aningaasartuutit pisinnaatitsissummik pigisaqartumut akilersinneqassapput. Assersuutigalugu atortussanut aningaasartuutaasinnaapput, sanaartugassanik suliassinneqartartunut aamma siunnersortinut akiliutaasinnaapput, assartuussinermi aningaasartuutaasinnaapput aamma inerteqquteqarnermut atatillugu allaffissornermut aningaasartuutaasinnaallutik.

Imaappoq, § 26 aamma § 27 naapertorlugit pisinnaatitsissummik pigisaqartup inuussutissarsiornermi akisussaanermut sillimmasiissutaanit imaluunniit qularnaveeqqusiussaanit aningaasartuutaasut akilersinniarneqassasut. Akileqquneqartoq inuussutissarsiornermi akisussaanermut sillimmasiissummit imaluunniit qularnaveeqqusiissummit matussuserneqarsinnaanngippat, pisinnaatitsissummik pigisaqartumut toqqaannartumik akileqquneqartariaqarpoq.

Imm. 4-mut.

Imm. 3 malillugu peqqussut pisinnaatitsissummik pigisartup naammassinngisaa Naalakkersuisut naammassippassuk, tassunga atatillugu aningaasartuutit pisortanut akiitsutut isigineqassapput. Kalaallit Nunaanni pisortanut akiitsut akilersinniarneqartarnerini malittarisassat atuuttut naapertorlugit, akiitsut Akileraartarnermut Aqutsisoqarfimmit akilersinniarneqarsinnaapput.

Pisinnaatitsissummik pigisaqartup akiligassaanik, ajutoorpallu akisussaaffigisaanik Naalakkersuisut aningaasartuutigisimasai pisinnaatitsissummik pigisaqartup akilinngippagit, aalajangersagaq atuutissaaq. Taamaalilluni Naalakkersuisunit akileeqqusissut piffissaagallartillugu pisinnaatitsissummik pigisaqartup akilinngippagu, aningaasartuutit pisortanut akiitsutut isigineqassapput.

Aningaasartuutininik aningaasartuutininut aalajangersimasunut killiliinngilaq, peqqussutilli pisinnaatitsissummik pigisaqartup nammineerluni naammassinngisaata naammassineqarnissaanut Naalakkersuisut aningaasartuutigisimasaat tamakkerlugit pineqarsinnaallutik. Siuliani imm. 3-mut nassuiaatit innersuussutigineqarput.

Imm. 5-imut

Nakkutilliineq pillugu Naalakkersuisut ersarinnerusunik malittarisassiornissaannut aalajangersakkap piginnaatippai. Uani nakkutilliinissap ingerlanneqarnissaa pillugu malittarisassat pineqarsinnaapput, matumani aamma assersuutigalugu nakkutilliinissap qanoq ittuunissaa, akulikissusissaa aamma nakkutilliinerup qanoq ingerlanneqarnissaa pillugu malittarissat ilanngullugit.

§ 41-mut

Pisinnaatitsissummik pigisaqartup, aamma Inatsisartut inatsisaat malillugu akuersissummik qinnuteqartut, suliffeqarfimmi imaluunniit ingerlatami oqartussat suliamik suliarineqarnissaannut paasissutissanik aamma uppersaatissanik pisariaqartunik tamanik tunniussinissaannut, aalajangersagaq pisussaaffiliivoq.

Naalakkersuisut sunniuteqarluartumik nakkutilliinissaminnut paasissutissanik pisariaqartunik pissarsisinnaanissaat, Inatsisartut inatsisaallu naapertorlugu aalajangiisinnaanissaat aalajangersakkap periarfissaqartippai. Oqartussat sulianik suliarineqarnerininut paasissutissanut pisariaqartunut tamanut, paasissutissiisussaataaneq atuuppoq, matumani aamma qinnuteqaammik suliaqarnissami paasissutissat pisariaqartut tamarmik paasissutissiisussaataanermini pineqarput.

Paasissutissat, uppersaatillugu qanoq tunniunneqarnissaannut, matumani qanoq iluseqarnissaat, qanorlu ilanngullugit, Naalakkersuit aamma piunasaqarsinnaapput.

Assigiissaartumik, pitsaasumillu suliat suliarineqartarnissaannut, matumani paasissutissat digitaalikkut, allaffissornikkulluunniit pisariaqartitanut allanut naapertuuttumik suliarineqarsinnaatillugit formatimik qanoq ittumik tunnunneqarnissaat ilanngullugu, qulakkeerinissamut tamanna periarfissiisaaq.

§ 42-imut

Imm. 1-imut.

Akuersissut malillugu ingerlatat akuersissummi piumasaqaataasut aamma Inatsisartut inatsisaanni malittarisassat naapertorlugit ingerlanneqartut pisinnaatitsissummik pigisaqartut ukiumoortumikuppersaasarnissaannik, aalajangersagaq pisussaaffiliivoq.

Naalackersuisunut ukiumoortumik nalunaarusiamik nassitsisarnikkut uppersaasoqarsinnaavoq. Ingerlatat suut ingerlanneqarsimanersut, matumani aamma misissueqqaarnerit imaluunniit misissuinerit suut ingerlanneqarsimanersut nalunaarusiami nassuiaatigineqartassaaq. Taassumap saniatigut piumasaqaatit qanoq malinneqarsimanersut nassuiaatigissallugu pingaaruteqarsinnaavoq. Uani pingaartumik pinngortitamik aamma avatangiisinik illersuinissamut piumasaqaatit, matumani aamma pinngortitamut kinguneqarsimanersoq pineqarsinnaapput

Imm. 2-mut.

Ukiumoortumik nalunaarusiami pisinnaatitsissummik pigisaqartup sermeq, imerlu qanoq annertutigisoq atorsimanerlugu paasissutissiissutigisassavaa. Sermeq atorsimasaq kilogramminngorlugu, imerlu literinngorlugu allanneqassaaq.

Aalajangersagaq nassuiaammut "atuineq"-mut atasutut isigineqassaaq. Taamaalilluni pisuusummik pinngortitamit piiaanerup aallartiffianit atuineq naatsorsorneqassaaq, suulluunniillu sermimik imaluunniit imermik tigusilluni iliuitsit tamarmik pineqarlutik.

Imm. 3-mut.

§ 10 malillugu avammut tunisinissamut akuersissuteqarluni pisinnaatitsissummik pigisaqartup avammut tunisani nalunaarusiortassavai. Piffissap avammut tunisinissamut akuersissuteqarfiusup naanerani nalunaarusiorneq pissaaq. § 10-mi aalajangersakkat naapertorlugit avammut tunisinissamut akuersissut qaammatisiutit ukiuata naaneri tamaasa nutarterneqartassaaq. Taamaalilluni minnerpaatut qaammatisiutit ukiuata naaneri ukiumoortumik nalunaarusiortoqartassaaq.

Nioqqutit suut aamma sermeq, imerlu qanoq annertutigisut avammut tunisimanerlugit pisinnaatitsissummik pigisaqartup nalunaarusiami paasissutissiissutigisassavaa. Avammut tunisineq nunanut tunisiffinnut qanoq agguataarneqarsimanersoq paasissutissiissutigineqassaaq.

Sermeq, imerlu avammut tunineqarsimasut pillugit paasissutissat sermimut kilogramminngorlugit, imermullu literinngorlugit allanneqassapput. § 24-mi malittarisassat naapertorlugit akiliutissap naatsorsorneqarnissaannut paasissutissat tunngavissiissapput.

Nioqqutit pillugit paasissutissiinermi assersuutigalugu sermeq imaluunniit imeq suliarineqarsimanersut, puujaasanut maqitsisoqarsimanersoq imaluunniit imeq taamaatsiinnarlugu avammut tunineqarsimanersoq paasissutissiissutigineqarsinnaavoq.

Nassiussat nioqqutissanik eqqussisumit tamakkiisumik imaluunniit ilaannakortumik tigujumaneqarsimangippata, pissutsit suut tigusiumannginnermut patsisaanersut pisinnaatitsissummik pigisaqartup paasissutissiissutigissavaa. Uani assersuutigalugu pitsaassutsikkut, isumaqatigiissutitigut, nassiussalerinermilu unamminartitat patsisaasinnaapput.

Imm. 4-mut.

Imm. 1-3-mi nalunaarusiortussaataaneq pillugu Naalackersuisut malittarisassanik ersarinnerusunik aalajangersaanissaannut, aalajangersakkap piginnaatippai. Uani assersuutigalugu uppersaanissamut piumasaqaatit aamma paasissutissat suut paasissutissiissutigineqassanersut pillugit malittarisassat ersarinnerusut pineqarsinnaapput.

§ 43-mut

Imm. 1-imut.

Naalackersuisut pisinnaatitsissummik pigisaqartoq peqqusinnaavaat, akiliutissap qanoq naatsorsorneqarneranut ilaliussatut uppersaatit saqqummiussissasoq. Avammut tunisat annertuussusaat tunuliaqutaralugu § 24, imm. 2 naapertorlugit akiliutissat aalajangersarneqassapput. Taamaalilluni ilaliussatut uppersaatit tassaasinnaapput akitsuuseriviup allatai imaluunniit assartuinnermi uppersaatit.

Taassumap saniatigut Naalackersuisut pisinnaatitsissummik pigisaqartoq peqqusinnaavaat, akiliutip akilerneqarneranut ilassutit uppersaammik saqqummiussissasoq. Uani assersuutigalugu aningaaserivimmuut nuutsinerup uppersaataa pineqarsinnaavoq.

Taassumap saniatigut paasissutissat tunniunneqartut Naalackersuisut misissorsinnaavaat, tamannalu § 40-mi nakkutilliinnermut atatillugu isigineqassalluni. Taamaalilluni § 42, imm. 3 naapertorlugit nalunaarut eqqornerisut, annertussutsillu aamma akiliut akuersissutip piumasaqaataanut napertuunnersut Naalackersuisut nakkutilliisinnaassapput..

§ 44-mut

Imm. 1-imut.

Aalajangersakkap kingunerisaanik, Inatsisartut inatsisaat malillugu akuersissut, Naalackersuisut akuersinerisigut tunniunneqarsinnaavoq. Toqqaannartumik imaluunniit toqqaannanngikkaluartumik tunniussinerit tamarmik akuerineqarsimassapput.

Toqqaannartumik tunniussineq tassaavoq, akuersissummut pisinnaatitsissummik pigisaqartumit ataatsimit inatsisitigut pisinnaatitaasumut, §§ 11-13-imi piumasaqaataasunik naammassinnittumut allamut tunniussineq.

Toqqaannanngitsumik tunniussinermi pisinnaatitsissummik pigisaqartup pigisaani imaluunniit nakkutilliinerani allannguutit pineqarput, matumani aamma akuersissutip tunniunneqarnerani inunnut peqataanngitsunut akuersissutip tunniunneqarneranik kingunilimmik sunniuteqarsinnaaneq ilanngullugu. Assersuutigalugu aktianik imaluunniit piginneqataassutsinik tunniussinikkut, kattunnikkut, immikkuulernikkut imaluunniit aaqqissuusseqqinnikkut pisinnaavoq. Taamaalilluni akuersissut pisortatigoortumik tunniunneqanngikkaluartorluunniit, akuersinissamut piumasaqaataasoq aamma atuuppoq.

Arlaqartut akuersissummik pigisaqaqatigiittut akornanni tunniussinernut, aalajangersagaq aamma atuuppoq.

Akuersissummik tunniussinermi piumasaqaataasut Naalackersuisut aamma akuersissutigissavaat. Pisinnaatitsissummik pigisaqartumi ingerlatseqatigiiffimmik ingerlatsinermi maleruagassaannik allannguinnissat akuersissutigineqarnissaa uani ilaatinneqanngilaq. Taamaakkaluartoq piumasaqaatit suut piumasaqaatigalugit akuersissutip tunniunneqarnissaa pillugu akuersinissaq pineqarsinnaavoq. Pingaartumik illuatungeriit akornanni isumaqatigiissutaanni piumasaqaatit, pisinnaatitsissummik pigisaqalertup akuersissut toqqissisimanartumik ingerlateqqissinnaanerani naliliinissami sunniuteqarsinnaasut pineqarsinnaapput. Taamaalilluni Naalackersuisunit saqqummiunneqarsinnaasumik illuatungeriit tunniussinissami, assigisaanilluunniit isumaqatigiissusiorsimanissaat, isumaqatigiissullu Naalackersuisunit akuerineqarsimatinnagu isumaqatigiissut atuutilersinnaanngitsoq piumasaqaataavoq.

Tunniussinissamut Naalackersuisut piumasaqaatinik aalajangersaasinnaapput. Assersuutigalugu qularnaveeqquusiinissaq pillugu piumasaqaataasinnaapput.

Imm. 2-mut.

Tunniussinierup kingorna pisinnaatitsissummik pigisaqartup §§ 11-13-imi pisinnaatitsissummik pigisaqartumut piumasaqaataasut suli naammassippagit aatsaat, tunniussineq Naalackersuisut akuerisinnaagaat aalajangersakkap ersarissarppaa.

Pisinnaatitsissummik pigisaqartoq akuersissummik pigisaqalertup piumasaqaatit naammassissavai.

§ 11 naapertorlugu pisinnaatitsissummik pigisaqartoq Kalaallit Nunaanni aningerlarsimaffeqarluni aktianik piginneqatigiiffiussaaq imaluunniit piginneqataassuteqarluni ingerlatseqatigiiffiussaaq. Taamaalilluni ingerlatseqatigiiffinnut typinut allanut imaluunniit ingerlatseqatigiiffinnut nunani allani angerlarsimaffeqartunut akuersissummik tunniussiniarneq Naalakkersuisut akuersissutigisinnaangilaat.

§ 13 naapertorlugu piumasaqaataavoq, paasisimasariaqakkanik pisinnaatitsissummik pigisaqartoq paasisimasaqartuassasoq. Taassumap saniatigut § 12 pisinnaatitsissummik pigisaqartup aqutsisuinut aamma piginnittuunermut tunngasunut piumasaqaateqarpoq, matumani aamma inuit attuumassuteqartut aningaasatigut pinerluttuliorsimasutut eqqartuunneqarsimassangitsut imaluunniit ingerlatseqatigiiffiup ingerlanneqarneranut sunniuteqarsinnaasumik killilersorneqarsimassangitsut. Ersarinnerusumik misissuinissamut §§ 11-13-imut nassuiaatit innersuussutigineqarput. Taamaalilluni ingerlatseqatigiiffimmi peqataalersut nutaaq § 12-13-imi piumasaqaataasunik naammassinnissapput.

Imm. 3-mut.

Inatsisartut inatsisaat manna malillugu akuersissut akiitsoqarfinnit malersorneqarnernut atorneqarsinnaangitsut, aalajangersakkap aalajangersarpaa. Taamaalilluni akuersissummi akiliussisoqasinnaangilaq imaluunniit parnaarussisoqarsinnaangilaq, akuersissullu akiliisinnaajunnaarsitaanermik suliaqarnermi arsaarinnissutigineqarsinnaanani. Kisianni Pisinnaatitsissummik pigisaqartoq akiliisinnaajunnaarsitaappat, § 12, imm. 1-imi piumasaqaataasut pisinnaatitsissummik pigisaqartup nammassisussaangimmagit, § 38, nr. 1 naapertorlugu akuersissut utertinneqarsinnaassaaq.

Aalajangersagaq imm. 1-imut aamma 2-mut atasutut isigineqassaaq, Inatsisartut inatsisaallu malillugu pisinnaatitsissummik pigisaqartumut piumasaqaataasut naammassineqannginnerat patsisaalluni, inummut nammineq pisinnaatitsissummik pissarsisinnaangitsumut akuersissutip tunniunneqannginnissaa qulakkiissallugu.

§ 45-mut

Imm. 1-imut.

Inatsisartut inatsisaat manna malillugu akuersissutinik qinnuteqaatit, aalajangiinerillu allat suliarineqarnerinut atatillugu Naalakkersuisut akiliuteqartitsisinnaanissaannut, aalajangersakkap piginnaatippai.

Suliap suliarineqarneranut atatillugu allaffissornikkut aningaasartuutinut akiliutissanik, akileeqqusisoqarsinnaavoq.

Suliap suliarineqarneranut atatillugu Naalakkersuisut aningaasartuutaannut, akiliutissaq naapertuutissaaq.

Imm. 2-mut.

Akuersissutinik tunniussinnermut akiliutit pillugit Naalakkersuisut ersarinnerusunik malittarisassiorsinnaanissaannut, aalajangersakkap piginnaatippai, pisussaatillugillu. Assersuutigalugu akiliutissat annertussusissaat, matumani aamma suliap suliarineqarnerini alloriaatissat apeqqutaatillugit akiliutissat assigiinngitsut pillugit malittarisassanik aalajangersaasoqarsinnaavoq. Taamaalilluni akuersissutinut typenut assigiinngitsunut assigiinngisitaartunik akiliutinik aalajangersaasoqarsinnaassaaq

§ 46-mut

Imm. 1-imut.

Kalaallit tunisassiaasa avammut nioqqutigineqartarnerat pillugu akuersissuteqartarnermut Inatsisartut peqqussutaat, Inatsisartut inatsisaat manna malillugu avammut tunisinissamut akuersissut malillugu avammut tunineqartartunut, sermip erngullu avammut tunisassiarineqarneranut atuutinngitsaq, aalajangersakkap aalajangersarpaa.

Taamaalilluni niuerneramik siunertaqartumik sermimik, imermillu avammut tunisineq siunnersuutitigut malittarisassiuunneqarpoq, aammalu Kalaallit tunisassiaasa avammut nioqqutigineqartarnerat pillugu akuersissuteqartarnermut Inatsisartut peqqussutaat malillugu akuersissutit pillugit piumasaqaammut ilaatinneqarani. Taamaalilluni siunnersuut malillugu avammut tunisinissaq marloriaammik akuersissuteqarfiussanngilaq.

Avammut tunisinissamut akuersissutinut tunngatillugu § 10-mut nassuiaatit innersuussutigineqarput.

Imm. 2.

Kalaallit Nunaannut, Kalallit Nunaannit Kalaallit Nunaannilu usinik imaatigut assartuineq pillugu Inatsisartut peqqussutaat, ingerlatanut akuersissummi Inatsisartut inatsisaat manna malillugu tunniunneqartumi pineqartunut ilaasunut atatillugu imaatigut assartuussinnermut atuutinngitsaq, aalajangersakkap aalajangersarpaa.

Taamaalilluni siunnersuut malillugu akuersissut malillugu sermimik, imermillu imaatigut assartuinerit siunnersuummit malittarisassiuunneqarput, aammalu Kalaallit Nunaannut, Kalallit Nunaannit Kalaallit Nunannilu usinik imaatigut assartuineq pillugu Inatsisartut peqqussutaat malillugu akuersissuteqarnissamut piumasaqaammut ilaatinneqarani. Taamaalilluni marloriaammik akuersissuteqarfiussanngilaq.

Imm. 3-mut.

Inatsisartut inatsisaat manna malillugu akuersissut tunniunneqartoq malillugu ingerlatanut,

Kalaallit Nunaata imartaani akisussaaffeqarfiusumi inuussutissarsiornikkut ingerlataqartarnek pillugu Inatsisartut inatsisaat atuutinngitsoq aalajangersakkap aalajangersarpaa.

Taamaalilluni ingerlatat siunnersuummut ilaasut, siunnersuullu malillugu akuerisaasut Kalaallit Nunaata imartaani akisussaaffeqarfiusumi inuussutissarsiornikkut ingerlataqartarnek pillugu Inatsisartut inatsisaanni akuersissuteqarnissamik piumasaqaataasumut ilaanngillat, naak Kalaallit Nunaata imartaani umiarsuarmit sivisunerusumik inuussutissarsiornissaq pineqaraluartoq. Taamaalilluni marloriaammik akuersissuteqarfiussanngilaq.

§ 47-mut

Imm. 1-imut.

Pissutsit Inatsisartut inatsisaanni pineqartunut ilaasut pillugit aalajangiineq, piffissamut killiliussap ukiumik ataatsimik sivisussuseqartup iluani eqqartuussivinnut suliakkiunneqarsinnaasut, aalajangersakkap aalajangersarpaa. Taamaalilluni Inatsisartut inatsisaat malillugu pissutsinut tamanut Naalakkersuisut aalajangiinerinut, aalajangersagaq atuuppoq.

Taamaattoq §§ 48 aamma 49 malillugit arsaarinnissuteqarnermi immikkut malittarisassaqqarpoq. Ersarinnerusumik misissuinissamut tassunga nassuiaatit innersuussutigineqarput.

Imm. 2-mut.

Aalajangiinermik eqqartuussivinnut suliakkiineq aallaavittut kinguartitsinermik sunniuteqassanngitsoq imm. 2-p ersarissarpaa. Imaappoq, aalajangiineq eqqartuussivimmumut suliassanngortinneqarsimagaluarpalluunniit atuutiinnassasoq. Maalaaruteqartumut tunngatillugu imaappoq, aalajangiineq malillugu aalajangiinerusimasinnaasut imaluunniit iliuusissatut aalajangerneqarsimasut, eqqartuussivimmi aalajangiisoqarnissaata tungaanut atuutiinnassasut.

Taamaakkaluartoq aalajangiineq kinguartinneqarsinnaasoq Naalakkersuisut aalajangiisinnaapput. Taamatut pisoqartillugu aalajangiinerup inatsisitigut kingunissai kinguartinneqassapput, inaarutaasumillu eqqartuussinikkut suliaq eqqartuussivimmi naammassineqarpat imaluunniit eqqartuussineq naammassippat imaluunniit allatigut naammassippat aatsaat, aalajangiinerup kingunerisaanik kingunerusinnaasut atuutilissallutik.

Kinguartitsinissamik aalajangiineq, suliassat suliarineqartarnerat pillugu inatsimmi malittarisassanut ilaalluni ingerlatsinermi inatsisitigut aalajangiineruvoq.

Imm. 3-mut.

Suliat imm. 1-imi taaneqartut siullertut Nunatsinni Eqqartuussivimmumut suliassiissutigineqassasut, imm. 3-mi ersarissarneqqarpoq.

Suliap Kalaallit Nunaata avataani eqqartuussivimmut innersuunneqarnissaanik kinguneqarsinnaasumik, suliap eqqartuussivimmi sumi suliarineqartarnissaannut malittarisassanit aalajangersaq sanioqquitsineruvoq. Ilutigisaanik aamma suliap imm. 1-imi pineqartut qanoq ittuugaluarpataluunniit imaluunniit qanoq annertutigigaluarpataluunniit eqqartuussivimmut suliassanngortinneqarsinnaanngillat.

Imm. 4-mut.

Akuersissummi pissutsinut aalajangiineq pillugu aaqqiagiinngissuteqarnerit isumaqatigiissitsiniarnikkut aalajangerneqassasut, akuersissummi aalajangersarneqarsinnaavoq. Taamatut pisoqartillugu aaqqiagiinngissutaasoq piffissamut killiliussap ukiumik ataatsimik sivilissuseqartup iluani, isumaqatigiissitsiniarnikkut eqqartuussivimmut suliakkiunneqassaaq.

Imm. 5-imut.

Aalajangiinernik Nunatsinni Eqqartuussivimmut aamma isumaqatigiissitsiniarnikkut eqqartuussivimmut tunniussinissamut piffissaliussaq, ullormi aalajangiinerup illuatungerisamut nalunaarutiginerani atuutilissasooq, aalajangersakkap aalajangersarpaa.

§ 48-imut

Imm. 1-imut.

Pisinnaatitsissummik pigisaqartup, Namminersorlutik Oqartussallu namminneq iluaqutissaattut, arsaarinnissuteqarnermi pigisanik aalaakkaasunik pissarsinissamut, aalajangersakkap Naalakkersuisut piginnaatippai.

Inatsisartut inatsisaat malillugu ingerlatat ingerlanneqarnissaannut pigisanik aalaakkaasunik arsaarinnissuteqarnissaq pisariaqasasooq, aalajangersagaq malillugu piumasaqaataavoq. Pisariaqasasooq ima paasineqassaaq, pigisanik aalaakkaasunik arsaarinnissuteqarnerup siunertaa annikinnerusumik iliuuseqarnikkut anguneqarsinnaasimanngitsoq.

Inooqatigiit ataatsimut iluaqutissaat pillugu pisariaqarpat, pigisanik aalaakkaasunik arsaarinnittoqarsinnaasooq tunngaviusumik piumasaqaataavoq. Sermimik aamma imermik niuerneramik siunertaqartumik suliniutit ingerlanneqarsinnaanissaat inuiaqatigiinut pingaaruteqassasooq. Matumani aamma immikkoortup ineriartortinneqarnissaa, suliffinnik pilersitsinissaq, akiliutiniillu nunap karsianut isertiaqarnissaq siunertaralugu.

Tassunga ilanngullugu tamakkiisumik taarsiiffigitinnikkut pigisanik aalaakkaasunik arsaarinninneq kisimi pisinnaavoq.

Pigisanik aalaakkaasunik arsaarinnissuteqartarneq pillugu inatsisartut inatsisaanni malittarisassat malillugit arsaarinninneq pissaaq. Taamaalilluni

kinaassusersiunngitsumikpisariaqartumik, naleqquttumillu pissuseqarnissaq pillugu nalinginnaasumik tunngavissat malinneqarnissaat qulakkiissammagu.

Aalajangersagaq malillugu pigisanik aalaakkaasunik arsaarinnissuteqarnermi aningaasartuutit, Pigisanik aalaakkaasunik arsaarinnissuteqartarneq pillugu Inatsisartut inatsisaanni § 9, imm. 3 malillugu pisinnaatitsissummik pigisaqartumit akileqquneqassasut sulisaasermi piumasaqaataavoq.

§ 49-mut

Namminersorlutik Oqartussat imminerminnut, pisortallu pilersuinermi ingerlatsiviinut iluaqutissatut, arsaarinnissuteqarnermi nammineq pigisanik pissarsinissamut, aalajangersakkap Naalakkersuisut piginnaatippai. Taassumap saniatigut Inatsisartut inatsisaat malillugu akuersissutip tunniunneqarsimasup utertinnissaanut imaluunniit annikillisinnissaanut Naalakkersuisut piginnaatinneqarput.

Inooqatigiit ataatsimut iluaqutissaat pillugu pisariaqarpat, pigisanik aalaakkaasunik arsaarinnittoqarsinnaasoq tunngaviusumik piumasaqaataavoq. Pisortat pilersuinerisa qulakkeerneqarnissaanut pisariaqartillugu, akuersissummik arsaarinnissuteqarneq aamma annikillisitsineq aalajangersagaq malillugu kisimi pisinnaavoq. Assersuutigalugu nammineq pigisaq imaluunniit akuersissut tunniunneqareersoq attaveqaasersuutunik pisariaqavissunik soorlu innaallagissamik, imermik imaluunniit kiammik pilersuivimmik pilersitsinissamut imaluunniit pioreersunik attassiinnarnissamut akornutaatillugit tamanna pingaaruteqarsinnaavoq.

Tassunga ilanngullugu tamakkiisumik taarsiiffigitinnikkut pigisanik aalaakkaasunik arsaarinninneq kisimi pisinnaavoq.

Pigisanik aalaakkaasunik arsaarinnissuteqartarneq pillugu inatsisartut inatsisaanni malittarisassat malillugit arsaarinninneq pissaq. Taamaalilluni kinaassusersiunngitsumik, pisariaqartumik, naleqquttumillu pissuseqarnissaq pillugu nalinginnaasumik tunngavissat malinneqarnissaat qulakkiissammagu.

§ 50-imut

Imm. 1-imut.

Inatsisartut inatsisaanni qitiusumik aalajangersakkanik unioqqutitsinerit, Kalaallit Nunaanni pinerluttulerinermut inatsimmi maleruagassat malillugit akiliisitsinermik pineqaatissiinermik malitseqarsinnaasoq aalajangersakkap aalajangersarpaa.

Pineqaatissiinerit Kalaallit Nunaanni pinerluttulerinermut inatsimmi maleruagassat malillugit pissasut aalajangersakkap aalajangersarpaa, matumani pineqaatissiissutissap

aalajangersarneqarnissaa, akiligassiissutissallu annertussusissaata naatsorsorneqarnissaat ilanngullugu.

Nr. 1

§ 3, imm. 1-imi, § 16, imm. 2, oqaaseqatigiit siullianni aamma § 19, imm. 1-imi aalajangersakkat aalajangersarpaat, Inatsisartut inatsisaat malillugu akuersissut malillugu niuerneramik siunertaqartumik taamaallaat sermimik, imermillu misissueqqaartoqarsinnaasoq, atuisoqarsinnaasoq imaluunniit avammut nioqquteqartoqarsinnaasoq. Taamaalilluni pisariaqartumik akuersissutaasariaqartumik pigisaqarani Inatsisartut inatsisaat malillugu ingerlatanik aallartitsineq, aalajangersagaq malillugu akiliisitsinermik kinguneqarsinnaavoq.

§ 5, imm. 2 aamma § 6, imm. 2 malillugit misissueqqaarnissamut imaluunniit atuinissamut akuersissummi akuerisaasoq qaangerlugu inuk ingerlatanik ingerlatsippat, aalajangersakkami aamma pineqarpoq.

Nr. 2

Sillimmasersimanissamut imaluunniit allatigut qularnaveeqquersimanissamut § 26, imm. 1-imi piunasaqaataasoq naammassinagu ingerlatsisoqaruni, tamanna akiliisussaataitanermik kinguneqarsinnaasoq aalajangersakkap aalajangersarpaa, tak. § 26, imm. 2. Assersuutigalugu pisinnaatitsissummik pigisaqartup piunasaqaatigineqartutut sillimmasersimanani imaluunniit piunasaqaatigineqartutut qularnaveeqquusiisimanani pisinnaatitsissummik pigisaqartoq atuinarluni ingerlatsippat. Sillimmasersimanissamu, allatigulluunniit qularnaveeqquersimanissamut malittarisassat ersarinnerusumik misissornissaanut § 26-mut nassuiaatit innersuussutigineqarput.

Nr. 3

§ 30, imm. 1 aamma imm. 2 aamma § 40, imm. 1 malillugit peqqussutigineqartumik imaluunniit inerteqqutigineqartumik unioqqutitsineq, akiliisussaataitanermik kinguneqarsinnaasoq aalajangersakkap aalajangersarpaa.

Assersuutigalugu suliniut nunamut, kangerlummut, immamulluunniit imaluunniit pinngortitamut annertuumik ajoquseeratarsinnaammat ingerlatap unitsinneqarnissaanik peqqussummik unioqqutitsinerusinnaavoq. Inatsisartut inatsisaata imaluunniit taanna malillugu malittarisassat malinneqarnissaannik peqqussutaasinnaavoq.

Peqqussuteqarnermut, inerteqquteqarnermullu malittarisassat ersarinnerusumik misissornissaannut § 30, imm. 1 aamma imm. 2, aamma § 40, imm. 1-imut nassuiaatit innersuussutigineqarput.

Nr. 4

Akuersissummut piunasaqaataasunik malinninnginneq akiliisussaataitanermik kinguneqarsinnaasoq aalajangersakkap aalajangersarpaa. Inatsisartut inatsisaat naapertorlugu

immikkut akuersissutitut aamma inatsisartut inatsisaat malillugu malittarisassianut aamma atuuppoq.

Assersuutigalugu § 8, imm. 4, § 10, imm. 1, § 20, imm. 3, § 26, imm. 3, § 27, imm. 1 imaluunniit § 28, imm. 1 naapertorlugit akuersissummi piumasaqaatinik aalajangersakkanik unioqutitsinerusinnaavoq, akiliisitsinermik kinguneqarsinnaasoq.

Nr. 5

Pisortani oqartussamut eqqunngitsunik imaluunniit allamut saasaarisunik paasissutissiineq akiligassiinermik kinguneqarsinnaasoq aalajangersakkap aalajangersarpaa.

Inatsisartut inatsisaat malillugu imaluunniit inatsisartut inatsisaat malillugu malittarisassiat naapertorlugit pisortani oqartussamut paasissutissiisussaatitaanermik malinninnginneq, akiliisussaatitaanermik kinguneqarsinnaasoq aalajangersakkap aalajangersarpaa.

Qinnuteqaammi eqqunngitsunik paasissutissiineq aalajangersakkami ilaatinneqarsinnaapput. § 42 malillugu nalunaarusiortussaatitaanermut atatillugu eqqunngitsunik imaluunniit amigartunik aamma paasissutissiinerusinnaavoq imaluunniit § 41 naapertorlugu nalinginnaasumik paasissutissiisussaatitaanermik malinninnginnerusinnaalluni.

Nr. 6

§ 40, imm. 2 malillugu nakkutilliisussamik isitsaaliuineq, akiliisussaatitaanermik kinguneqarsinnaasoq aalajangersakkap aalajangersarpaa. Pisinnaatitsissummik pigisaqartoq assiaqusiilluni nakkutilliinissami oqartussamik isitsaaliuippat, aalajangersakkami pingaartumik siunnerfigineqarpoq.

Imm. 2-mut.

§ 4, imm. 4, § 5, imm. 3, § 6, imm. 3, § 8, imm. 5, § 10, imm. 4, § 16, imm. 5, § 20, imm. 4, § 26, imm. 4, § 28, imm. 2, § 29, imm. 3, aammam § 42, imm. 4 malillugit malittarisassiuunneqartuni akiliisitsinertut pineqaatissinernik aalajangersaasoqassasoq, aalajangersakkap aalajangersarpaa.

Kalaallit Nunaanni pinerluttulerinermut inatsimmi maleruagassat, matumani aamma pineqatissiisutissanik aalajangersaanissaq, akiligassiisutissallu naatsorsorneqarnissaat pillugit malittarisassat malillugit akiligassiisoqassaaq.

Imm. 3-mut.

Inatsisartut inatsisaat tunngavigalugu akiliisitsinerit imaluunniit Inatsisartut inatsisaat naapertorlugu peqqussutaasut, Kalaallit Nunaanni pinerluttulerinermut inatsimmi maleruagassat malillugit inummumut inatsisitigut pisinnaatitaasumut pisussaaffiliisutigineqarsinnaasut aalajangersakkap aalajangersarpaa.

Imm. 4-mut.

Akiliisitsinerit, Inatsisartut inatsisaat imaluunniit Inatsisartut inatsisaat malillugu aalajangersakkat aalajangersarneqartut malillugit pineqaatissiissutigineqartut, Nunatta Karsianut nakkartinneqassasut aalajangersakkap aalajangersarpaa.

Imm. 5-imut.

Kalaallit Nunaanni pinerluttulerinermut inatsimmi arsaarinnissuteqarnermut malittarisassat aamma atuuttut aalajangersakkap aalajangersarpaa.

Imm. 1-2-mi allassimasumik pisoqartillugu arsaarinnissuteqartoqarsinnaavoq.

Arsaarinnissutigineqartut Nunap Karsianut nakkartinneqassapput.

§ 51-imut

Imm. 1-imut.

Siunnersuutigineqarpoq, Inatsisartut inatsisaat 1. juli 2026-mi atuutilissasoq.

Imm. 2-mut.

Siunnersuutigineqarpoq, Inatsisartut inatsisaata matumani atuutilerina ilutigalugu, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq atorunnaarsinneqassasoq.

Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq atorunnaarsinneqareerpat, ingerlatanut Inatsisartut inatsisaata § 1-iani ilaatinneqartunut Inatsisartut inatsisaat manna atuutissaaq. Imaappoq, sermimik aamma imermik niuernermik siunertaqarluni misissueqqaarneq aamma atuneq, kiisalu sermimik aamma imermik Kalaallit Nunaata avataani niuernermik siunertanut avammut tunisineq.

Sermimik, imermillu niuernermik siunertaqartumik atuinissamut akuersissutit, qinnuteqaatillu imm. 3-5-imi malittarisassat naapertorlugit suliarineqassapput.

Imm. 3-mut.

Siunnersuutigineqarpoq, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq naapertorlugi sermimik, imermillu misissueqqaarnissamut imaluunniit niuernermi atuinissamut akuersissutit kiisalu akuersissutit tunniunneqarsimasut imaluunniit atatiinnarneqartut, siunnersuutip atortuulersinneqarfiata kingorna atatiinnarneqassasut. Akuersissutini piumasaqaatit, piffissaliussallu Inatsisartut inatsisaat assinganik atatiinnarneqassapput, aatsaalli piumasaqaat inatsisartut inatsisaanut matumunnga imaluunniit taanna malillugu malittarisassiunneqarsimasunut akerliunngippat.

Piomasagaat ataaseq, arlallilluunniit unioqqutinneqarpata piomasagaatit allat malillugit akuersissutit atatiinnarneqarsinnaassapput.

Taamaalilluni piomasagaatit, piffissaliussallu akuersissummi aalajangersarneqarsimasut pisinnaatitsissummik pigisaqartup naammassissavai. Taamaakkaluartoq pisinnaatitsissummik pigisaqartup Inatsisartut inatsisaat manna, taannalu naapertorlugu malittarisassat atortuulersinneqartut inatsit atortuulersinneqareerpat allaavigisinnaavaa. Taamaalilluni Inatsisartut inatsisaat manna naapertorlugu, qinnuteqartut allat naligalugit pisinnaatitsissummik pigisaqartoq akuersissutinik, immikkullu akuersissutinik qinnuteqarsinnaavoq.

Avammut tunisinissamut akuersissutit, ukiumullu nutarterneqartarnissaanik piomasagaat eqqarsaatigalugit, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq naapertorlugu atuinissamut akuersissutinut tunniunneqarsimasunut tamanna aallaavittut atuutinnilaq. Tassani avammut tunisinissamut akuersissut, atuinissamut akuersissummi piomasagaatit, ilaasutullu ilaaneranut patsisaavoq. Taamaalilluni piomasagaatit Inatsisartut inatsisaannut matumunnga akerliutinnagit atatiinnarneqassapput. Pisinnaatitsissummik pigisaqartoq avammut tunisinissamut immikkut akuerissummik kissaateqassaguni, Inatsisartut inatsisaanni matumani § 10 naapertorlugu tamanna pisinnaatitsissummik pigisaqartup qinnutigissavaa, taassumallu kingorna tassani malittarisassat atuutissallutik.

Ilutigisaanik siunnersuutigineqarpoq, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq naapertorlugu manna tikillugu akuersissutit tunniunneqarsimasut, siunnersuutip § 38-ani malittarisassat naapertorlugit utertinneqarsinnaassasut. Uani akuersissummi piomasagaatit imaluunniit peqqussut malinneqanngippata. Ersarinnerusumik misissornissaanut § 38-mut nassuiaatit innersuussutigineqarput.

Akuersissummi piomasagaat unioqqutinneqarpat, imaluunniit aalajangersagaq taanna naapertorlugu akuersissut Naalakkersuisunit utertinneqarpat, pissutsimik Inatsisartut inatsisaanni ilaatinneqartumik aalajangiinerussaqaq. Taamaalilluni Inatsisartut inatsisaanni § 47-mi malittarisassat malillugit aalajangiinerit taamak ittut eqqartuussivimmuut suliassanngortinneqarsinnaapput. Ersarinnerusumik misissornissaanut § 47-mut nassuiaatit innersuussutigineqarput.

Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi § 8 naapertorlugu, ingerlatseqatigiiffinnut pisortat pilersuiviini imermik sinneruttumik pisinissamik isumaqatigiissusiorsimallutik niuernermik tunngaveqartumik imermik atuinissamut akuersissutit aalajangersakkami aamma pineqarput. Uani imermik pilersuivinnit imermik sinneruttumit sermimik, imermillu atuneq siunnersuut aamma malittarisassiuussinngikkaluartoq. Siunnersuut malillugu imermik sinneruttumik

atuinissamut akuersissutiniq nutaanik tunniussisoqarsinnaanngilaq, akuersissutilli tunniunneqareersimasut atatiinnarneqassapput, inatsisitigullu allamik aalajangiisoqarnissaata tungaanut siunnersuummiit malittarisassiuunneqarlutik.

Imm. 4-mut.

Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugu pisinnaatitsissummik pigisigaqartoq atuinissamut akuersissummik tunineqarsimaguni, akuersissummi piumasaqaataasoq malillugu pisinnaatitsissummik pigisigaqartup atuinissamut pilersaarutit aamma uninnissamut pilersaarutit akuerineqarnissaat qinnutigissavaa. Atuinissamut akuersissummi ersarinnerusumik piffissaliussap iluani tamanna pisinnaatitsissummik pigisigaqartup qinnutigissavaa. Pisinnaatitsissummik pigisigaqartup ingerlatat aallartissinnaassagunigit akuersissut pigisariaqarpoq.

Siunnersuutigineqarpoq, pilersaarutit akuerineqarnissaannik qinnuteqaat aallaavittut Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi malittarisassat malillugit suliarineqassasoq. Atatitsiinnarnissaq pillugu imm. 3-mi malittarisassat assinganik atuutissapput.

Atuinissamut pilersaarutit, uninnissamullu pilersaarutit akuerineqarnissaannik qinnuteqaat imm. 1 malillugu Inatsisartut inatsisaata atortuulersinneqarnissaa sioqqullugu, kingornaluunniit tunniunneqarpata aalajangersagaq atuuppoq.

Inatsisartut inatsisaanni matumani malittarisassat malillugu qinnuteqaatip suliarineqarnissaannik pisinnaatitsissummik pigisigaqartup noqqaassutigisinnaavaa. Taamaattoqassappat inatsisartut inatsisaanni matumani piumasaqaataasut, matumani § 32 malillugu qinnuteqaatip imarisassaa ilanngullugu, pisinnaatitsissummik pigisigaqartup naammassissavai. Inatsisartut inatsisaat malillugu § 4 malillugu piumasaqaatit akuersissummi aalajangersarneqassapput. Qinnuteqaatip suliarineqarnerani pisinnaatitsissummik pigisigaqartup Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugu atuinissamut qinnuteqaammik tunniussinerminut atatillugu paasissutissiissutigisai, periarfissaatillugu ilaatinneqarsinnaapput.

Imm. 5-imut

Inatsisartut inatsisaat manna malillugu ingerlatassanut akuersissummik qinnuteqaatit, Inatsisartut inatsisaata atuutilerana sioqqullugu imm. 1 naapertorlugu tunniunneqartut, naammassillugilli suliarineqarsimanngitsut, Inatsisartut inatsisaat manna malillugu suliarineqarnerat ingerlateqqinneqassasoq siunnersuutigineqarpoq.

Taamaalilluni suliamik suliaqarnermi Sermip erngullu niuernikkut iluaqutigineqarnissaat pillugu Inatsisartut inatsisaanni nr. 11, 27. november 2018-imeersumi, atorunnaartussatut

siunnersuutigineqartumi malittarisassat malinnagit, Inatsisartut inatsisaanni matumani malittarisassat malinneqassapput.

Qinnuteqaatit nutaat naammassillugit suliaineqanngitsut aalajangersakkami kisimik pineqarput. Imm. 1 naapertorlugu Inatsisartut inatsisaata atortuulersinneqarnissaa sioqqullugu Inatsisartut inatsisaat malillugu ingerlatanut akuersissummik tunniussisoqareersimappat, atuinissamnut pilersaarutit aamma uninnissamut pilersaarutit akuerineqarnissaannik qinnuteqaatinik suliaqarneq pillugu imm. 4-mi malittarisassat atuupput.

Imermik pilersuivinnit imermik sinneruttuutaannit sermimik, imermillu atuinermut siunnersuut atuutinngilaq, tak. § 1, imm. 3. Tamanna pillugu imermik sinneruttumik niuerneramik tunngavilimmik atuinissamut qinnuteqaatit, ingerlatsinerunngilaq Inatsisartut inatsisaannut ilaatinneqartoq. Taamaalilluni ingerlatseqatigiimmuut pisortat imermik pilersuivianit imermik sinneruttumik atuinissamik isumaqatigiissusiorsimalluni niuerneramik tunngavilimmik atuinissamut akuersissummik qinnuteqaatit, imm. 1 malillugu Inatsisartut inatsisaata atortuulersinneqarnissaa sioqqullugu tunniunneqartut, naammassillugilli suliarineqarsimannngitsut, Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugu suliarineqassapput. Akuersissutinut taamak ittunut imm. 3 aamma atuuppoq.

§ 52-imut

Sermip erngullu avammut nioqqutissatut atorineqarnissaat pillugu Inatsisartut inatsisaat nr. 7, 31. maj 2001-imeersoq aamma Sermip erngullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq malillugit allaffissornikkut peqqussutit aalajangersagaasut, taakkua atorunnaarsinneqarnissaasa imaluunniit Inatsisartut inatsisaat manna, allalluunniit tunngavigalugit aalajangersakkanik allaffissornikkut peqqussutinit nutaanit taarserneqarnissaasa tungaannut, Inatsisartut inatsisaat malillugu allannguuteqarlutik atuutiinnassasut siunnersuutigineqarpoq.

Uani pingaartumik Sermip erngullu avammut nioqqutissatut atorineqarnissaat pillugu inatsit naapertorlugu oqartussatut suliarinnittarneq pillugu Namminersornerullutik Oqartussat nalunaarutaat pineqartillugu.

Ilanngussaq 1

Tusarniaaneq pillugu allakkiaq

Siunnersuut piffissami 20. juni 2025 – 15. august 2025 tulliuttunut tusarniaaffigineqartunut tusarniutigineqarpoq:

- Naalakkersuisut Siulittaasuata Naalakkersuisoqarfia
- Aningaasaqarnermut Akileraartarnermullu Naalakkersuisoqarfik
- Nunanut Allanut Ilisimatusarnermullu Naalakkersuisoqarfik
- Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
- Aalisarnermut, Piniarnermut, Nunalerinermit Imminullu Pilersornermut Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Isumaginninnermut, Suliffeqarnermut Nunamullu Namminermit Naalakkersuisoqarfik
- Pinngortitamut, Avatangiisinullu Naalakkersuisoqarfik
- Peqqissutsimut inunnullu Innarluutilinnut Naalakkersuisoqarfik
- Ineqarnermut, Attaveqaasersuutinullu Naalakkersuisoqarfik
- Sulisitsisut
- Grønlandsbanken
- BankNordik
- SIK
- BDO
- Deloitte
- BK Revision
- PWC Grønland
- Nunatsinni Advokatit
- Grønlands revision
- SISA
- NUSUKA
- Kommunit ataatsimut paasissutissiiviat
- Avannaata Kommunia
- Kommuneqarfik Sermersooq
- Kommune Qeqertalik
- Qeqqata Kommunia
- Kommune Kujalleq
- Kalaallit Nunaanni politidirektøri
- Nunatta Eqqartuussisuuneqarfia

- Nunatsinni Eqqartuussivik
- INI A/S
- Illuut A/S
- Nukissiorfiit

Taassumap saniatigut piffissami tassani siunnersuut www.naalackersuisut.gl-imi tusarniaavimmi tamanut saqqummiunneqarpoq.

Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalackersuisoqarfik tusarniaanermut akissuteqaatinik tusarniaavigneqartunit tulliuttunit tigusaqarpoq:

- ArctiCulture ApS
- Pinngortitamut Avatangiisinullu Naalackersuisoqarfik
- Sulisitsisut
- Kommuneqarfik Sermersooq, Sanarfinermut Avatangiisinullu Ingerlatsivik
- Nukissiorfiit
- Nuna Law
- Qeqqata Kommunia
- SIK

Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalackersuisoqarfik tusarniaanermut akissuteqaatinik oqaaseqaateqanngitsunit tusarniaavigneqartunit tulliuttunit tigusaqarpoq:

- Meeqqanut, Inuusuttunut Ilaqutariinnullu Naalackersuisoqarfik
- Nunanut Allanut Ilisimatusarnermullu Naalackersuisoqarfik
- Nunatsinni Eqqartuussivik
- Naalagaaffiup politiivi

Siunnersuutip imarisaa pillugu tusarniaanermut akissuteqaatit oqaaseqaatitalit tamakkiisumik ikkunneqarput, naalackersuisoqarfiullu oqaaseqaatai uingasumik allataallutik. Teknikkikkut kiisalu oqaatsitigut kukkunerit, amigaatillu tusarniaanermut akissuteqaammi erseqqissaatigineqartut, annerusumik oqaaseqaateqarfiginagit iluarsineqarput.

1. ArtiCulture ApS

”§ 24 malillugu qanoq annertutigisoq avammut tunineqarnerisigut tunuliaqutaralugu aalajangersarneqartumik sermimik, imermillu avammut tunisinerisigut Namminersorlutik Oqartussanut akiliuteqartoqartassaaq. Nassuiaatit malillugit imermik avammut tunisineq massakkut tunisassiornerisigut akitsuummik, literimut 0,04 koruuninut aalajangersarneqartumik (kubikmeterimut 40,00 koruuninik) aallaaveqassasoq, kisiannili nikerarsinnaassasoq

naatsorsuutigineqarpoq. Tassunga Arcticulture ApS isumaqarpoq, akigitaq taanna niuernermi pissutsinut naapertuutinngitsoq. Massakkut niuernermi qaffasissutsimit, pisuussummillu assinganik atuinermi inatsisini atortinneqarfianni allani piumasaqaatinik qaffasinnerujussuulluni.”

”Arcticulture ApS-ip innersuussutigaa, § 24-mi tunisassiornermut akitsuut tulliuuttut eqqarsaatigalugit ataavartumik naleqqussarneqartassalluni najoqqutassaq eqaatsoq tunuliaqataralugu aalajangersarneqartassasoq:

- Imermut suliarineqanngitsumut nunarsuatsinni niuerfinni akit atuuttut.
- Assinganik iluaquteqarnermi, avammullu tunisaqarnermi nunat assigiinngitsut akornanni unammilleqatigiinnermi atugassarititaasut.
- Suliniutip aningaasaqarnera, matumani pilersitsinissamut, ingerlatsinissamullu pisariaqarlutik annertuumik aningaasaliinerit ilanngullugit.”

Akissut: *Ilai ilanngunneqarput*

Akitsuutip aalajangersarneqarnissaanut tunngaviit eqqarsaatigalugit, siunnersuutip § 24-ni aalajangersagaq iluarsineqarpoq. Tunisassiornermut akitsuuteqartitsinikkut, tunngaviusumillu akiliuteqartitsinikkut akitsuutissat pillugit piumasaqaat, akuersissutini ataasiakkaani aalajangersarneqartassapput. Tunisassiorneq Kalaallit Nunaanni, avataaniluunniit pinersaq imaluunniit inermik bulkimut avammut tunisinissaq suliniummi pineqarnersoq apeqqutaatillugu akitsuutinut akigititat nikerarsinnaapput, tak. § 24, imm. 3. Taassuma saniatigut akitsuutinut akigititat nalunaarutitigut ersarinnerusumik malittarisassiuunneqarsinnaapput, akuersissummilu piumasaqaatinik aalajangersaanissamnut tunngavissiillutik. Akigititanik malittarisassiuussinermi ilaatigut niuernermi akit, unammilleqatigiinnermilu atugassarititaasut ilanngunneqarsinnaassapput. Akiliutissanik aalajangersaanermi suliniutit ataasiakkaat suunerat eqqarsaatigineqarnerunissaat, sinnnersuutip § 24-ata siunertaraa.

2. Sulisitsisut

”Avammut tunisinissamut akuersissutit atuinissamut akuersissutinit immikkoortinneqarnerat nakkutilliinermut, nunallu assigiinngitsut akornanni uppernarsaanissami annertusaataasinnaavoq. Taamaakkaluartoq ukiut tamaasa nutarterinissamik piumasaqaataasoq siunissamut ungasinnerusumut aningaasalersuinissamut, patajaatsumillu avammut tunisinissamut isumaqatigiissutinut ajornalersitsilluni nalornilersitsisinnaavoq. Tamanna pillugu innersuussutigaarput, ingerlatsisunut piumasaqaatinik uppernarsakkamik malinnittunut ukiuni arlalinni atuuttussamik avammut tunisinissamut akuersissuteqassasoq kiisalu avammut tunisinissamut akuersissutit suliarineqarnissaannut ersarissunik piffissaliussaqaassasoq. Unammillersinnaasumik aningaasaliisinnaanissaq qulakkeerumallugu, avammut tunisinissamut akuersissutit atuinissamut akuersissutituulli sivisussuseqartariaqarpoq. Avammut tunisinissamut akuersissutinik tunuarsimaartitsineq nakkutilliinertut atornagu, paasissutissat tamarmik oqartussanut anngunneqarnissaasa qulakkeerneqarnissaanni, nalunaarusiortussaataitaneq atorineqarsinnaavoq.”

Akissut: *Ilanngunneqanngilaq.*

Inatsit massakut atuuttoq malillugu sermimik, imermillu atuinissamut akuersissummik tunniussinermut atatillugu avammut tunisinissamut immikkut akuersissummik tunniussisoqarneq ajorpoq. Avammut tunisinissamut akuersissut atuinissamut akuersissummi, piumasaqaatit assigiinngitsut ilaattut piumasaqaataavoq. Pisinnaatitsissummik pigisaqartup avammut tunisinissamut immikkut akuersissummik ujartuina akitsuuserisunut, aningaasaliisartunut il.il. takutissatut naleqquttutut isigineqartarpoq.

Paasissutissat nutaangilisimasut tunuliaqutaralugit avammut tunisisoqartannginnissaa qulakkeerumallugu, avammut tunisinissamut akuersissutit killilimmik atuuffeqartarnerat nalinginnaasumik suleriaasiuvoq. Avammut tunisinissamut akuersissutit qaqugukkulluunniit pissutsinut atuuttunut naapertuunnissaat, ilutigisaanillu nunami tunisiffimmi uppernarsaatitut atuuttutut akuerineqarsinnaanissaasa qulakkeerneqarnissaa, ukiut tamaasa nutarterisarnissami pingaarnertut siunertaavoq. Taamaalilluni allaffissornikkut nakkutilliinermut, pisinnaatitsissummillu pigisaqartup nunat assigiinngitsut akornanni uppernarsaasiisinnaaneranut nutarterineq annertusaaqataavoq.

Nalunaarusiortussaataaneq nakkutilliinissami tunngavissatut atornerarpoq, oqartussalli avammut tunisinissamut akuersissutinik tunniussinissaannut aamma nutarterinissaannut tunngavissaasa atatiinnarneqarnissaanut pisariaqartumik nutartereriaatsimut taarsiisinnaanani.

”Suliniutit sumiiffimmi imermik pilersuinermt sunniuteqanngikkajuttarmata, sumiiffimmi pisariaqartitat qulakkeerneqarnissaannut annikitsumik iliuuseq tassaassaaq, Kalaallit Nunaanni imermik pilersuineq assigalugu akiliuteqartitsinikkut imermik atuisinnaatitsineq.”

Akissut: *Ilanngunneqanngilaq.*

Pisinissamut pinngitsoorani aaqqiissuteqarnissamut siunnersuummi aalajangersaanissaq naleqquttutut isigineqanngilaq. Taamaakkaluartorli pisariaqartitsisoqassappat pisinnaatitsissummik pigisaqartut, ingerlatsisullu attuumassuteqartut, matumani aamma pisortat pilersuiviisa akornanni nammineq kajumissutsimik isumaqatigiissusiornissaq mattunneqanngilaq.

Taassuma saniatigut oqaatigineqassaaq, pigisanik aalaakkaasunik arsaarinnissuteqarnermi pisortat pilersuinerisa qulakkeerneqarnissaani pisariaqartillugu akuersissummik utertitsinissamut imaluunniit annikilliliinissamut, siunnersuutip § 49-a naapertorlugu Naalakkersuisut tunngavissaqarmata. Pigisanik aalaakkaasunik arsaarinnissuteqartarneq pillugu Inatsisartut inatsisaanni malittarisassat malilluu pigisanik aalaakkaasunik arsaarinnissuteqartoqassaaq, taassumallu kingiorna inatsisartut inatsisaannut naapertuuttumik taarsiissutissaq aalajangersarneqassalluni.

”Najukkami suliarinninnissamut tunngavissatut akiliutit nikerartinneqarnissaannut isumaqataavugut, pilersaarusiornermilu isumannaassusermik pilersitsiumalluni piffissamut akuersissuteqarfiusumut tamarmut akiliutit aalajangersimasuutinneqartariaqarput imaluunniit tunngaviit ersarissut malillugit malittarisassiuunneqartariaqarlutik.”

Akissut: *Ilai ilanngunneqarput.*

Akuersissutini ataasiakkaanni tunngaviusumik akiliutissaq, tunisassiornermilu akitsuut pillugit akiliutissaq pillugu piumasagaatinik aalajangersaasoqarsinnaasoq ersarissarlugu, siunnersuutip § 24-a allanngortinneqassaaq. Kalaallit Nunaanni, avataaniluunniit tunisassiorqarnersoq kiisalu bulkimut avammut tunisisoqarnersoq tunuliaqutaralugit akiliutit nikerarsinnaapput. Akitsuutinut akigitat nalunaarummi aalajangersarneqassasut, ataavartumillu naleqqussarneqartassasut, tamannalu tunuliaqutaralugu akitsuutit pillugit piumasagaatit akuersissutini ataasiakkaanni aalajangersarneqartassasut siunertaavoq. Taamaalilluni suliniutip qanoq issusaanut, tunisassiornissarlu apeqqutaatillugit akiliutissaq aalajangersarneqarsinnaavoq.

”Akuersissuteqarniarnermi avatangiisit eqqarsaatigineqarnissaasa ilaatinneqarnissaata pingaruteqassusia aamma akueraarput, kinaassusersiunnginnissarli qulakkeerumallugu, suliniutit mikinerusut naleqqutinngitsumik aningaasartuuteqartinneqannginniassammata, pinngortitamut kingunissaanik naliliinissami piumasagaat suliniutip annertussusaanut, qanorlu annertutigisumik sunniuteqarnissaanut naleqqussarneqartariaqarpoq.”

Akissut: *Ilanngunneqanngilaq.*

Tusarniummut akissut siunnersuummik allannguinnissamut pissutissaqartitsinnigilaq. Suliniut nunamut, kangerlummut, immamullu annertuumik allannguissappat imaluunniit pinngortitamut sunniuteqassappat, pinngortitamut kingunissaanik naliliisoqarnissaanik piumasagaatip aatsaat atuutsinneqarneratigut, siunnersuutip § 29-a naleqquttumik oqimaaqatigiissitsinissamik aalajangersagartaqarpoq. Tamanna pillugu suliniutit mikinerusut tassangga naammassinninngitsut, pinngortitamut kingunissaanik naliliisoqarnissaanik piumasagaammut ilaatinneqanngillat. Suliniut pinngortitamut kingunissaanik naliliisoqarnissaanik pisariaqanngitsaq qinnuteqartoq nalilerpagu, tamanna qinnuteqaammi tunngavilersorneqassaaq.

Taassuma kingunerisaanik siunnersuutip § 29, imm. 3-a malillugu, pinngortitamut kingunissaanik naliliinissaq pillugu piumasagaatinik, matumani qanoq annertutigissanersaq imarisassaalu ilanngullugit, Naalakkersuisut ersarinnerusunik malittarisassiorsinnaapput. Uani suliniutip annertussusaa, sunniutaasinnaasullu tunuliaqutaralugit annikitsortai qanoq annertutigisumik ilanngunneqarnissaanut periarfissaq aamma ilaatinneqarpoq.

”§ 23-mut tunngatillugu, allamut pisinnaatitsinerit pisinnaatitsissummik pigisaqartumut ataqatigiissaarneqarnissaat, atuinissamullu akuersissutip nalinganut ajorseriartitsinninnissaa aalajangiisuvoq. Ingerlatsinerit imermik atornikumik kuutsitsisussat, allatigulluunniit

mingutsitsisussat akuerineqartariaqanngillat, tassani pisuussut imeqarfimmut killeqarfimmiittutut tunngaviusumik isigineqartariaqarmat, tassani ingerlatsinerit killeqarfiiit taakkua iluini nalinginnaasumik akuerineqartartut kisimik ingerlanneqarsinnaammata.”

Akissut: *Ilanngunneqanngilaq.*

Tusarniummut akissut siunnersuummik allannguinnissamut pissutissaqartitsinngilaq, tusaatissatulli tiguneqarluni. § 23-mi aalajangersakkap Naalakkersuisut akuersissummi piunasaqaatinik aalajangersaasinnaatippai. Piunasaqaatit taakkua pisinnaatitsissummik pigisaqartumuinnaq pituttuipput. § 23-mi aalajangersagaq allap pisinnaatitaaffiinut allannguinnermik kinguneqanngilaq. Allap pisinnaatitaaffiinik annikilliliinissaq pisariaqassappat, tamanna siunnersuutip § 48-ani aamma 49-ani aalajangersakkat naapertorlugit, inatsilluunniit alla naapertorlugu pissaaq. Sumiiffinni ingerlatsinerit allat inatsimmut atuuttumik naapertuuttumik pissapput. Allat ingerlatsineri pisinnaatitsissummik pigisaqartup pisinnaatitaaffigalugu naatsortuutaanut ataqatigiissinneqarsinnaanissaat qulakkiissallugu, aalajangersakkami siunertaavoq.

3. Kommuneqarfik Sermersooq, Sanarfinermut Avatangiisinullu Ingerlatsivik

”§19-imut oqaaseqaatit: Imermik/sermimik atuinissaq nunaminertamik atugassinneqarnissamik pisariaqassappat, nunaminertanut oqartussanut immikkut qinnuteqartoqassaaq (tak. Namminersorlutik Oqartussat nalunaarutaat nr. 4, 25. jan. 2024-meersumi § 37, matuma kingorna Pilersaarusiornermut inatsit).

§36 – Qinnuteqaat qaqugukkut ”inuiaqatigiinnut, avatangiisinut imaluunniit inuussutissarsiutinut tunngasunik annertuumik kinguneqarsinnaasoq” pillugu naliliinissami piunasaqaatit suut tunngavigineqarsinnaanersut siunnersuusiortoqarsinnaakutsoorpoq. Tassunga tunngatillugu innersuussutigineqarpoq, Pilersaarusiornermut inatsit naapertorlugu pisortat tusarniaaneritut killissarititaaq sapaatip akunneritut 6-8-nut aalajangersarneqassasoq.”

Akissut: *Ilai ilanngunneqarput.*

Siunnersuutip § 7-ia malillugu, siunnersuut malillugu akuersissutinut tunniunneqartunut pisinnaatitsissummik pigisaqartut inatsisit allat malillugit akuersissutinik pisariaqartunik pissarsinissaannut pisussaajunnaarsitsinngitsoq. Uani pingaartumik nunaminertamik atuiueq, nunaminertanut oqartussanit isumagineqartoq pineqarpoq.

Tusarniaanerup siviussusaa pillugu § 36, imm. 3-mik allannguinnissamut, akissut pissutissaqartitsinngilaq. Taamaakkaluartoq tusarniummut akissut tusaatissatut tiguneqarpoq, siunnersuutillu § 36, imm. 2-anut aamma 3-anut nassuiaatit paasineqarnissaannut itisilerneqarlutik.

Inuiaqatigiinnut, avatangiisinut imaluunniit inuussutissarsiornermut tunngasunut suliniut annertuumik kinguneqartussatut isigineqarnerisoq, pisumik naliliinnermik aallaaveqassasoq § 36, imm. 2-mut nassuiaatini ersarissarneqarpoq. Taassuma saniatigut naliliinnermi

kinaassusersiunnigitsutut isigineqarsinnaasunik assersuusiorluni tamanna itisilerneqarpoq. Uani ilaatigut tassaasinnaapput suliniutip annertussusaa, qanoq ittuunera, sumiiffimmullu sunniutissai.

Pissutsit apequtaatillugit tusarniaanermi piffissaq sivikinnerusinnaallunilu sivilunerusinnaamat, tak. siunnersuummi § 36, imm. 3, sapaatip akunnerini sisamani tusarniaasarnissaq atatiinnarneqassaaq. Sivikinnerusumik imaluunniit sivilunerusumik tusarniaanissamat pissutsit immikkut ittut suut tunngavissiisinnaaneriniq assersuusiorluni imm. 3-mut nassuiaatit itisilerneqarput, matumani suliniutip suussusaa, annertussusaa, katitigaanera, ingerlatsisunullu allanut ataqatigiissaarinissamik pisariaqartitsineq ilanngullugu.

”Ilaatigut nunaminertamik atuneq pillugu paasissutissanik nalunaarsuineq, aallernerlu pillugit Pilersaarusiornermut inatsimmi § 5, imm. 3 aamma § 6 innersuussutigineqarput. Nunagis-imut nalunaaruteqartarneq oqartussat allat pilersaarusiornerinut, sulianillu suliaqarnerinut sakkussaqalersitsissaaq.”

Akissut: *Ilanngunneqanngilaq.*

Tusarniummut akissut siunnersuummik allannguinnissamat pissutissaqartitsinngilaq, pilersaarusiornermulli inatsimmut innersuussutigineqartoq tusaatissatut tiguneqarpoq.

4. Nukissiorfiit

”Taamaakkaluartoq inatsisissatut siunnersuutip § 1, imm. 3-ata aalajangersarpaa, ”Imerkik pilersuinnissamat sermimut aamma imermut imaluunniit Kalaallit Nunaanni imermut sinneruttumut imermik pilersuiviit pisortat pilersuinerini sermip, erngullu atorneqarneri imaluunniit imermut sinneruttumut pisortat pilersuiviisa atorsinnaasaannut Inatsisartut inatsisaat atuutinngilaq.”

Massakkut sulisaasermi tamanna allannguineruvoq, siunnersuullu malillugu imermik pilersuivinnit imermik sinneruttumik atuinissamat akuersissutit malittarisassanut ilaajunnaarsinneqarlutik, taamaalillunilu siunnersuut malillugu tassunga atuinissamat akuersissutinik tunniussisoqarsinnaassanngitsaq.”

”Nassuiaatini aamma nalilerneqarpoq, imermik pilersuivinnit imermik sinneruttumik atuinerup malittarisassiuunneqarnera immikkoortinneqaruni, pilersaarutinullu taakkununnga naleqquttumik, taakkuninngalu malittarisassiuussinissamik pisariaqartitsinermut immikkut inatsimmi malittarisassiuunneqaruni naleqqunnerussasoq.

Nukissiorfiit tassunga isumaqataasinnaapput.”

”Sermimik, imermillu niuernerimik tunngavilimmik atuneq pillugu inatsisip nutaap atulerneru ilutigalugu, imermik sinneruttumik tunniussinissaq pillugu niuersinnaallutik

pisinnaatitsissummik pigisaqartunut isumaqatigiissusiornissamut Nukissiorfiit manna tikillugu suleriaasianut tunngatillugu maleruagassatigut tunngavik illuatungeriit misissussagaat, tamannalu inatsisip nutaap 2026-p aallartinnerani atortuulersinneqarnissaa sioqqullugu qulaajarsimassagaat innersuussutigineqarpoq.”

Akissut: *Ilanngunneqanngilaq.*

Tusarniummut akissut siunnersuummik allannguinnissamut pissutissaqartitsinnigilaq, Nukissiorfiilli innersuussutaa tusaatissatut tiguneqarpoq. Nukissiorfiit imermik sinneruttuutaanik niuerneramik tunngavilimmik atuineq pillugu oqaloqatigiinneq, qulaajaanissaq siunertaralugu nanginneqassasoq.

Taassuma saniatigut oqaatigineqassaaq, Inatsisartut inatsisaat 1. juli 2026-mi atortuulersinneqassasoq siunnersuutigineqarluni, atortuulersinneqarfissaa allanngortinneqarmat.

5. Nuna Law

”Akuersissutinik il.il. tunniussinissami piumasqaaterpaaluit inatsisissatut siunnersuummi ersarissarneqarput. Taakkua ilaatigut isertuaatsuutitsinninnissamut tapersiipput – sualuppoq qinnuteqartup sunik paasissutissiinissaa eqqarsaatigalugu.

Taamaakkaluartoq Naalakkersuisut akuersissutinik tunniussinissaat, aalajangiinerit aamma missiliuinerit oqimaaqatigiissitsinissami ersarluttunik aallaaveqarsinnaarpasipput.”

”Taamaalilluni siumut nalunanggereersitsinissamut ajorseriartitsisumik, inatsisitigullu isumannaallisaaffigineqarneq isigalugu ernumanartumik, inatsisissatut siunnersuummi arlalinni oqartussat annertuumik missiliuinertalimmik, eqaatsumillu aalajangiisinnaatinnearput.”

Akissut: *Ilanngunneqanngilaq.*

Tusarniummut akissut siunnersuummik allannguinnissamut pissutissaqartitsinnigilaq. Inatsit massakkut atuuttoq malillugu, akuersissummik tunniussisoqassanersoq Naalakkersuisut naliliinissaanni annertuumik missiliuisinnaatinnearput. Tamanna siunnersuummi allanngortinneqanngilaq.

Piumasqaatinik aalajangersimasunik naammassinninnikkut qinnuteqartoq akuersissummik tunineqarnissaminut inatsisitigut pisinnaatitaaffeqassasoq, siunnersuutitigut siunertaanngilaq. Taamaakkaluartoq suliniutit suut akuerineqarnissaat pillugu Naalakkersuisut naliliinissaanni, missiliuisinneqartarnerat nalinginnaalluinnarpoq. Missiliuisinnaanissaq, qinnuteqartumilu pissutsit aamma suliniutit ataasiakkaat eqqarsaatigalugit, aammali inuiaqatigiit siammasinnerusumik soqutigisaat akuutillugit aalajangiisooqarnissaa qulakkeerumallugu, eqaassuseqartitsinissaq taanna pisariaqartinneqarpoq.

Qinnuteqaatinik naliliinissami, missiliuinissamilu siunnersuut aalajangersimasunik piumasagaasiivoq, tamannalu qinnuteqartumut, pisinnaatitsissummik pigisaqartumut, soqutigisalinnullu allanut annertunerusumik siumut nalunangereersitsinissamik kiisalu inatsisitigut isumannaallisaaffigineqarnerup annertusineqarnissaanik siunertaqarluni. Ilutigisaanik ingerlatsinermut inatsimmi malittarisassat, tunngaviillu nalinginnaasut isiginiarneqartassapput, matumani kinaassusersiunngitsumik, naleqqutumik, assigiimmillu pinninnissaq ilanngullugit.

”Avammut tunisinissamut akuersissut atuinissamut akuersissummit immikkoortinneqarluni periutsip nutaap kingunerisaanik, pisinnaatitsissummik pigisaqartoq atuisinnaanermut akuersissutaatillip ilumut avammut tunisinissamut akuersissummik tunineqassanerluni – imaluunniit ukiut tamaasa nutarterneqartarneratigut – inatsit taamatut paasineqartillugu – ukiut tamaasa pisumik naliliinikkut atatiinnarneqarsinnaassanersoq ilisimassanngilaa.

Imaappoq, pisinnaatitsissummik pigisaqartoq avammut tunisinissamik akuersissummik pissarsisinnaanngimmat, atuinissamut akuersissummik atorsinnaanngitsumik pigisaqalersinnaavoq. § 10, imm. 1-imi taasatut oqimaaqatigiissitsinissaq aamma inatsimmut nassuiaatit tunuliaqutaralugit, aalajangiinissami tunngavissillutik piumasagaatit erseqqinngillat, taamaattumillu suna piumasagaataanersoq siumut nalunangereerani.”

”Ilutigisaanik tamanna sulisaanermi annertuumik nalorninartoqalersitsivoq, suliniutillu ingerlanneqarnissaanut akimmiffeqalersitsinnaalluni. Suliniutip aallartisarnerani suliniutip pisariaqartunik aningaasalersorneqarnissaa eqqarsaatigalugu, aammali pisinnaatitsissummik pigisaqartoq pilersuinissamik imaluunniit ukiut arlaqartut ingerlanerini pilersuinissaminik tunngaviusumik qulakkeerisinnaatinnagu, pisisartunut tunisinissamik isumaqatigiissusiornermi ukiorpassuarni atuuttussamik, annertuumillu niuernissaq pingaartumik eqqarsaatigalugit.”

Akissut: *Ilanngunneqanngilaa.*

Tusarniummut akissut siunnersuummik allannguinnissamut pissutissaqartitsinngilaa. Sermimik, imermillu avammut tunisinermi Kalaallit Nunaata aningaasaqarnikkut, inuiaqatigiinnullu tunngatillugu soqutigisai, matumani aamma pilersuinerup isumannaassusaa eqqarsaatigalugit avammut tunisisoqartarnissaa qulakkeerneqarnissaa siunertaralugu, avammut tunisinissamut akuersissutit pillugit siunnersuutip § 10-a ilusilersugaavoq. Taassuma saniatigut pisinnaatitsissummik pigisaqartup immikkut akuersissummik ujartuina akuerisinnaassallugu aalajangersagaq siunertaqarpoq.

Akuersissutit allat assigalugit Naalakkersuisut naliliinissami, avammut tunisinissamut akuersissummik tunniussisoqassanersoq imaluunniit nutaannguisoqassanersoq naliliisussanngortinneqarput. Tassunga atatillugu inuiaqatigiinni eqqarsaatigineqartariaqartut tamaasa isigialugit naliliinissaq periarfissaatillugu, naliliinissami siammasissumik piumasagaateqarnissaa aalajangersakkap aalajangersarppaa.

Avammut tunisinissamut akuersissummik tunisoqassanersoq pillugu naliliinissami suut eqqarsaatigineqarsinnaanersut assersuutitalerlugu, nassuiaatini ersarinnerusumik ersarissarneqarpoq. Ilutigisaanik pisuni tamani naliliinissami ingerlatsinermut inatsimmi malittarisassat, tunngaviillu nalinginnaasut isiginiarneqartassapput, matumani kinaassusersiunngitsumik, naleqqutumik, assigiimmillu pinninnissaq ilanngullugit. Taassuma saniatigut Naalakkersuisut naliliisinnaatitaanerit pillugu siuliani akissut innersuussutigineqarpoq.

Avammut tunisinissamut akuersissutip ukiut tamaasa nutarterneqartarnissaa pillugu siunnersuutip § 10, imm. 3-ani piumasaqaataasoq eqqarsaatigalugu, pissutsit annertuumik allanngorsimatillugit avammut tunisinissaq Kalaallit Nunaata aningaasaqarneranut, inuiaqatigiinnullu tunngatillugu soqutigisaanut, matumani aamma pilersuinerup isumannaassusaanut naapertuutinngitsutut isigineqanngippat, aallaavittut suliatiguinnaq nutarterneqartassasoq naatsorsuutigineqarpoq. Paasisutissat nutaanngilisimasut tunuliaqutaralugit avammut tunisisoqartanninnissaa, ukiut tamaasa nutarterinissap ilaatigut qulakkiissavaa, ilutigisaanillu avammut tunisinissamut akuersissut takutinneqarsinnaasoq pissutsinik aallaaveqassalluni.

Siuliani Sulisitsisunut akissut innersuussutigineqarpoq.

6. Qeqqata Kommunia

”Taamaakkaluartoq siunnersuutip § 20, imm. 2, tak. imm. 1 malillugu, pisinnaatitsissummik pigisaqartup qinnuteqarneratigut, alliliineq annertunngitsutut isigineqarpat kommunalbestyrelsi tusarniaaffiginagu sumiiffik akuersissuteqarfiusoq Naalakkersuisut allisinnaavaat imaluunniit allanngortissinnaavaat.

[...]

Allannguinnissaq imaluunniit alliliinissaq annertuutut imaluunniit annikitsutut nalilerneqarnera apeqqutaatinnagu, kommunalbestyrelsi tusarniaaffigineqartuaannartussanngorlugu § 20 allanngortinneqassasoq Qeqqata Kommuniata siunnersuutigaa. Allannguneq imaluunniit alliliineq sumiiffimmi pilersaarutinut imaluunniit soqutigisanut kinguneqassanersoq naliliinissami, kommunalbestyrelsi qaninnerpaavoq.”

Akissut: Ilanngunneqarpoq

§ 36-mi malittarisassat naapertorlugit tusarniaaneq pisussanngorlugu, siunnersuutip § 20, imm. 1-ia allanngortinneqarpoq. Taamaalilluni sumiiffiup akuersissuteqarfiup allinissaa imaluunniit allanngortinnissaa pillugu Naalakkersuisuit aalajangitinnagit, kommunalbestyrelsi tusarniaaffigineqassaaq. Taassuma saniatigut alliliineq imaluunniit allannguneq inuiaqatigiinnut, avatangiisinut imaluunniit inuussutissarsiutinut annertuumik kinguneqassasoq nalilerneqarpat tamanut tusarniaasoqassaaq.

7. SIK

”§ 24-mut tunngatillugu sermeq imaluunniit imeq suliareqqaagaassanersoq, puujaasanut maqitassaassanersoq imaluunniit bulkimut avammut tunisassiarineqassanersoq pillugu tunisassiamut paasissutissanut ilanngunneqartarnissaat pillugu.”

Akissut: *Ilanngunneqarpoq.*

Akitsuutit nikarsinnaatillugu, siunnersuutip § 24-ani aalajangersagaq allanngortinneqarpoq. § 24-mi imm. 3 naapertorlugu tunisassiorneq Kalaallit Nunaanni imaluunniit avataani pinersoq imaluunniit bulkimut avammut tunisisoqarniarnersoq apeqqutaatillugu, akiliutit nikerarsinnaapput. Tamanna avammut tunisinissamik qinnuteqarnermut atatillugu paasissutissiissutigineqassaaq, tak. siunnersuummi § 34, imm. 1, nr. 2.

”SIK

Sermip erngullu niuernikkut iluaqutigineqarnissaat pillugu Inatsisartut inatsisaata, tassungalu nassuiaatit tusarniutigineqarneranut, 1. januar 2026-milu atortuulersinneqarnissaanut SIK isumaqataavoq.”

Akissut:

Oqaatigineqassaaq, Inatsisartut inatsisaat 1. juli 2026-mi atortuulersinneqassasoq siunnersuutigineqarluni, atortuulersinneqarfissaa allanngortinneqarmat.